

MATYIW

Jiysis Krays Minim Tep Matyiw

Tikak

Minim Nind Niņep

Baybol buk day “Matyiw” apun biy, Jiysis binuk Matyiw tikak. Nuk nind bi takes dep bap mindyngip. Yimb nuk bap Liypay. Kesim tikak kun biy biynimb nuk Jiwda kay riyt gi niņiy, Jiysis mey bi kiņy yomb key yimb kond mindyngipun anep niņniņiy aņgiy tikak.

Minim Ar Keykey Mindip Rek:

Jiysis Krays nusind nupis nuk gok tikey amiy apiy giy, nup tikyak kesim ak mindip, chapta 1:1-2:23.

Jon bi niņg pikñemb ak woņg kiņiņ gi gak minim ak mindip, chapta 3:1-12.

Jon Jiysis nup niņg pikñak minim ak sek, Seytan Jiysis nup tom gak minim ak sek mindip, chapta 3:13-4:11.

Jiysis miñmon Galiyliy woņg kiņiņ gi gak minim ak mindip, chapta 4:12-18:35.

Jiysis Galiyliy nimb woņg gindand Jerusalem amnak minim ak mindip, chapta 19:1-20:34.

Jiysis niņ nuk ak maņ giy wiyk nokom bap mindakniņ, Jerusalem sek, yep maņ kun okok sek aņñiraņgek minim ak mindip, chapta 21:1-27:66.

Jiysis kumiy tikjakek biynimb kuņaynep misen niņyak minim ak mindip, chapta 28:1-20.

Yerer Giy Tik Dand Apiy Jiysis Nup Tikyak

¹ Jiysis Krays nop nusind yes nuk gok tikey amiy apiy gek nup tikyak rek angning gispiyn. Biyomb Ebrahim tikek tik dand amiy, kiyn Depiyt nup tikeyak mey; Depiyt nund tikek tik dand amiy mey, Jiysis Krays nup tikyak.

² Kun giyak: Ebrahim Aysek nup tikak. Aysek, Jekop nup tikak. Jekop nund pen, Jiwda nup tikiy, numam onep anqip ak tikiy gak. ³ Jiwda nuk biyn Tema yip mindiy, Peres yip Sera yip kuyip tikak. Peres, Hesron nup tikak. Hesron, Aram nup tikak. ⁴ Aram, Amiynadap nup tikak. Amiynadap, Nason nup tikak. Nason, Salmon nup tikak. ⁵ Salmon, Bowas nup tikak. Bowas nonim nuk ak Reyap. Bowas, Obet nup tikak. Obet, nonim nuk ak Rut. Obet, Jesiy nup tikak. ⁶ Jesiy, kiyn Depiyt nup tikak. Depiyt, Solomon nup tikak. Solomon nonim nuk ak nind binak Yiwraya nup dek kumek, kisen Depiyt nup diy, Solomon nup tikak. ⁷ Solomon, Riyabowam nup tikak. Riyabowam, Abaysa nup tikak. Abaysa, Esa nup tikak. ⁸ Esa, Jospet nup tikak. Jospet, Joram nup tikak. Joram, Asaya nup tikak. ⁹ Asaya, Jotam nup tikak. Jotam, Ewas nup tikak. Ewas, Hesekeya nup tikak. ¹⁰ Hesekeya, Manase nup tikak. Manase, Emos nup tikak. Emos, Josaya nup tikak. ¹¹ Josaya, Jekoyakiyn nup tikiy, numam gunap tikiy gak. Nin kun ak, Babiylon biynimb ap, Yisrel biynimb kuyip kalambis ay, dand Babiylon amniyak.

¹² Dand ameyak, Jekoyakiyn kun okok mindiy, Siyaltiyel nup tikak. Siyaltiyel, Serababel nup

tikak. ¹³ Serababel, Abayat nup tikak. Abayat, Eliyakim nup tikak. Eliyakim, Yisow nup tikak. ¹⁴ Yisow, Sedak nup tikak. Sedak, Ekim nup tikak. Ekim, Elayat nup tikak. ¹⁵ Elayat, Eleysa nup tikak. Eleysa, Matan nup tikak. Matan, Jekop nup tikak. ¹⁶ Jekop, Josep nup tikak. Josep mey, biyn Mariya nup ñeyak, nuk yip ma kinak won ak, Mariya koŋgiy mindiy mey, Jiysis bi kiyn yomb key yimb kond mindyngipay ak nup tikak.

¹⁷ Kun ak, basind chin Ebrahim nund tikek tik dand, amiy apiy giy mey, basind kiyn Depiyt nup wanjrem piskind ak tikyak. Tikey Depiyt nund pen tikek amiy apiy gek, kunep wanjrem piskind ak amek, Babiylon kay ap kuyip kalambis ay dand miñmon kiyk ak amniyak. Dand ameyak, kisen pen tip ak tik dand amiy apiy giy, Krays nup wanjrem piskind ak tikyak.

Mariya Jiysis Nup Tikak
(Luk 2:1-7)

¹⁸ Jiysis Krays nup tikyak minim ak tikning gispiyn: Jiysis nonim Mariya, Josep nup ñeyak, yip ma kinrik ñin ak niñyak; Mariya ñapan koŋgiy mindek. Gor Kawnan nuk ak key gek, ñapan koŋgiy kun ak mindek. ¹⁹ Pen Josep bi suñ-tep ak mey, minim yomb ma angak. Ñapan koŋgiy mindip kun ak, biynimb okok angñeningayn, nup nambin giningamb. Kun ak nup kapkap angyokiyn angiy niñak ak pen, ²⁰ kisyim biyan wisin niñak: enjol bap angak, “Josep, Depiyt ñinuk! Biyn kun ak yenen dinim angiy gos ak ma niñnimin; monmon dinimin. Ñapan koŋgiy mindip ak, Gor Kawnan anep gek mindip.

²¹ Kisen ñi ak tikek yomb giy, biynimb nuk gok gach kuyip ak wiykyokiy, di Nop yip jimñiy ayniᅅgamb ak mey; yimb nup Jiysis aᅅgnimin aᅅgak.” ²² Aᅅgak kun ak, bi Gor minim aᅅgep bap giniᅅgamb aᅅgiy tikak rek nep gak. ²³ Nuk aᅅgak: “Biyn piñ bi yip ma kiniᅅgamb bap, ñapan koᅅgiy mindiy, ñi bap tikeᅅniᅅgamb; yimb nup ak Yimanwel aᅅgniᅅgambay aᅅgak.”

Yimanwel minim kiñiᅅ ak, Gor chin yip mindip apay.

²⁴ Pen Josep, enjol minim aᅅgak ak diy, biyn Mariya nup dinim aᅅgiy niᅅgak. ²⁵ Kun ak Mariya ñi ak tikek, Josep ñi kun ak yimb Jiysis aᅅgiy, kisen mey; Mariya nup pisnep dak.

2

Bi Gap Niᅅep Gok Ap Jiysis Nup Niᅅyak

¹ Pen kiᅅᅅ Herot mindek ñin ak, Mariya Jiysis nup tikak miñmon sikoy Betliyhem; Jiwdiya propens namb okok. Tikek, bi gap niᅅep gok, pumb limᅅip tam okok nimb ap Jerusalem apiy aᅅgyak, ² “Jiwda biynimb, kiᅅᅅ chin apay ak nup tikpay! Miñiy dayey mindip akay? Miñmon chin okok mindiy niᅅbun; gap ak limᅅamb niᅅiy mey, nup lotiw giniᅅᅅ aswun aᅅgyak.” ³ Kun aᅅgeyak, kiᅅᅅ Herot minim kun ak niᅅiy, ñapan kun ak nup gosimb niᅅiy yip kirginiᅅᅅiy rek ayip aᅅgiy, gos kuᅅay niᅅgak. Jerusalem biynimb kunep, gos kuᅅay niᅅyak. ⁴ Pen kiᅅᅅ Herot, bi Gor nup simboᅅgep yomb gok sek, bi low tiysa gok sek kuyip suk aᅅgek apeyak aᅅgak, “Bi kiᅅᅅ yomb key yimb ak nup tikniᅅᅅgambay miñmon akay?”

⁵ Angek angyak, “Bi Gor minim angep bap minim tikiy angak rek: nup tikningambay miñmon sikoy Betliyhem. Bi Gor minim angep kun ak tikiy angak,

⁶ ‘Jiwdiya propens namb okok, miñmon keykey kunay mindip, miñmon Betliyhem niñey sikoy rek ayingamb ak pen; Biyomb ak miñmon kun ak nimb apiy, biynimb yand Yisrel kay kuyip kond mindeningamb. Kun giningamb rek Betliyhem yimb yomb mindeningamb angak.’ ”

⁷ Kun angeyak, kiñ Herot niñiy, am bi gap niñep gok kuyip kapkap suk angek apeyak angak, “Ñin akay rek gap kun ak lingak?” ⁸ Angek, nup minim kun ak angneyak; kuyip Betliyhem angyokniñg, tom giy angak, “Nimb am ñapan kun ak piyow niñrep giy, yip ap angem, yand kunep am nup lotiw ginim.” ⁹ Angek kiyk san diyakniñg, gap ak nind nind gakniñg; kiyk kisen giyak. Gap ak am am, ñapan ñañ ak korip mindek namb siñak nep aland gak. ¹⁰ Kun gek kuyip tep yimb gakniñg, ¹¹ korip miñgan biyan amiy niñyak: ñapan ñañ ak nonim Mariya yip minderik. Am koñgim yimiy, nup lotiw giy, wand kiyk gok anjiy, nup gol gunap, pawil kuyrep wip rek gunap, wel kuy wip rek gunap ñiyak.

¹² Pen kiniy wisin niñyak: Gor angak, “Andkind Herot ker ma amnimimb angak.” Kun angek niñiy, kinjen par bap amiy, korip kiyk amniyak.

Josep, Biyn Amiyminay Ak Poñind, Pirik Yijip Amnak

13 Pen kiyk kun giy amey, Josep wisin niñak: enjol bap apiy nup angak, “Herot ñapan ñaṅ ak pikayin anḡiy, piyow niñning gisap. Kun ak ñapan ñaṅ amiymñay ak kasek poṅind, pirik Yijip amninin. Pen winimin anḡen nep, tip ak andkind winimin anḡak.”

14 Anḡek, Josep kisyimnamb biyaṅ nep tikjakiy, ñapan ñaṅ amiymñay ak poṅind Yijip amnak.

15 Poṅind amnak kun ak, bi Gor minim anḡep gok giniṅgamb anḡiy tikiyak rek nep gak. Tikiy anḡyak, “Ñi yand ak Yijip nimb suk anḡen winiṅgamb anḡip anḡyak.”

Pen Josep amyong apyong am Yijip mindey, Herot kumek, tip ak andkind wiyak.

16 Pen Herot bi gap niṅep gok kuyip anḡak rek ma geyak; nup milukrimey yimb yapek anḡak, “Yip gipay kun ak, ñiṅaṅ biyomb mindning gisap ak yergiy pik aynim anḡak.” Pen gos bap niṅiy anḡak, “Ñiṅaṅ kun ak kisen tikiyak ñin ak, gap ak limgek, yip anḡrep giy amniyak. Kun ak yand niṅbiyn: Betliyhem ñiṅaṅ tikey, simiy omiṅal yinimb gok sek, ñiṅaṅ kisen tiksipay gok sek pikjirikiy mey, ñi kun ak sek pikjirik ayniṅgambun anḡak.” Kun anḡiy, binuk gunap anḡyokek am ñiṅaṅ Betliyhem maṅ okok mindeyak gok maṅgiysek pikjirik aydiyak.

17 Betliyhem ñiṅaṅ pikjirik ayak kun ak, bi Gor minim anḡep Jeriymaya giniṅgamb anḡiy tikak rek nep giyak. Jeriymaya minim kun ak tikiy anḡak:

18 “Miñmon Rama simb gek, kilpul yomb anḡiy, siy yomb anḡniṅgambay. Biyn Resel tikek,

tikey amiy apiy giningamb gok, simb gek siy angningambay. Pen biynimb gunap, kuyip angedep rek ma ayningamb angak.”

Josep, Biynuk Amiymıñay Yip Tip Andkind Wiyak

¹⁹ Pen kisen biyomb Herot kumek, Josep miñmon Yijip kiniy wisin niñak: enjol bap apiy nup angak, ²⁰ “Bi ñapan ñañ pikayning giyak gok kumbay ak mey; biyn amiymıñay ak poñind, andkind miñmon Yisrel amninin angak.” ²¹ Angek, Josep biyn amiymıñay ak poñind, andkind Yisrel amnak. ²² Pen amjakek, minim bap angyak, “Herot kumek, ñinuk Akeleyas, Jiwdiya biynimb kuyip kond mindip angyak.” Angeyak Josep nuk Akeleyas mindip ak yergiy miñmon kun ak amnim angyiy pirikak ak pen, kiniy wisin niñak: Gor nup angak, “Jiwdiya propens ma andkind amninin; Galiyliy propens amninin angak.” ²³ Angek, Josep Jiysis amiymıñay kuyip poñind am miñmon Nasaret mindyngip. Amnak kun ak, bi Gor minim angedep gok giningamb angyiy tikyak rek nep gak. Kiyk angyak, “Nup bi Nasaret nimb angningambay angyak.”

3

*Jon Bi Ñing Pikñemb Ak Minim Anğñak
(Mak 1:2-8; Luk 3:1-18; Jon 1:19-28)*

¹ Nasaret mindeyak ñin namb kun ak, Jon bi ñing pikñemb ap Jiwdiya miñmon nep namb okok mindiy, biynimb gok kuyip Gor minim tep ak anğñiyngip. ² Kuyip anğñiy angyngip, “Mañ

mindip; Gor biynimb diy kond mindeningamb ak mey; tap siy tap timey gipim ak yenen kun gipun angyi kirgiy, Gor nup nep gosimb niñnimimb angyingip.”³ Jon angak kun ak, bi Gor minim angep Asaya wosrey giningamb angyi tikak rek nep gak. Asaya minim kun ak tikiy angak, “Bi bap biynimb kuñay ma mindpay namb okok suk yomb angyi angningamb, ‘Per biyomb ak asaw angyi, biynimb gok kinjeñ pindrep giy, kond mindey opay. Kun ak rek, nimb Biyomb ak asaw angyi, tap siy tap timey gipim ak kirgiy, nup kond mindenimimb angningamb,’ angak.”

⁴ Pen Jon nuk kanj kamel kas diy giyak chech ak ay, ler ak namb ak pimbrikyingip. Tap nuk ñimbyingip ak; joñ golbind ak sek, bum ñiñg ak sek. ⁵ Ñin kun ak, Jerusalem biynimb diy, Jiwdiya miñmon namb okok mañgiysek diy, Joden ñiñg mañ okok mindeyak gok diy, Jon mindek ak apiy, ⁶ tap siy tap timey giyak gok angy yikyakniñ, kuyip Joden ñiñg namb ak ñiñg pikñak.

⁷ Pen Peresiy biynimb gok sek, Sanjiwsiy biynimb gok sek kuñaynep, Jon chinup ñiñg pikñan angyi apeyak, kuyip angy giy angak, “Nimb siyñ saraw ñapan guniy! Yerip gos ak niñiy pirik opim? Ñiñg pikon, Gor biynimb gunap kuyip angy giningamb ñin ak, chinup ma angy giningamb angyi, pirik opim?” ⁸ Ñiñg pikniñg, tap siy tap timey gipim ak kirgiy, mindrep gem mey, Gor nup gosimb niñbay angyi, nimbip ñiñg pikñinim. ⁹ Pen nimb gos bap niñiy; chin basind yes Ebrahim ñapan nuk mindpun angyi ma angnimimb. Ebrahim ñapan nuk apim ak tap yikop! Gor

kamb guniy diy, Ebrahim ñapan nuk gok gayning gaypikop!

¹⁰ “Niñrep ginimimb! Gor mon ak junj sek timbjiwning, tiw ak mamb giy mindip. Mon siñok, manjiy ñiñemb tep gunap ma piyip gok, timbek amek, di mon yinjav ak yokningamb.

¹¹ Nimb tap siy tap timey gipim ak yenen kun gipun anjiy kirgiy, Gor nup gosimb niñem mey, nimbip ñiñg pikñimbiyn. Pen Bi kisen winingamb ak biyomb yimb: yand bi yikop. Tomb tirup nup tungasikying tap nup gok marik ginim rek ma ayip; yip nambin gip. Yand nimbip yikop ñiñg pikñimbiyn; Bi kun ak apiy, nimbip Gor Kawnan ak sek, mon manlan rek ak sek ñiñingamb.

¹² “Nuk wiyt manjiy pik gek gipay rek ak gining gisap. Wiyt manjiy tep ak key ay, day day ak key ay giningamb. Kun giy, wiyt manjiy tep gok dam korip miñgan ayingamb; day day gok dam mon per yin mindip ak yokningamb angak.”

*Jon Jiysis Nup Ñiñg Pikñak
(Mak 1:9-11; Luk 3:21-22)*

¹³ Ñin kun ak, Jiysis Jon yip ñiñg pikñan anjiy, miñmon Galiyliy kirgiy, Joden ñiñg mindek ak amiy, ¹⁴ angak, ‘Yip ñiñg pikñan.’ Angek Jon angak “Nand nep mey, yip ñiñg pikñimbinap. Pen yand nip yergiy ñiñg pikñinim?”

¹⁵ Angek Jiysis angak, “Nand aspan ak kirgiy, yand apiyn rek gey mey, Gor anqip anqip rek nep giningambur angak.” Angek Jon “Niñind apan” anjiy, Jiysis nup ñiñg pikñak.

¹⁶ Pikñek, Jiysis ñiñg gol siñak apiy niñak: semb biyon miñgan yikiy, Gor Kawnan ak yakir kochir

rek nup ker wiñind wak. ¹⁷ Kun giy wakniñ, minim bap semb biyoñ nimb apiy angak, “Ñi kun ak, Ñi mapin yand. Nup niñen, yip tep yimb gip angak.”

4

Seytan, Jiysis Nup Gos Ñen Tap Siy Tap Timey Ginimuj Angiy Niñak
(Mak 1:12-13; Luk 4:1-13)

¹ Ñin kun ak Gor Kawnan ak, Seytan biynimb gok kuyip per gip rek, nup kunep ginimuj angiy, Jiysis nup poñind, miñmon nep namb okok amnak. ² Poñind amek, Jiysis miñmon nep namb kun okok tap ñimbiy mer; yikop nep mindek ñin nokom jiwiy, andikiy onep ar piskind ak amnak. Kun giy yikop nep mindek, nup yiwan yomb yimb ak gek, ³ Seytan apiy nup angak, “Nand Gor Ñinuk mindiy ker, kamb biy diy anğey, biret ayek ñiñan.” ⁴ Anğek Jiysis pen angak, “Baybol buk ak tikiy anğyak, ‘Biynimb gok, tap ñiñemb nep ñimbiy ma mindeniñgambay; Gor minim anğip ak niñiy mey, per mindeniñgambay anğak.’ ”

⁵ Kun anğek, Seytan Jiysis nup dand Jerusalem amiy, dam Gor anğniñep korip yiy akyoñ giyak ar ak ay anğak, ⁶ “Yand Gor Ñinuk mindpiyn angiy, pindenğ man biyañ ayan. Baybol buk ak tikiy anğyak, ‘Gor enjol nuk gok anğek, ñin kind nip ak di mindeniñgambay mey, kamb tomb nip ma piñiyningamb anğyak’ anğak.”

⁷ Anğek Jiysis anğak, “Baybol buk ak minim gunap sek tikiy anğyak, ‘Gor Biyomb ak nup ñiñloñ ay ma anğniñnimimb anğyak’ anğak.”

⁸ Angek, Seytan Jiysis nup dand dum yomb bap amiy angak, “Miñmon tep tep biyomb keykey kond mindpay guniy niñan! ⁹ Nand kongim yimiy yip lotiw geniñgamban, miñmon kun guniy nip manjiysek angninçayn angak.”

¹⁰ Angek Jiysis Seytan nup angak, “Nand key okok amnoñ! Baybol buk ak tikiy angyak, ‘Biyomb Gor nup nep angninçiy, woñg nup gok nep ginimimb angyak.’ ”

¹¹ Angek Seytan Jiysis nup kirgiy amnakniñ, enjol gunap ap Jiysis nup kond mindeyak.

Jiysis Miñmon Galiyliy Kiñiñ Giy Gor Minim Anğñak

(Mak 1:14-15; Luk 4:14-15)

¹² Ñin kun siñak, Jon bi ñiñg pikñemb ak nup kalambis ayeyak, Jiysis minim kun ak niñiy, miñmon Galiyliy amnak. ¹³ Amiy miñmon nuk Nasaret ma am mindek; am mindek miñmon Kapaniyam, Galiyliy chemb gol ak. ¹⁴ Biynimb miñmon kun okok kuyip minim tep ak anğñi mindyñgip ak mey; bi Gor minim anğep Asaya giniñgamb ançiy tikak rek nep gak. Nuk angak:

¹⁵⁻¹⁶ “Miñmon Sebyiwlán Naptalay, Galiyliy chemb pis biy sek, biynimb Jiwdá mer Joden ñiñg kind bindoñ mindpay gok sek melik ak niñniñgambay. Kisyim okok mindiy kumniñgiy rek ayniñgamb ak pen; melik yomb yimb ak niñniñgambay angak.”

¹⁷ Jiysis ñin kun ak kiñiñ giy, biynimb okok kuyip Gor minim tep ak anğñiyiñg angak, “Tap siy tap timey gipim ak yenen kun gipun ançiy kirgiy, Gor nup gosimb ak niñnimimb. Yenen

Gor biynimb diy kond mindeningamb ñin ak man yimb asaw angak.”

Jiysis Bi Omiñal Omiñal Kuyip, Yip Kondim Angak

(Mak 1:16-20; Luk 5:1-11)

¹⁸ Jiysis Galiyliy chemb gol ak apiy niñak: bi piys dep mamiyminay ak, wimben yokiy, piys derik. Bi mamiyminay kun ak, numam bap yimb nuk Enjriw; numam bap Saymon. Saymon nup ñin gunap, Piyta angyigipay. ¹⁹ Jiysis kuyip-minay niñiy angak, “Yip kindik ger mey, nirip angen, bi piys dep mer, biynimb dep omiñal ak mindeningayr angak.” ²⁰ Angek, angak rek niñiy, piys derik wimben ak kirgiy, Jiysis chirup angñirep ginimuj angiy nuk yip tangyigipiy.

²¹ Pen won bap tapin amiy niñak: Jemis yip, Jon yip, nop Sebediy yip bot miñgan ak apyonjon mindyinj, wimben ak girep geyak. ²² Jiysis niñiy kuyipminay suk angek, wimben gok kirgiy, Jiysis chirup angñirep gan angiy yip amniyak.

Jiysis Okok Tangiy Minim Angñak

(Luk 6:17-19)

²³ Jiysis miñmon Galiyliy namb okok girangyinj, Jiwda lotiw korip miñgan okok amiy; Gor biynimb diy kond mindeningamb minim tep ak, kuyip angñiyinj, biynimb tap gak gok sek, tap yerip yerip gak gok sek gek suñ ayinjip.

²⁴ Kun gek, Siyriya biynimb miñmon sikoy okok mangiysek minim kun ak niñiy, biynimb tap keykey gak gok dand apey, nuk gek suñ ayak. Biynimb kun gok, gunap yikop tap gak; gunap windin mayn apek apyap pikiy jep diyinjipay;

gunap ñin tomb kalaw gak. ²⁵ Pen Jerusalem biynimb diy, Jiwdiya biynimb diy, Joden ñiņg taw akdoņ ken mindeyak biynimb gok diy, kuņaynep Jiysis amnakniņ, kisen amniyak.

5

Jiysis Am Dum Biyoņ Mindiy, Minim Aņgñak (Luk 6:20-23)

¹ Jiysis, biynimb kuņaynep kun gok niņiy, am dum biyoņ binuk onep wimiņgan ak yip bișiņg mindyiņg, kuyip minim aņgñak.

Biynimb Miñmiñ Giniņgambay

- ² Nuk kuyip aņgñiyiņg aņgak:
- ³ “Biynimb Gor minim niņrep ma gipun aņgiy, yingeprek mindpay gok, Gor kuyip diy kond mindeniņgamb ak mey, miñmiñ giniņgiy.
- ⁴ “Biynimb siy apay gok, Gor kuyip aņgdiniņgamb ak mey, miñmiñ giniņgiy.
- ⁵ “Biynimb sayn kapkap mindpay gok, kiyk mankumb diniņgambay ak mey, miñmiñ giniņgiy.
- ⁶ “Gor biynimb tep nuk mindenjun aņgiy, niņbay gok kuyip kond mindeniņgamb ak mey; miñmiñ giniņgiy.
- ⁷ “Biynimb simb niņbay gok, Gor kuyip pen simb niņiy diniņgamb ak mey, miñmiñ giniņgiy.
- ⁸ “Biynimb Gor nup gosimb nokom niņbay gok, Gor nup niņniņgambay ak mey, miñmiñ giniņgiy.

9 “Jimñiy mindenjun angyiy gipay biynimb gok, Gor kuyip ñapan yand angningamb ak mey, miñmiñ giningiy.

10 “Biynimb suñ-tep mindey kuyip timey gipay gok, Gor kuyip diy kond mindeningamb ak mey, miñmiñ giningiy.

11 “Nimbip Jiysis biynimb nuk angyiy, gi timey giy, minim yesek angyiy anjjiweningiy, miñmiñ yimb ginimimb. 12 Bi Gor minim angep wosrey gok kuyip, ar kun ak nep giyak. Kun ak nimbip kunep giyakniñ, gos yomb ma niñnimimb; Gor chinup direp giningamb angyiy miñmiñ yimb ginimimb.

Gor Biynimb Nuk Gok Melik Tep Rek Ak Mindpay

(Mak 9:50; Luk 14:34-35)

13 “Nimb biynimb mankumb biy sol kiyk rek mindpim. Pen sol ak yindik nuk ak amdek, pisnep timey gip angyiy diyokey, tawsimbjakpay.

14 “Dawin yomb dum biyon mindiy, wey-giningiy rek ma ayningamb; misen yimb mindeningamb. Kun ak rek biynimb yand gok. Nimb biynimb gunap melik kuyip ak mindpim. 15 Lam ak dangiy tiyn miñgan okok ma aypay; biynimb niñrep giyan angyiy, ar siñbiyon tik aypay. 16 Kun ak rek, nimb mind tep gem, biynimb niñiy, Nap semb biyon mindip anup yimb ak dand araningiy.

Low Minim

17 “Nimb yip angningambim: Gor low minim, Mosis angak gok sek, bi Gor minim angep gunap angyak gok sek kirginimimb angning wip

aᅇgningambim ak pen; ak mer! Yand winik ak, bi Gor minim aᅇgep gok giningamb aᅇgiy aᅇgyak rek, maᅇgiysek ginimuᅇ aᅇgiy winik. ¹⁸ Yand nimbip niᅇind yimb apiyn. Semb biyoᅇ sek, mankumb biy sek pisnep kurginimuᅇ rek ayip ak pen; Gor minim nuk ak ma kurginingamb; perper nep mindeningamb. Minim yerip yerip aᅇgak ak, aᅇgak rek nep giningamb.

¹⁹ “Kun ak biynimb an Gor low minim ak niᅇiy, minim sikoy won bap kirsipiyn aᅇgiy, biynimb gok sisker aᅇgᅇey kirginingambay ak; Gor biynimb diy kond mindeningamb ᅇin ak, yimb kuyip apyowningamb. Pen biynimb an Gor low minim niᅇiy, niᅇrep giy, biynimb gok kuyip aᅇgᅇirep giningambay ak; Gor biynimb diy kond mindeningamb ᅇin ak, yimb kuyip ak araningamb. ²⁰ Bi Peresiy gok sek, bi low tiysa gok sek ‘Tep gipun’ apay ak pen; biynimb suᅇ-tep ma mindpay. Kiyk gipay rek nep gem amningamb ak; Gor miᅇmon tep nuk ma amningambim.

*Biynimb ᅇaᅇgep Nimb Gok Yip, Minim Aᅇg
Jimᅇiy Ay Mindenimimb
(Luk 12:57-59)*

²¹ “Wosrey nasis nasind yes gok, Gor low minim aᅇgyingipay ar ak nimb niᅇbim. Kiyk aᅇgyingipay, ‘Biynimb ma ᅇaᅇgnimimb. Biynimb bap, biynimb bap nup ᅇaᅇgayningamb ak, kor niᅇningamb aᅇgyingipay.’ ²² Minim kun ak niᅇbim ak pen, nimbip miᅇiy aᅇgᅇep giningayn. Biynimb bap, biynimb bap nup miluk niᅇningamb ak, kor giningamb. Biynimb bap, biynimb bap nup aᅇgiweningamb; Jiwda kanjsol

gok ap nan-giy, nup minim yomb anġningambay. Biynimb bap, biynimb bap nup pen anġningamb, ‘Nand bi sakiy sek yimb’ anġningamb ak, mon key yinjap miġġan ak amningamb.

²³ “Kun ak nimb tap dam Gor nup kamb bind ar ak simboġġ ñining; mam ay gunap kuyip gipik rek minim mindip anġiy, ²⁴ am kuyip minim anġrep giy apiy nep, tap kun ak Gor nup simboġġ ñinimimb.

²⁵ “Tap yerip timey giningambim ak, nimbip kor gining, dand kinjeġġnamb okok kisen amniyakniġ, kiy yip minim kun ak anġ sayn giy, jimñiy mindenimimb. Mer ak, dam biyomb kor niġep ak nup ñeningambay, nuk pen nimbip di poliys kay kuyip ñek, nimbip dam kalambis ayningambay. ²⁶ Nimbip niġind yimb apiyn: tap day nimb ak pisnep day paġġ diy rek, mis ambikip.

Biyn Siy Bi Siy Gipay

²⁷ “Pen nimb niġbim; minim bap anġyak ‘Biyn siy bi siy ma ginimimb anġyak.’ ²⁸ Pen yand nimbip aspiyn: bi bap biyn bap nup niġiy, nup dipnip anġiy gos niġningamb ak, Gor niġek bi kun ak gosimb nuk namb biyaġ, tap siy giningamb. ²⁹ Kun ak, windin maġġiy yipund pis ak niġiy, tap siy tap timey gep rek ayonimuġ, windin piskind kun ak tuġġiwyoknimimb. Pen windin nimb ak simb niġningambim ak; tap siy tap timey giy, mon key yinjap ak amnimimb rek ayip. ³⁰ Pen ñin yipund kind ak kunep, tap siy tap timey gining gonimuġ, timbrik yoknimimb. Kun giy mey, ñin piskind ak nep mindiy kim amningambim. Yikop ak, mon key yinjap ak amningambim.

³¹ “Nimb niñbim; minim bap aňgyak, ‘Bi bap biynuk nup kirginiňg, biyn biy pisnep kirsipiyn aňgiy, ñiwkil band bap tikiy biyn kun anup ñiy mey, pisnep kirginiňgamb aňgyak.’ ³² Pen yand nimbip aspiyn: bi biyn kiyk gok waň siy dey mer, yikop nep aňgyokey am bi kisen diniňgambay akan yergeniňgambay, bi kun gok minim yomb diniňgambay. Pen kisen bi biyn aňgyokniňgambay kun ak diniňgambay ak, kunep timey giniňgambay.

*Minim Niñind Yimb Apun Apay
(Mat 19:9; Mak 10:11-12; Luk 16:18)*

³³ “Wosrey minim bap aňgyak ak kunep niñbim. Minim kun ak aňgyak, ‘Gor nup tap bap giniňgayn aňgiy, aňgnimimb rek nep ginimimb; nup minim nep ma aňgnimimb aňgyak.’”
³⁴ Pen nimbip aspiyn: minim bap aňgniňg, Gor windin maňgiy ar ak niñind aspiyn aňgiy, ma aňgnimimb. Semb biyoň mindip rek, niñind apiyn aňgiy ma aňgnimimb. Ak Gor miñmon nuk yimb. ³⁵ Lum biy mindip rek niñind apiyn aňgiy ma aňgnimimb. Ak Gor miñmon sikoy nuk bap mey kun ak. Jerusalem mindip rek niñind apiyn aňgiy ma aňgnimimb. Ak Biyomb ak miñmon nuk bap mey kun ak. ³⁶ Jun won yand mindip rek, niñind apiyn aňgiy ma aňgnimimb. Nimb key gem, jun kas nimb ak, sum akan mosimb jakniňgamb? ³⁷ Kun ak, giniňgayn aňgiy, giniňgayn nep aňgnimimb. Pen ma giniňgayn aňgiy, ma giniňgayn nep aňgnimimb. Minim kilis yimb aňgjun aňgniňgambim ak, Seytan nimbip gos ñek aňgniňgambim.

³⁸ “Pen minim bap aᅇgyak, ‘Windin maᅇgiy ak piᅇiy jiweniᅇgiy, kuyip pen kunep piᅇiy jiw-nimimb. Meᅇᅇ kamb pikpaᅇᅇᅇᅇgiy, kuyip pen kunep pikpaᅇᅇnimimb aᅇgyak.’ ³⁹ Pen nimbip aspiyn: Bi bap nimbip timey gonimuᅇ, nup pen ma timey ginimimb. Bi bap nimbip mikem piksil gonimuᅇ; andikem piskind ak kunep piknimuᅇ. ⁴⁰ Nimbip kor giy, tiᅇgliys nak ak yip sanj gan aᅇgonimuᅇ, tiᅇgliys nep ma ᅇnimimb; kolsiyor ak sek ᅇnimimb. ⁴¹ Nimbip tap wand biy dam tip siᅇak yokiy wan aᅇᅇey; yiruk ma niᅇnimimb; tip aᅇᅇniᅇgiy siᅇak silgiy, yesek tip ak yokiy winimimb. ⁴² Chinup tap gunap ᅇim aᅇᅇᅇᅇgiy, monmon ᅇnimimb. Pen chinup tap gunap yikop ᅇem; kisen nimbip tip ak ᅇiniᅇᅇambun aᅇᅇᅇᅇgiy, ma kirginimimb, monmon ᅇnimimb.

Biyimb ᅇaᅇᅇep Nimb Gok Kuyip Wasemb Aynimimb

(Luk 6:27-28, 32-36)

⁴³ “Minim bap aᅇgyak, ‘Buᅇgiy nimb gok kuyip wasemb aynimimb; biynimb penpen ᅇaᅇᅇep nimb gok kuyip miluk niᅇnimimb aᅇgyak.’ ⁴⁴ Pen nimbip aspiyn: Biynimb penpen ᅇaᅇᅇep nimb gok kuyip wasemb ay; biynimb nimbip gi timey gipay gok Gor nup aᅇᅇniᅇem kuyip kond mindonimuᅇ.

⁴⁵ “Kun giniᅇᅇambim ak, Nap semb biyoᅇ ᅇapan nuk yimb mindiy mey, kun giniᅇᅇambim. Nuk biynimb mindrep gipay gok sek, biynimb mindrep ma gipay gok sek simb niᅇimb rek, gek pumb niᅇiy miᅇmon pikiy tap woᅇᅇ kuyip gok jakip.

⁴⁶ Biynimb nimbip wasemb aypay gok nep kuyip

direp giniᅅgambim ak; bi takes dipay gok gipay rek nep giniᅅgambim. Kun ak Gor nup yergiy tep gek, nimbip kond mindrep giniᅅgamb. ⁴⁷ Bunᅅiy nimb gok kuyip nep ñin piksakniᅅgambim ak, biynimb Gor nup gosimb ma niᅅbay gok gipay rek nep giniᅅgambim. Kun gem, Gor nup yergiy tep giniᅅgamb?

⁴⁸ “Kun ak Nap semb biyoᅅ mindrep yimb gip rek, nimb kunep ginimimb.

6

Biynimb Gok Kuyip Tap Monmon Ñinimimb

¹ “Pen nimb biynimb windin yirik ar ak nep mindrep ginjun aᅅiy, gem amniᅅgamb ak; Gor nimbip yergiy direp giniᅅgamb. ² Biynimb Gor nup gosimb niᅅbun aᅅiy tom nep gipay gok, gipay rek ma ginimimb. Kiyk biynimb simbgeprek gok kuyip maniy ñiniᅅ nan-gep korip biynimb kuᅅay mindpay namb ak akaᅅ, kinjeᅅ yomb okok nep ñimbay. Yimb yomb dun aᅅiy gipay kun ak, Gor kuyip direp ginimuᅅ rek ma ayip.

³ “Pen nimb biynimb simbgeprek gok kuyip tap ñiniᅅ, misenᅅ ma ñinimimb; ⁴ kapkap weyᅅiy ñinimimb. Tap weyᅅiy gipun gok Bapiy Gor niᅅimb ak mey, giniᅅgambim kun ak niᅅiy, nimbip direp giniᅅgamb.

Gor Nup Kun Giy Aᅅniᅅep

(Luk 11:2-4)

⁵ “Nimb Gor nup aᅅniᅅniᅅ, biynimb yesek gunap gipay rek ma ginimimb. Kiyk biynimb gunap chinup niᅅey yimb yomb diniᅅgambun aᅅiy, am lotiw korip namb ak mindiy akaᅅ,

am kinjenram okok mindiy, Gor nup angninbay. Yimb yomb dining gipay kun ak, Gor minim kuyip ak ma ninningamb. ⁶ Kun ak nimb Gor nup angninning; korip niluk mingan ak amiy, kinjen giñiy, Bapiy nup angninmimb. Tap kapkap gipim ak mangiysek ninimb rek, minim kun ak niniy, angninngambim rek giningamb.

⁷ “Biynimb Gor minim ma ninbay gok, nup angninning, minim paryomb yimb apay. Gos kiyk ak minim paryomb angon mey ninningamb apay!

⁸ Pen nimb kun ak rek ma ginimimb. Minim yerip Gor nup angninning gipim gok, nuk nind ninimb.

⁹ Nup angninning, kun giy angnimimb:

‘Bapiy yomb semb biyon; yimb nand yiy ar biyon mindip. ¹⁰ Nand chinup diy kond mindenimin; semb biyon angek ninbay rek ak, chinup gey kun ak rek ninjun. ¹¹ Chinup tap ninemb minek minek ñimbun rek ak ñinimin. ¹² Biynimb gunap chinup timey gey niniy kirpun rek, tap siy tap timey chin gipun gok niniy kirginimin. ¹³ Chin yikop mindiy, tap siy tap timey giningambun rek ayip ak; chinup kond mindey, timey ma ginjun.’

¹⁴ “Pen biynimb gunap nimbip timey gey, niniy kirgeningambim; Gor tap siy tap timey nimb giningambim gok niniy kirginingamb. ¹⁵ Pen nimb niniy ma kirginingambim ak, Gor pen tap siy tap timey nimb giningambim gok niniy ma kirginingamb.

Tap Bul Gipay

16 “Nimb tap ñiñemb kirginiñg, biynimb yesek gok per gipay rek, ma ginimimb. Kiyk apay, miluk mer mer mindon, biynimb niñiy añgñingambay, Gor nup gosimb niñiy, tap ñiñemb kirgiy mey, miluk mer mer mindpay añgñingambay. Nimbip niñind yimb aspiyn: biynimb chinup niñyanñ anggiy giniñgambay kun gok, yimb kuyip dand araniñgambay ak pen, Gor kuyip direp ma giniñgamb. 17 Nimb pen tap ñiñemb gok kirginiñg ginimimb ak; miluk mer mer ma mindenimimb. Ñiñg pik tep giy, wel ay, kom giy mindenimimb. 18 Kun geniñgambim, biynimb gunap nimbip tap keñmañgiy bul gipay anggiy, ma niñniñgambay; Gor nep tap weygiy gipun gok mañgiyseki niñimb rek, nimbip niñiy direp giniñgamb.

Am Gor Yip Mindenjun Angiy Niñyiñg Mindenimimb

(Luk 12:32-34)

19 “Pen man ar biy tap tep tep gok di nan-ginjun anggiy gos ak ma niñnimimb. Tap kun gok nan-geniñgambim; bi siydep apiy siy diniñgambay akan; simbsis giy, siplep siwiy giniñgamb. 20 Kun ak tap tep nimb rek gok semb biyoñ nan-gem; simbsis ma ginimuñ, siplep ma siwnimuñ, siy ma diniñgiy, mindnep mindonimuñ. 21 Tap tep nimb gok man ar biy di nan-geniñgambim, gos nimb ak mindeniñgamb man ar biy; semb ar biyoñ nan-geniñgambim; gos nimb ak amniñgamb kun biyoñ.

22 “Windin mañgiy chin ak mey, lam rek mindip. Windin mañgiy ak tep mindek; melik

tep gamb niñrep gipun. ²³ Pen timey gek; kisyim apek ma niñbun. Biynimb melik ma niñbay gok, kisyimnamb okok mindpay.

Gor Yip, Maniy Tap Gok Yip

²⁴ “Bi nokom bap, biyomb ominal wong giñnimuñ rek ma ayip. Yenen: biyomb bap nup niñek tep geniñgamb, bap nup kirginiñgamb: akan bap nup niñek tep geniñgamb, bap nup kirginiñgamb. Kun ak rek, nimb maniy tap tep lum ar biy mindip gok niñem tep gek, Gor nup kirginiñgambim rek ayip ak; niñrep ginimimb.

*Gos Yomb Ma Niñnimimb
(Luk 12:22-31)*

²⁵ “Ar kun ak mey nimbip aspiyn: tap yerip ñimbiy mindenjun; chech akay nimb ay mindenjun angyi, gos yomb ak ma niñnimimb. Gor nimbip gayek mindpim ak; tap sikoy kun gok ma ñiniñgamb? ²⁶ Nimb niñbim: yakir gok tap yin ma yimbay; wiyt, rays, tap gok ma tik dap nangipay. Bapiy semb biyon ak kuyip kond mindek tap ñimbay. Yakir tap yikop ak tap ñek ñimbay; nimbip kunep giniñgamb. ²⁷ Akan, gosimb kuñay niñiy mey, tapin mindiy kumniñgambun angyi niñbim?

²⁸ “Pen yenen chech tap gok gos kuñay niñbim? Tap key jakip gok, chech napnap tap gok giniñgiy rek ma ayip ak pen, sumsum teprep yimb gok mindip. ²⁹ Kiyñ Solomon tap kuñay mindek ak pen; mokyan tep kun gok rek ma gak. ³⁰ Tap kaskas ak tap yikop. Per mindiy mer; miñiy rek mindiy, toy rek danjiypay. Pen Gor tap yikop

kun gok gay mokyan giñimb ak, yenen chinup ma kond mindeningamb angyi niñbim?

³¹ “Kun ak ñiñg akay ñiñjun; tap yerip ñiñjun; chech akay nimb ayjun angyi, gos yomb ak ma niñnimimb. ³² Biynimb Gor minim ma niñbay gok, tap kun gok dun angyi gos yomb kun ak rek niñbay. Pen nimb niñbim: Bapiy chin semb biyon mindip ak tap nimb yerip tikdip ak niñimb. ³³ Kun ak, Gor biynimb gunap diy kond mindeningamb ak, chinup sek dek biynimb suñ-tep nuk gok mindonjun angyi, nup gos nokom niñiy gem amek mey; tap yikop kun gok diningambim. ³⁴ Kun ak toy yergiy mindenjun angyi gos yomb ak ma niñnimimb; Gor nimbip minek minek nep kond mindip.

7

Biynimb Gunap Kuyip Kun Gipim Kun Gipim Ma Angnimimb

(Luk 6:37-38, 41-42)

¹ “Chin biynimb tep angyi, biynimb gunap kuyip gos timey niñningambim ak, minim kun ak andkind nimbip ker winingamb. ² Kun ak niñrep ginimimb. Nimb biynimb gunap kuyip giningambim rek, Gor nimbip pen kun ak rek giningamb. ³ Mon bopis windin nimbip pik yiwgiy mindip ak, yenen niñangiy mer, namam tap achip mindip ak nup niñapim? ⁴⁻⁵ Mon bopis yomb windin nimbip pik yiwgiy mindip kun ak diyokiy, windin niñrep giy rek, namam tap achip mindip ak nup, diyokan angyi apim.

⁶ “Gor tap suŋ-tep nuk gok, kayn ayndik gok kuyip ma moknimimb; kumbap milip gok kanj sakiy mindeniŋgiy kiñiŋ sinak monmon ma ginimimb. Kun giy monmon gem; kiyk tawpaŋg pikey amek, andkind apiy nimbip siwningambay.

*Gor Nup Anŋniŋgambim Rek Nep Giniŋgamb
(Luk 11:9-13)*

⁷ “Tap yerip tikdonimuŋ, Gor nup anŋniŋem nimbip ñiniŋgamb. Pen tap gunap piyow niŋiy niŋniŋgambim. Kinjeŋ yikan anŋiy pik giy-giw gem, nimbip yikniŋgamb. ⁸ Biynimb nup anŋniŋbay gok, anŋniŋbay rek gip. Tap piyow niŋbay ak kuyip ñimb. Kinjeŋ ak yikan anŋiy pik giygiw gey, apay rek niŋiy yikip. ⁹ Nimb bi ñapan sek gok, ñapan nimb bap biret nen anŋek, kamb bap di ñimbikip? ¹⁰ Akan pen, piys nen anŋek, siyŋ bap ñimbikip? Ak kun ma gipkip. ¹¹ Nimb biynimb tep mer ak pen; ñapan nimb gok, kuyip tap tep gok nep ñimbim. Bapiy semb biyoŋ, bi tep yimb ak, nimbip yesek ar ak ma giniŋgamb; nimbip tep giniŋgamb ar ak nep giniŋgamb.

¹² “Pen biynimb gunap, chinup kun giyaŋ anŋiy niŋbim rek nep, biynimb gok kuyip ginimimb. Gor low minim Mosis tikayak ak sek, bi Gor minim anŋep gunap tikayak ak sek kiñiŋ mey kun ak.

*Kinjeŋ Achimb Diy Amiy Perper Mindeniŋgambay Ak
(Luk 13:24)*

¹³⁻¹⁴ “Mon key yinŋap kinjeŋ yomb ak; misen niŋiy amrep gipay. Biynimb kuŋaynep miŋgan

kun ak ambay. Kun ak nimb niñrep giy, permindep kinjen sikoy ak diy amnimimb. Kinjen sikoy kun ak kosyam tapay. Biynimb nokom nokom nep, kinjen sikoy par kun ak piyow niñiy ambay.

Gor Minim Yesek Anğñiningambay Rek Ayip Ak Niñrep Ginimimb

(Luk 6:43-46; Luk 13:25-27)

¹⁵ “Pen biynimb Gor minim aspun anğiy yesek apay gok, kanj siypsiyp sayn tep rek silok ay wiñgambay ak pen; ap mindyñg kayn ayndik biynimb siw ayip rek ak nimbip giniñgambay.

¹⁶ Kun ak miñ giniñgambay ak niñiy, kiyk biynimb yerip rek mindpay ak niñrep giniñgambim. Nimb niñbim: Miñ ñiwñiw sek yikop gok, tap mañgiy ñiñemb ma piyñgamb. Mon gok kunep giniñgamb. ¹⁷⁻¹⁸ Mon ñiñemb bind gok, mañgiy ma ñiñemb gok ma piyñgamb. Mon mañgiy ma ñiñemb bind gok ñiñemb gok ma piyñgamb.

¹⁹ Pen mon bind mañgiy tep ma piyñgamb gok, timb dam mon yinjap ak yokniñgambay. ²⁰ Kun ak miñ giniñgambay ar ak niñiy, biynimb gok tep, biynimb gok timey anğiy niñniñgambim.

²¹ “Biynimb yip Biyomb chin, Biyomb chin, apay gok Gor kuyip mañgiyseki diy kond mindeniñgamb anğiy ma anğnimimb. Bapiy semb biyoñ anğip rek gipay gok nep kuyip diy kond mindeniñgamb. ²² Nin kisen ak apek, biynimb kuñaynep yip anğniñgambay, ‘Biyomb chin mey nand nep. Minim tep woñg nip ak ginuk. Yimb nip nep anğiy, tap biynimb ambañ ayak gok anğyokiy, tap mageprek gok giy ginuk anğniñgambay.’ ²³ Yip kun anğniñgambay ak

pen, kuyip angninḡayn, ‘Nimbik biynimb yand mer: timey nep gipim! Key okok amnimimb angninḡayn.’

Bi Omiḡal Korip Girik

(Luk 6:47-49)

²⁴⁻²⁵ “Bi gos niḡep yimb bap, korip nuk ak giniḡ, kamb ar ak gak. Kisen yinḡen yomb diy, miḡmon yomb pikiy, ḡniḡ wilik apiy gak ak pen, korip nup ak ma pikjiw dand amnak. Kun ak rek mey, biynimb minim yip niḡiy dipay gok.

²⁶⁻²⁷ “Pen bi gos niḡrep ma gak bap, korip nuk ak giniḡ lum sayn ar siḡak gak. Kisen yinḡen yomb diy, miḡmon yomb pikiy, ḡniḡ wilik apiy, korip nup ak pisnep pikjiw dand amnak. Kun ak rek mey, biynimb minim yip niḡiy kirpay gok anḡak.”

²⁸⁻²⁹ Jiysis minim kun ak anḡjiwakniḡ, biynimb kuḡaynep ap mindeyak gok wal anḡiy anḡyak, “Bi low tiysa chin gok apay rek ma anḡip; nuk bi minim niḡrep yimb giy anḡip anḡyak.”

8

Jiysis Bi Soy Ayndik Ayak Ak Gek Suḡ Ayak

(Mak 1:40-44; Luk 5:12-14; Luk 13:25-27)

¹ Jiysis dum biyoḡ mindek ak kirgiy, mak biyan apyowakniḡ, biynimb kuḡaynep kisen giyak.

² Pen bi soy ayndik ayak bap, Jiysis mindek maḡ siḡak amiy, koḡgim yimiy, jiy kuyangiḡ anḡak, “Biyomb. Nand yip gey suḡ ayniḡ, gey suḡ ayniḡamb anḡak.” ³ Kun anḡek, Jiysis nup diniḡiḡ, “Nip suḡ ayanḡ anḡak.” Anḡek, won

kun anep suḡ ayakniḡ anḡak, ⁴ “Nip gen suḡ ayip

kun ak, biynimb gunap kuyip ma angninimin. Am bi Gor nup simbonjep gok kuyip nep yomiy, ‘Yip sun ayip angnimin!’ Kun angyi, Mosis angak rek, yakir dam Gor nup pik simbonj ninimin. Kun geningamban, biynimb gok ninij, nup sun ayip ak mey kun gisap angningambay angak.”

Bi Amiybi Yomb Ak Nup Wong Giñiyingip Ak Jiysis Gek Sun Ayak
(Luk 7:1-10)

⁵ Jiysis miñmon Kapaniyam amnaknij, amiybi gok kuyip kond mindyingip biyomb bap ap Jiysis nup angak, ⁶ “Bi yip wong gip anup tap yomb giy, yiwur nembnemb gek, kawin kaskas ma giy; korip ak kum mindip angak.” ⁷ Angek Jiysis angak, “Am nup gen sun ayingamb.” ⁸⁻⁹ Angek amiy biyomb kun ak angak, “Ninjind apan ak pen, yand bi tep rek korip yip ak amninimin. Yand ninbiyn ak, amiy biyomb gunap yip kond mindey, yand pen amiybi gunap kuyip kond mindiy; amnimimb anjen, ambay sek; winimimb anjen, opay sek. Bi yip wong gip ak nup, wong gok kun kun giy ginimin anjen gip angak.” ¹⁰ Kun angek, Jiysis gos kuñay yimb ninij, biynimb kisen ameyak gok kuyip angak, “Bi kun biy par okok nimb ak pen, Gor gip rek ninrep yimb giy kun anjip. Bi chin Yisrel nimb bap, Gor nup gosimb ninij anjip kun ak rek anjey, yand ma ninjik. ¹¹ Kisen biynimb par okok nimb gok, Ebrahim, Aysek, Jekop biriwin yip Gor biynimb diy kond mindeningamb namb ak amiy; miñmiñ giying mindeningambay ak pen; ¹² biynimb chin Yisrel nimb gok, am namb kun ak ma mindeningambay

rek ayip. Gor kuyip angyokeningamb, am mindeningambay mis kisyim owip ar biyan angak.”
¹³ Jiysis kun angyi, amiy biyomb kun anup angak, “Nandkaw amnon! Apan rek nep giningamb angak.” Kun angek, korip amiy ninak: binuk tap gak ak, Jiysis angak won kun ak nep suŋ ayak.

Jiysis Piyta Numok Nup Gek Suŋ Ayak

¹⁴ Pen Jiysis Piyta korip amiy ninak; Piyta numok nup mumbwak okok mon rek yinek kum mindek. ¹⁵ Ninjiy am dinijek, won anep suŋ ayek tikjakiy, Jiysis binuk gok yip kuyip tap keñmanjiy gayrep gak.

*Jiysis Biynimb Kuŋaynep Gek Suŋ Ayak
 (Mak 1:29-34; Luk 4:38-41)*

¹⁶ Dunjep won ak, biynimb kichekiy amban ayak gok sek, biynimb tap gak gok sek dand Jiysis mindek ak apeyak, nuk kichekiy gok anŋ mis yokiy, biynimb tap gak gok gek suŋ ayak. ¹⁷ Nuk gak kun ak, bi Gor minim anjep Asaya, nind giningamb angyi tikak rek nep gak. Nuk tikiy angak:

“Tap chinup gip gok gek suŋ ayingamb. Tap yerip yerip chinup timey gip gok angyokek mind tep giningambun angak.”

*Yand Yip Tangoningambur Angak
 (Luk 9:57-62)*

¹⁸ Jiysis biynimb kuŋaynep ap nup pinjiy kus kus geyak ninjiy, binuk gok kuyip angak, “Niŋg chemb kind bindon amnun angak.” ¹⁹ Kun angakniŋ, bi low tiysa bap apiy nup angak, “Tiysa. Nand miñmon akay amningamban ak, yand yip

nep amningambur.” ²⁰ Angek Jiysis angak, “Yakir gok, tip kiyk kinbay ak mindip. Kayn sakiy gok, man miŋgan okok kinbay; pen Bi bap Ñinuk kinimur miŋgan ak ma mindip angak.”

²¹ Pen bi Jiysis minim niŋyngip bap angak, “Yand nand yip amjur ak pen, yip yaw angey, bapiy nup kumek komiy, nand yip giranjonjur.”

²² Angek, Jiysis angak, “Bi yip gosimb ma niŋbay gunap kumeniŋgiy, bi yip ma niŋbay gunap dam komniŋgiy; nand apey yand yip tanjonjur angak.”

Jiysis Angek Yiŋgen Yomb Ak Kirgak

(Mak 4:36-41; Luk 8:22-25)

²³ Jiysis bot diy amniŋgek, binuk gok yip san diyak. ²⁴ Ñiŋ namb siŋak amniyakniŋ, day yiŋgen yomb sikerek ak diy, ñiŋ pang apiy, bot ak tuŋgandikniŋ rek gak. Pen Jiysis nuk kinek rek, ²⁵ binuk gok am nup angey tikjakek angyak, “Biyomb! Yiŋgen yomb ak chinup tuŋgandikek ñiŋ ñinjun rek ayip ak, angey kirgan angyak.”

²⁶ Angeyak kuyip angak, “Yenen piriksipim? Gor nup gosimb ak ma niŋbim rek ayip!” Kun angyi tikjakiy, yiŋgen dek ak angek kirgiy, ñiŋ pang apek ak wilekiy gak. ²⁷ Kun gek, kiyk gos kuŋay niŋiy, “Biyomb biy yergiy angek, yiŋgen ak kirgiy, ñiŋ pang apamb ak kirgiy gip angyak.”

Bi Malñiluk Sek Omiŋal Ak Jiysis Gek Bi Yimb Ayrik

(Mak 5:1-17; Luk 8:26-37)

²⁸ Jiysis ñiŋ tikiy, miñmon Gadara pis bindon amjakakniŋ, bi sakiy kichekiy ambaŋ ayak

omiñal ak, chip komyiñgipay kamb miñgan okok nimb apchakrik. Bi omiñal kun ak kuyip kichekiy ambañ ayak rek, bi kilis yimb mindyiñgipiy. Biynimb bap mindyiñgipiy kinjen tam kun ak ma amyñgipay. ²⁹ Pen kiyk omiñal apchakiy, Jiysis nup añgrik, “Gor Ñinuk! Chirup yergining aswan? Ñin nand chinup añg miñmon timey yokniñgamban ak ma wip añgrik.”

³⁰ Pen won kun ak, kanj kuñaynep amil ñimbeyak yep gol kun siñak ak mey, ³¹ kichekiy bi omiñal kun ak kuyip abañ ayak gok, Jiysis nup nembnemb giyiñg añgyak, “Chinup añgyokniñg ginimin ak, añgey am kanj mindpay gindon kuyip molik sikun añgyak.”

³² Añgeyak, amnim añgek, bi omiñal kun ak kuyip kirgiy, am kanj gok kuyip molik sikeyak; kanj gok pirik miñmon mindun pis okok amiy, gindam ñiñg mañgiy chemb biyañ pikiy, ñiñg ñimbiy mañgiysekkumdiyak.

³³ Pen bi kanj mokiñgipay gok gak kun ak niñiy, kasek miñmon dawin yomb ak amiy, Jiysis yerer gak minim ak, biynimb okok kuyip añgñiyak. ³⁴ Añgñeyak kiyk mañgiysekkumdiyak Jiysis nup niñun añgiy, ap nup niñiy, nembnemb giyiñg añgyak, “Miñmon chinup biy kirgiy, key okok amnon añgyak.”

9

*Jiysis Bi Ñin Tomb Kalaw Gak Ak Gek Suñ Ayak
(Mak 2:1-12; Luk 5:17-26)*

¹ Jiysis tip ak bot diy, ñiñg tikiy miñmon nuk kind bindon amnak. ² Pen biynimb gunap, bi

ñin tomb kalaw gak bap Jiysis gek suñ ayniᅅgamb aᅅgiy yirar ay dand mindek ak wiyak. Pen Jiysis gek suñ ayniᅅgamb aᅅgiy niᅅyak rek, bi ñin tomb kalaw gak kun ak nup aᅅgak, “Ñiyand. Gos sek mindenimin. Tap timey gipan gach ak miñiy niᅅiy kirsipiyn aᅅgak.” ³ Aᅅgek bi low tiysa gok, gunap aᅅgyak, “Bi biy Gor nup aᅅjiwyiᅅg asap aᅅgyak.” ⁴ Pen Jiysis gos niᅅyak kun ak key niᅅiy aᅅgak, “Nimb yenen yip gos timey niᅅiy kun aspim? ⁵ Nup tap timey gipan gach ak wiykyokpiyn aᅅgen, nimbip tep giniᅅgamb akan, tikjakiy amnon aᅅgen, nimbip tep giniᅅgamb? Akan minim yerip ak aᅅgen, nimbip tep giniᅅgamb? ⁶ Nimb niᅅbim. Yand Bapiy minim nup ak diy mey, man ar biy apiy, tap siy tap timey gipay gach ak wiykyokpiyn aᅅgak.” Jiysis kun aᅅgiy, bi ñin tomb kalaw gak anup aᅅgak, “Tikjakiy, minj nak ak diy, dand korip amnon!” ⁷ Aᅅgek tikjakiy minj band ak dand korip nuk amek, ⁸ biy nimb gok niᅅiy, aᅅgyak, “Bi man ar biy nimb bap kun ak rek gek ma niᅅnuk;” nuk Gor nep aᅅgek ap gisap aᅅgiy, gos kuᅅay niᅅiy, yimb nup ak dand araniyak.

Jiysis Binuk Matyiw Nup Dak

⁹ Jiysis miñmon kun ak kirgiy, wikan bap amiy niᅅak: bi takes dep ak, wong giyiᅅgip opiys miᅅgan ak bisinᅅ mindek. Bi kun ak yimb nuk Matyiw. Jiysis nup niᅅiy aᅅgak, “Yip kondan.” Aᅅgek, nup kondak.

¹⁰ Pen bi takes dep gok diy, bi tap timey giyak gok diy, Jiysis binuk gok sek ap Matyiw korip ak tap niᅅyak. ¹¹ Ñimbeyak, bi Peresiy gok niᅅiy,

Jiysis binuk gok kuyip angyak, “Tiysa nimb ak yenen, bi takes dep gok sek, bi tap siy tap timey gipay gok sek yip jimñiy tap ñinimb?” ¹² Angeyak, Jiysis minim kun ak ninjy angak, “Biynimb tap ma gip gok, dokta niñning ma ambay; biynimb tap gip gok nep dokta niñning ambay. ¹³ Pen Gor minim bap angak ak junj ak niñrep giy, niñyng mindenimimb. Nuk angak, ‘Yip tap simbong ñem, tep ma giniñgamb; biynimb gok simb niñeniñgambim, yip tep giniñgamb angak.’ Pen yand winik ak, biynimb suñ-tep gunap piyow niñning ma winik; biynimb tap siy tap timey gipay gok diyn angyiy winik angak.”

Tap Bul Gep

(Mak 2:18-22; Luk 5:33-39)

¹⁴ Ñin bap, Jon bi ñiñg pikñemb ak binuk gok Jiysis mindek ak apiy angyak, “Chin yip bi Peresiy gok yip, ñin gunap Gor nup nep gos niñun angyiy, tap ma ñimbun. Pen bi nand gok yenen kunep ma gipay?”

¹⁵ Angeyak, Jiysis kuyip angak, “Biynimb gok, biyomb kiyk ak yip mindeniñgambay ñin ak, miñmiñ giy tap niñniñgambay; pen biyomb anup ñanğ pikayniñgambay ñin anep, simb gek tap bul giy ma niñniñgambay angak.”

¹⁶ Pen Jiysis nind giyñgipay ar ak key, miñiy angen giniñgambay ar ak key angyiy, kuyip minim bap paydoñ ay angak, “Chech kim ak diy, chech wor ay puñgrikniñgamb tam ak ma ñanğdiniñgambay. Yenen: kun giy yim tanğey, tam yomb sikerek ak puñgrikniñgamb. ¹⁷ Pen ñiñg wayn ak kunep; wayn kisenimb ak giy,

di meymey wak milip miŋgan ak ma paŋg ayniŋgambay. Yenen: kun geniŋgambay, ñiŋg wayn kim ak taniy, biŋ yimb aŋgiy, meymey wak ak puŋgrikiy, songniŋgamb. Kun ak ñiŋg wayn kim ak diy, meymey wak kim nimb miŋgan ak dayey nep mey, tep giniŋgamb aŋgak.”

Biyŋ Bap Sek, Paskoy Bap Sek Suŋ Ayak
(Mak 5:22-43; Luk 8:41-56)

¹⁸ Jiysis minim kun ak aŋgakniŋ, Jiwda biyomb bap mindek siŋak ap koŋgim yimiy aŋgak, “Pañ yand ak pisnep kumimb ak pen, nand am nup diniŋey, tikjaknimuŋ aŋgak.” ¹⁹ Aŋgek, Jiysis binuk gok yip tikjakiy, bi kun ak yip amniyak.

²⁰⁻²¹ Pen biyŋ bap nup, biyŋ kinjeŋ pandikakniŋ mindek, simiy yin ayak wimiŋgan ak. Kun gek gos nuk anep niŋiy Jiysis chech paryomb nup gol okok nep diniŋen yip suŋ ayniŋgamb aŋgiy, Jiysis amnakniŋ kund okok ken amiy, chech nup ak diniŋak. ²² Diniŋek, Jiysis tuŋgandikiy biyŋ kun ak nup niŋiy aŋgak, “Yip gosimb niŋban rek, nip gen suŋ ayip. Gos sek mindenimin aŋgak.” Aŋgek, tap nup giyiŋgip ak won kun ak nep suŋ ayak.

²³ Pen Jiysis am am, biyomb korip ak amjakiy niŋak: biykul puŋgyiŋg, minim kilpul yomb yimb aŋgeyak. ²⁴ Niŋiy kuyip aŋgak, “Key okok amnim! Pañ biy ma kumimb; yikop wisin kinjap aŋgak.” Kun aŋgek nup sik aŋgeyak, ²⁵ kuyip aŋg mis yokiy, korip ñiluk miŋgan biyaŋ amiy pañ kumak anup, ñin kind ak dek, tikjakak. ²⁶ Kun gek minim kun ak yiŋg dand miñmon okok maŋgiysek amniyak.

Jiysis Bi Windin Koy Gak Omiŋal Ak Gek Suŋ Ayak

²⁷ Pen Jiysis miñmon kun ak kirgiy amnakniŋ, bi windin koy gak omiŋal ak nup kisen giying suk angying angrik, “Depiyt Niñuk! Chirup simb niñnimin angrik.” ²⁸ Kun angerik, Jiysis nuk korip kinak miŋgan ak amnakniŋ, bi omiŋal kun ak apiy korip miŋgan amer, kuyipmiŋay angak, “Nirmiŋay, chirup gek suŋ ayaŋ angyi, yip aspiyr?” Angek angrik, “Yaw! Chir niñbur, nand chirup geniŋgamban suŋ ayniŋgamb angrik.” ²⁹ Angerik Jiysis windin kuyipmiŋay ak diniŋiy angak, “Yip gosimb niñbiyr ak, apiyr rek ginimuŋ.” ³⁰ Angek windin kuyipmiŋay ak suŋ ayek niñrikniŋ, kuyipmiŋay angrep giy angak, “Jiysis gamb chirup suŋ ayip angyi ma angnimiyr angak.” ³¹ Kun angak ak pen; kiykmiŋay amiy biynimb miñmon namb kun ak maŋgiysek anğñirik.

Bi Minim Ma Angyingip Bap Tip Ak Minim Angak

³² Pen kiymiŋay amnirikniŋ, biynimb gunap, bi tap aban ayek minim angep rek ma ayak bap, dand Jiysis mindek ak apeyak, ³³ tap nup amban ayak kun ak angyokek, minim angak. Kun gek, biynimb gok wal angyi angyak, “Miñmon Yisrel biy, bi bap kun ak rek gek ma niñnuk angyak.” ³⁴ Pen bi Peresiy gok angyak, “Nuk kichekiy malñiluk tap gok nop kiyk Seytan kilis ak diy mey, kun gisap angyak.”

Jiysis Biynimb Gok Kuyip Simb Niñak

³⁵ Pen Jiysis nuk, dawin sikoy okok sek, dawin yomb okok sek giranġiy, Jiwda nan-gep korip okok amiy, kiyn yomb key yimb ak biynimb diy kond mindeniġamb minim tep ak aṅġniyiġip. Biynimb gok kuyip tap yerip yerip gak ak kunep gek suġ ayak. ³⁶ Nuk biynimb kun gok niġak: kanj siypsiyp gok bi kond mindep kiyk bap ma mindip rek ak mindeyak. Gos yomb niġiy kosyam mindeyak ak, kuyip simb niġiy, ³⁷ binuk gok kuyip aṅgak, “Tap keñmaṅġiy kuṅay yimb nep woṅ day ak wos gi mindip ak pen; biynimb pipanġ dand winiġiy ak kuṅay ma mindpay. ³⁸ Kun ak nimb Bi woṅday nop nimb ak nup aṅgniġem, bi pipanġ dand owep gunap yokek, pipanġ dand nup ker winiġiy aṅgak.”

10

*Jiysis Aṅgak, “nimbip Aspiyn Rek Kichekiy Tap Gok Anġyokniġambim Aṅgak”
(Mak 3:13-19; Luk 6:12-16)*

¹ Jiysis binuk onep wimiġan ak suk aṅgek apey aṅgak, “Yand key nimbip aspiyn ak mey, kichekiy malñiluk tap gok aṅyokniġ, aṅyokniġambim. Biynimb tap yerip yerip giniġamb gok kunep gem, suġ ayniġamb aṅgak.”

² Bi Jiysis minim dand amemb onep wimiġan kun ak, yimb kiyk mey; Bap Saymon, yimb nup bap Piyta aṅġyiġipay. Bap Enjriw: Piyta numam nuk ak. Bap Jemis: Sebediy ñinuk. Bap Jon: Jemis numam nuk ak. ³ Bap Piyliyp. Bap Batlomiyyiw. Bap Tomas. Bap Matyiw. Nuk takes diyiġip. Bap Jemis: Alpiyas ñinuk. Bap Taydiyas. ⁴ Bap

Saymon: yimb nup bap Selot angyingipay. Bap Jiwdas: nuk mey, kisen Jiysis nup mimunḡ gak.

*Jiysis Binuk Gok Kuyip Anḡ Keykey Yokak
(Mak 6:7-13; Luk 9:1-5)*

⁵ Jiysis binuk kun gok kuyip minim tep wong ak ginimimb anḡiy, anḡ keykey yokyong anḡak, “Nimb Samariya kay mindpay namb okok sek, biynimb Jiwda mer namb okok sek ma amnimimb. ⁶ Pen nimb am biynimb chin Yisrel, Gor nup gosimb ma niḡbay gok kuyip anḡñiyong anḡnimimb, ⁷ ‘Gor biynimb diy kond mindeningamb ñin ak maḡ wip anḡnimimb.’ ⁸ Kun anḡyong biynimb tap ginimunḡ gok gem suḡ ay, biynimb pisnep kumningiy gok gem, tip ak tikjakningiy. Biynimb soy ayndik aynimunḡ gok, biynimb kichekiy malñiluk abanḡ aynimunḡ gok gem, suḡ aynongiy. Bapiy chirapiy, nimbip per yikop wong gipur rek, nimb biynimb kun gok kuyip yikop wong giñnimimb. ⁹ Maniy gunap dand ma amnimimb. ¹⁰ Wand, chech, tomb tirup, yirkondim, tap gok, dand ma amnimimb. Yenen: biynimb wong giñimbay gok, pen tap ñey ñimbay.

¹¹ “Pen dawin akanḡ, miñmon bap amjakiy, biynimb nimbip sik anḡdiningiy rek gunap niḡiy, kiy yip nep mindiy, miñmon bap key amning nep kuyip kirgiy amnimimb. ¹²⁻¹³ Kun ak korip bap amiy, nimb mindpim anḡgem, yaw mindpun anḡgeningiy, korip miḡgan kun ak amnimimb. ¹⁴ Pen nimbip ma sik anḡdeningiy; kiring amning, silkul tom beḡ nimbip chingdiy mindonimunḡ ak, pipal pikem yapek amnimimb. ¹⁵ Nimbip niḡind yimb apiyn: kor yomb ñin ak, Sodom Gomora

biynimb yiwur siskoy diniŋgambay; biynimb nimbip ma diniŋgambay kun gok, yiwur yomb yimb ak diniŋgambay.

Miker Kuŋaynep Winiŋgamb
(Mak 13:9-13; Luk 21:12-17)

¹⁶ “Pen niŋim! Yand nimbip kanj siypsiyp rek ak, yoksipiyn: biynimb kayn ayndik rek mindpay namb okok. Kun ak gos niŋrep giyiŋg, kapkap mindrep giy kuyip aŋgñinimimb.

¹⁷ “Pen biynimb gunap nimbip chichiy diy, dam Jiwda nan-gep korip ak amey, kanjsol kiyk gok ap kor giy, nimbip pikniŋgambay. Kun ak niŋrep ginimimb. ¹⁸ Nimbip Jiysis binuk aŋgiy, lipiŋg dand gapman biyomb mindeniŋgambay ak amey, minim tep yip ak, biyomb gok sek, bi miñmon paryomb okok nimb gok sek kuyip aŋgñiniŋgambim. ¹⁹⁻²⁰ Nimbip kor giniŋgambay kun ak, minim yerip aŋgjun aŋgiy pirikiy, gos kuŋay ma niŋnimimb. Apikniŋ, Nap Gor Kawnan nuk nimb yip mindip ak, gos tep ñeniŋgamb, minim nimbik ar ak key ma aŋgniŋgambim; minim yipund giy yimb anep aŋgniŋgambim.

²¹ “Ñin kun ak numam gunap tikjakiy, numam gunap kuyip pikayaŋ aŋgiy, biyomb gok kuyip ñiniŋgambay. Nop gok tikjakiy, ñapan kiyk key gok pikayaŋ aŋgiy, biyomb gok kuyip ñiniŋgambay. Ñapan gok, nonim nop sikop kuyip kunep giniŋgambay. ²² Yip ker mindeniŋgambim rek, biynimb okok maŋgiysek nimbip niŋey, miluk yowniŋgamb. Pen biynimb kilis giy yip ker nep mindeniŋgambay gok; ñin kisen ak apek, Gor kuyip diniŋgamb. ²³ Pen wikan bap amem,

nimbip gi timey geniᅇgiy, pirik wikan bap pen amnimimb. Nimbip niᅇind aspiyn: Yisrel biynimb kuyip sayn nep aᅇᅇem amnakniᅇ, Bi bap Ñinuk ak winiᅇgamb.

²⁴⁻²⁵ “Ñapan sikul apay gok yomb mindey; tiysa kiyk gok sikoy ma mindpay. Pen tiysa mindip rek mindon aᅇgiy mey, sikul apay. Biynimb wong giᅇimbay gok yomb mindey, biynimb kuyip kond mindpay gok sikoy ma mindpay. Wong gipay ak, biynimb yomb mindpay rek mindon aᅇgiy, wong gipay. Kun ak rek, biynimb yand gok yand mindpiyn rek mindon aᅇgiy gipay. Pen yip aᅇjiwiy, Seytan yimb nup bap ay, ‘Belsiybul’ apay ak, nimbip timey yimb giniᅇgiy rek ayip.

Gor Nup Nep Pirikep
(Luk 12:2-9)

²⁶ “Biynimb kun gok kuyip niᅇiy ma piriknimimb. Minim yerip miᅇiy yiwgiy mindip ak, kisen misenᅇ mindeniᅇgamb. Tap yerip kapkap gipay gok, kisen misenᅇ niᅇniᅇgambay. ²⁷ Minim nimbip weygiy apiyn gok, nimb am misenᅇ aᅇᅇinimimb. Nimbip mimuᅇᅇ tikiyᅇᅇ apiyn gok, korip ar biyone amiy, aᅇᅇem niᅇniᅇgiy.

²⁸ “Nimb biynimb sinjrimey pikpay gok kuyip niᅇiy ma piriknimimb. Kiyk yikop wak band anep pikayniᅇgambay; mindmaᅇgiy ak sek timey giniᅇgiy rek ma ayip. Pirikniᅇᅇ mey, Biyomb biynimb mumbwak ak sek, mindmaᅇgiy ak sek pikay, miᅇmon mon key yinjap yokniᅇgamb anup piriknimimb. ²⁹ Yakir sikoy gok, tap yikop. Maniy gach won nokom nep yokiy, omiᅇal dipay. Tap yikop ak pen, Gor kuyip niᅇmindip ak, yikop ma

yap pikpay. ³⁰ Jun kas nimbip ak, Gor maŋgiysek ñin paŋgip. ³¹ Kun ak ma piriknimimb. Yakir gok ma kond mindep rek kond mindip.

³² “Biynimb yip ker mindiy, biynimb okok kuyip misen aŋgñiniŋgambay gok, yand pen Bapiy yomb semb biyon mindip ak nup, yip ker mindpay aŋgiy, misen aŋgñiniŋgayn. ³³ Pen biynimb an yip aŋgiy mindeniŋgambay namb ak, bi kun ak yand ma niŋbiyn aŋgñiniŋgambay gok, yand pen Bapiy semb biyon anup, biynimb guniy yand ma niŋbiyn aŋgñiniŋgayn.

Penpen Giniŋgambay

(Luk 12:51-53; Luk 14:26-27)

³⁴ “Yand man ar biy opiyn ak, kapkap mindrep giniŋgambun aŋgiy, gos ak ma niŋnimimb. Yand winik rek, minim yomb aŋgiy, penpen giniŋgambay. ³⁵ Ñi gok tikjakiy, nop yip penpen giniŋgambay. Pañ gok tikjakiy, nonim yip penpen giniŋgambay. Ñi biyn gok tikjakiy, nupis yip penpen giniŋgambay. ³⁶ Kun giniŋgambay kun ak, korip keykey mindpay rek nep penpen giniŋgambay.

³⁷ “Biynimb nop nonim kuyip akan, ñi pañ kiyk gok nep gos niŋiy, yip ma niŋniŋgambay ak; biynimb yand rek ma ayniŋgamb. ³⁸ Biynimb yip gosimb niŋniŋg, pen pikayniŋgambay rek ayip aŋgiy kirginiŋgambay ak, biynimb yand rek ma ayniŋgamb. ³⁹ Biynimb keynep mindiy, mind tep giniŋgayn aŋgñiniŋgambay gok, mon key yinjab ak amniŋgambay. Biynimb Jiysis ker minden, yip pikayniŋg pikayniŋgiy aŋgñiniŋgambay gok, perper mindeniŋgambay.

*Gor Kuyip Pen Kunep Kond Mindeningamb
(Mak 9:41)*

⁴⁰ “Nimb amem, biynimb nimbip wasiw angdiningambay gok, yip diningambay. Pen yip diningambay rek, Bi yip yokek winik ak nup diningambay. ⁴¹ Biynimb bi Gor minim anjep bap ninjiy, Gor wonj gip rek, nup diningambay ak, tep yimb giningambay ak mey; Gor bi minim nup anjep ak direp giningamb rek, kuyip kunep giningamb. Biynimb Gor biyn bi suņ-tep nuk bap ninjiy, Gor biynimb suņ-tep nuk anjiy diningambay ak, tep yimb giningambay ak mey; Gor biynimb suņ-tep nuk ak direp giningamb rek, kuyip kunep giningamb. ⁴² Pen biynimb yip yikop yimb bap ninjiy, Jiysis ker mindip anjiy ñiņ marik giningambay gok; Gor niņek tep gek, pen sakiy ma giningamb.”

11

*Jon Binuk Gunap Anjyokek Jiysis Nup Niņning
Wiyak*

(Luk 7:18-35)

¹ Jiysis binuk onep wimingan ak kuyip, kun kun giy ginimimb anjiy anjñirep giy, miñmon kun ak kirgiy, dawin yep maņ kun okok amiy, biynimb gok kuyip minim anjñak.

² Pen Jon bi ñiņg pikñemb ak kalambis mindiy, Krays yerer gak minim ak ninjiy, binuk gunap anjyokek Jiysis mindek ak amiy, ³ nup anjñiņiy anjyak, “Nand mey bi kiņ yomb key yimb anjiy per kond mindpun ak nep opan akan, bi kisenimb kun ak key kond mindonjun?”

⁴ Anǵeyak Jiysis kuyip anǵak, “Nimb Jon mindip amiy anǵnimimb, ‘Chin amiy niñbun: ⁵ bi kun ak biynimb windin koy gip gok gamb windin niñbay. Biynimb timund miñgan pil gip gok gamb gos niñbay. Biynimb tomb timey gip gok gamb kinjeñ tañgrop gipay. Biynimb soy ayndik ayip gok gamb milip gip. Biynimb kumbay gok gamb tip tikjakpay. Biynimb simbgeprek gok kunep Gor minim tep ak anǵek niñbay anǵnimimb.’ ⁶ Pen minim bap anǵnimimb, ‘Biynimb yip gosimb niñiy, gosow gosow ma niñbay gok, miñmiñ yimb giniñgiy anǵnimimb anǵak.’ ”

⁷ Kun anǵek, Jon binuk gok amniyakniñ, Jiysis biynimb ap mindeyak gok kuyip, Jon minim ar ak anǵiy anǵak, “Nimb nind miñmon nep namb okok amnimbik ñin ak, yerip giniñg ambik? Sund par nokom bap yiñgen diy, dand amiy apiy gek niñning ambik? ⁸ Akan yenen ambik? Bi chech teprep nep aypay gok niñning ambik? Bi chech teprep dun anǵiy niñbay gok, biyomb korip kilrimey okok kinbay. ⁹ Pen tap yerip ak niñning ambik? Yikop ma ambik. Jon bi Gor minim anǵep ak niñning ambik. Bi Gor minim anǵep winiñgamb anǵiy kond mindyiniñgipim mey, bi kun ak. ¹⁰ Nup anǵiy Baybol buk ak tikiy anǵyak:

‘Bi minim anǵep yand ak anǵen nind amiy, biynimb gok anǵrop gek, kisen Ñiyand ak anǵen niniñgamb anǵiy tikiyak.’

¹¹ Nimbip aspiyn: Jon biynimb man ar biy, mañgiysek wiyniym gip ak pen; Gor biynimb yikop yimb diy kond mindeniñgamb gok, Jon rek ma mindeniñgambay; Gor biynimb tep nuk yimb

gok mindeningambay. ¹² Jon bi ñiņg pikñemb ap minim tep aņgñak ñin ak tikiy, biynimb gok Gor chinup diy kond mindonimuņ aņgiy, kilis gi dand apiy, miñiy kunep kilisrimey yimb gipay.

¹³ “Mosis low minim tikak ak sek, bi Gor minim aņgep gunap minim tikiyak ak sek kiñiņ ak mey, Gor Kiyņ yomb key yimb ak nup yokek, nuk biynimb gok kuyip diy kond mindeningamb. Minim kun ak aņg dand apey apey mey, Jon owak. ¹⁴ Pen minim aņgriņg gispiyn ak diniņgambim akaņ ma niņbiyn. Gor Jon nup aņgek ap biynimb gok kuyip minim aņgñak ak; Baybol buk ak tikiy giniņgamb aņgyak rek nep gak. Tikiy aņgyak,

‘Bi Gor minim aņgep Yilayja rek bap nind apek; bi kiyņ yomb key yimb ak kisen winiņgamb aņgyak.’

¹⁵ Nimb biynimb gos timund sek gok, minim kun ak niņnimimb.

¹⁶ “Biynimb miñiy ñin biy mindpay gok yand niņbiyn: kiyk ñapan ņaņ gunap, ñapan ņaņ gunap kuyip apay rek ak mindpay. ¹⁷ Ñapan ņaņ gunap meņg miņgan dand araniy apay, ‘Chin akil puņgon, nimb yenen kamep ma apim? Kamep siy aņgep rek ak aņgon, nimb yenen siy ma apim apay?’ ¹⁸ Kun ak rek Gor Jon nup yokek apiy, ñin gunap tap ma ñimbiy, ñiņg wayn ak ma yimb ñimbiy gek aņgyak, ‘Bi kun biy nup tap yerip ak ambaņ ayek kun gip aņgyak.’ ¹⁹ Bi bap Ñinuk pen apek apay, ‘Bi tap yomb ñimbiy, ñiņg wayn kuņay ñimbiy, bi takes dipay gok yip, bi tap siy tap timey gipay gok yip taņgip apay.’ Apay kun ak, biynimb gosimb ma mindip gok rek apay aņgak.”

Minim Yomb Diniŋgambay

(Luk 10:13-15)

²⁰⁻²¹ Jiysis miñmon yomb gunap nind giranġiy, tap mageprek gek niñyak ak pen; yenen tap siy tap timey gipun anġiy, nup chinġiy mindrep ma giyak. Kun gey, Jiysis kuyip kuñay yimb anġiy anġak, “Korasin biynimb gok diy, Betsayda biynimb gok diy tap mageprek gok gen niñiy kirpay rek, minim yomb yimb diniŋgambay. Taya biynimb gok sek, Saydon biynimb gok sek kuyip tap mageprek kun gok nind rek gembiniñ niñiy, chech bek band rek gunap yimiy, tun mañġiysek giy mindembiyap. ²² Kun ak kor yomb ñin ak, Taya biynimb sek, Saydon biynimb sek minim sikoy rek diniŋgambay; Korasin biynimb gok sek, Betsayda biynimb gok sek minim yomb yimb ak diniŋgambay.

²³ “Pen ñin kun ak Kapaniyam biynimb gok, semb biyoñ ma amniŋgambay; pisnep mon key yinjap kaw miñgan ak amniŋgambay. Sodom biynimb, nimb timey yimb gipim rek ma giyak ak pen, kuyip mon yinak. Nimbik tap mageprek gok gen niñbik ak pen, Gor nup gosimb ak ma niñbim. ²⁴ Ar kun ak yand nimbip niñind yimb aspiyn: kor yomb ñin ak apek, Sodom biynimb gok minim sikoy rek diniŋgambay; nimb Kapaniyam biynimb gok, minim yomb yimb ak diniŋgambim anġak.”

Yand Bapiy Nup Niñbiyn, Nuk Yip Niñimb

(Luk 10:21-22)

²⁵⁻²⁶ Ñin kun ak Jiysis Nop nup anġak, “Bapiy nand Biyomb. Semb biyoñ sek, man biy sek kond

mindpan ak, gos nand key ninney tep gip rek, biynimb gos tipangiy ninbun apay gok kuyip kirgiy, biynimb ñapan ñañ rek mindpay gok kuyip gos tep ñimban ak, nip tep aspiyn angak.”

²⁷ Kun angiy angak, “Bapiy kilis nuk mindip rek, yip ñimb. Biynimb gunap yip ma ninrep gipay; Bapiy nep yip ninimb. Yand nep Bapiy nup ninrep gipiyn. Pen biynimb gos tep ñiyn angiy ninbiyn gok, gos tep ñen, nup ninbay angak.”

²⁸ Kun angiy angak, “Nimb biynimb mindrep ma giy kosyam mindpim gok mangiysek, yip ker apem, gen kapkap mindrep giningambim. ²⁹ Yand bi sayn tep kapkap mindpiyn rek, yand yip nep tangiy miñ yand ak ninrep giy mey, mind tep giningambim. ³⁰ Minim yip niniy yand yip tangem mey, nimbip miker per gip rek ma giningamb angak.”

12

Jiwda Lotiw Ñin Ak, Wiyt Mangiy Tik Ñinyak (Mak 2:23-28; Luk 6:1-5)

¹ Jiwda lotiw ñin ak, Jiysis binuk gok yip wiyt wonḡ namb ak amyiḡ, binuk gok yiwan gek, wiyt mangiy kun gok gunap diy, wak pikyokiy ñimbyiḡ ñimbyiḡ amniyak. ² Kun geyak, bi Peresiy gok niniy, Jiysis nup angyak, “Binak gok yenen lotiw ñin wonḡ magep biy, wiyt mangiy tik wak pikyokipay angyak.”

³ Angeyak kuyip angak, “Depiyt wosrey binuk gok yip yiwan gek, ⁴ Gor anḡniḡep korip ak amjakiy, biret Gor windin yirik ar ak ay, bi yikop ma ñimbay: bi Gor nup simbonḡipay gok nep

ñimbay biret ak kuyip angninek nup ñey, binuk gok yip ñinyak. Pen yiwan gek giyak kesim kun ak, Baybol buk biyan tikyak ak nimb ma niñbim?

⁵ “Nimb Mosis Baybol buk tikak ak ma niñbim rek ayip. Nuk tikiy angak, ‘Bi Gor nup tap simbonjep gok, lotiw ñin ak Gor angnep korip ak mindiy, niñind wong gipay angak.’ ⁶ Pen lotiw korip kun ak tap yikop: Bi bap Ñinuk ap mindip biy Biyomb yimb. ⁷ Pen minim bap Baybol buk tikyak ak, niñrep ma gipim rek ayip. Minim kun ak tikiy angyak, ‘Biynimb yip tap simbonj ñimbay ak, tep ma gip; biynimb gok kuyip simb niñbay ak yip tep gip angyak.’ Minim kun ak niñiy ma gipim ak mey, bi yand gok mindrep giyakniñ, kuyip ang gipik. ⁸ ‘Lotiw ñin Lotiw ñin’ apim ak, Bi bap Ñinuk nep kond mindip angyi niñnimimb ak pen, gos kun ak ma niñbim angak.”

*Jiysis Bi Ñin Pipich Gak Ak Gek Suñ Ayak
(Mak 3:1-6; Luk 6:6-11)*

⁹ Jiysis miñmon kun ak kirgiy, miñmon bap amiy, Jiwda nan-gep korip miñgan ak amnak. ¹⁰ Pen korip miñgan kun ak bi ñin pipich gak bap mindek. Biynimb ap mindeyak gok, Jiysis minim gunap angek nup dand kor amnun angyi, nup angyak, “Lotiw ñin ak, biynimb suñ ayan angyi gep akan mer?”

¹¹ Angeyak, Jiysis kuyip angak, “Kanj siypsiyp nimb bap lotiw ñin ak kaw miñgan ameningamb, yingpang yokningambim akan mer? Yingpang yoknimimb rek ayip. ¹² Pen kanj siypsiyp ak tap yikop. Biynimb ak tap yimb. Lotiw ñin gok suñ

ayan angyi giningambun ak, minim ma mindip angak.”

¹³ Jiysis kun angyi, bi ñin pipich gak ak nup angak, “Ñin almil ayan!” Angek, ñin almil aysipiyn angak, pisnep suñ ayak.

¹⁴ Kun gek ninjiy, bi Peresiy gok am nan-giy angyak, “Nup kun kun giy pikayjun angyi, minim kapkap angayrep giyak.”

Jiysis, Gor Bi Wong Giñemb Nuk Yimb

¹⁵ Kun angeyak ninjiy, nuk miñmon kun ak kirgiy, wikan gunap amning sandakniñ, biynimb kunaynep kisen giyak. Kun geyak, nuk biynimb tap gak gok gek suñ ayakniñ, ¹⁶ kuyip angak, “Bi ak kun kun gip angyi, ma angnimimb angak.”

¹⁷ Jiysis gak kun ak, bi Gor minim angep Asaya giningamb angak rek nep gak. Nuk tikiy angak:

¹⁸ “Bi yand pisnep yiñ dipiyn biy, wong yip giñimb. Bi kun ak yip niñen tep yimb gip. Kawnan yand ak nup bak ayek, minim tep yip ak biynimb miñmon keykey mangiysek angniningamb.

¹⁹ Pen nup miluk yapek minim yomb yimb ma angningamb. Biynimb mindpay okok yip nep niñningiy angyi, menñ miñgan dand araniy ma angningamb. ²⁰ Biynimb ma ninbay gok kuyip kapkap angrep giningamb. Lam sungning gek, kalasin pangey yin nep mindip rek ak kuyip angningamb. Nuk kun giy gi dand amiy, Gor anqip rek pis ak arane; tap siy tap timey gep pis ak pisnep apyowningamb.

²¹ Biynimb miñmon okok nimb gok kunep, nup gos sek kond mindeningambay angak.”

Jiysis Nup Belsiybul Kilis Dip Angyak

(Mak 3:20-30; Luk 11:14-23; Luk 12:10)

²² Bi kichekiy ambañ ayek, windin koy giy minim ma angyingip bap dand apeyak; Jiysis kichekiy ak anğ mis yokek; windin yimb ninjiy, minim anğiy gak. ²³ Biynimb mindeyak gok, gak kun ak ninjiy, wal anğiy angyak, “Bi kun biy basind Depiyt N̄inuk per kond mindpun ak rek ayip angyak.”

²⁴ Pen bi Peresiy gok minim kun ak ninjiy, gos kiyk okok nep ninjiy angyak, “Bi kun ak Gor nup anğninjiy ma angyokip; nuk kichekiy malñiluk tap gok nop kiyk Belsiybul kilis ak diy angyokip angyak.”

²⁵⁻²⁶ Pen gos niñyak kun ak Jiysis key ninjiy, kuyip angak, “Seytan tikjakiy, biynimb nuk gunap angyokningamb ak; yergiy biyomb mindeningamb? Miñmon bap penpen anğiy asik keykey ayningambay ak; apyap pikningambay. Miñmon yomb bap akan biynimb kiñiñ nokom bap, penpen anğiy asik keykey ayningambay ak; apyap pikningambay. Nimb kun ak rek aspim ak pen; Seytan layn nuk key gok kuyip ma angyokningamb.

²⁷ “Yip kichekiy malñiluk tap okok nop kiyk Belsiybul kilis ak diy angyokip apim ak pen; yip anğem niñyin: biynimb nimb gok key Belsiybul kilis ak diy angyokpay? Kiyk key nimbip anğningambay, ‘Biynimb bap kun giniñgiy rek ma ayip anğningambay.’

²⁸ “Pen Gor Kawnan ak yip kilis ñek angyokpiyn ak, yenen Gor binuk biynimb diy kond mindeningamb ak wip biy angyi ma niñbim.

²⁹ “Bi kalrimey bap mindek, tap nup gok dining, yikop ma ambay. Nup miñ tiwning ay nep, am tap nup gok dipay.

³⁰ “Biynimb yip ker mindpay gok, biynimb gok kuyip dand yip ker opay. Biynimb yand mer gok, biynimb yip ker wining gipay gok kuyip yuk dam yokpay. ³¹ Kun ak nimb niñrep ginimimb. Biynimb gok tap timey geningambay akan, Gor nup minim deningambay, nuk niñiy kirginimuñ rek ayip; pen Gor Kawnan ak nup minim dey; kuyip niñiy kirginimuñ rek ma ayip. ³² Bi bap Ñinuk ak nup minim timey angeningambay, Gor niñiy kirginingamb. Pen Gor Kawnan ak nup minim timey angeningambay; ñin biy kunep, ñin kisen ak kunep niñiy kirginimuñ rek ma ayingamb.

*Minim Key Apim Ar Ak Nimbip Kor Giningamb
(Luk 6:43-45)*

³³ “Yip yenen, ‘Seytan amban ayek, wong tep ak gip apim?’ Mon tep gok mangyi timey ma piyip; mon timey gok mangyi tep ma piyip. ³⁴ Pen nimb siy saraw ñapan tikpay gok mey kun apim. Nimb biynimb timey kun ak rek, yergiy minim tep angingambim? Biynimb minim apay rek niñiy gos yerip niñbay ak, niñningambun. ³⁵ Biynimb tep gok gos tep niñiy mey, tep gipay; biynimb timey gok, gos timey niñiy mey, timey gipay. ³⁶ Niñrep ginimimb. Kisen kor yomb ñin ak, Gor biynimb gok kuyip mangyisek minim mon-mon angyi akan, timey angyi giyak rek, yenen

kun gipik angyiy, kuyip angninngamb. ³⁷ Kun ak minim angninngambim rek ninjiy, biynimb gok sun-tep, biynimb gok yiwur dep angninngamb.”

*Tap Mageprek Gey Ninun Angyak
(Mak 8:12; Luk 11:29-32)*

³⁸ Bi low minim ninjep gok sek, bi Peresiy gok sek ap Jiysis nup angyak, “Tiysa! Tap mageprek bap gey, chin ninjiy mey, nip Gor nep yokek wip angninngambun angyak.”

³⁹ Angeyak angak, “Nimb biynimb tap siy tap timey nep gipim. Tap mageprek bap gey ninun apim ak pen; nimbip tap bap gen ma ninngambim. Bi Gor minim anjep Jona nup gak ar ak nep yip gek, ninning ninngambim.

⁴⁰ Wosrey piys yomb ak Jona nup kal ayek, kongiy namb akyan ñin omiñal nokom mindiy, andkind owak. Kun ak rek, yand kunep ñin omiñal nokom man namb okok mindiy, andkind winingayn. ⁴¹ Wosrey Jona am Niyniypa biynimb kuyip angek, tap siy tap timey giyak gok kasek kirgiy, Gor nup gosimb ninjak. Jona bi yikop ak angek ninjak; nimb pen biyomb yimb miñiy mindip biy, minim angyip ak ma dipim. Kun ak kor yomb ñin ak, miker yomb yimb dinngambim.

⁴² “Biyn Kiwiyn yomb, miñmon Siyba nimb ak, wosrey gak rek ak ninbim. Miñmon nuk par okok nimb ak pen, Jiwda kiyñ yomb Solomon minim nup ak ninning owak. Solomon bi yikop ak nup kun gak; pen yenen biyomb miñiy mindip biy minim angyip ak ma ninbim. Kun ak kor yomb ñin ak, minim yomb dinngambim angak.”

*Gor Nup Deniŋgambim Kichekiy Tap Gok Tip
Kiyk Ma Mindeniŋgamb
(Luk 11:24-26)*

⁴³ “Seytan layn nuk kichekiy tap gok bap biynimb aban ay mindiy, mis amiy, biynimb gu-
nap kuyip aban ayin angyi, niŋrang mer niŋiy,
⁴⁴ andkind apiy niŋniŋgamb: bi nind kiring
amniŋgamb ak, Gor Kawnan ak yip ma min-
deniŋgamb; tip teprep ak nep mindeniŋgamb.
⁴⁵ Nuk niŋiy, bi timey nuk rek mer, timey yimb
onep ar ak poŋind apeniŋgamb, bi kun ak nup
molik sikniŋgambay. Kun gey, nind tep tep
mindek rek mer; kisen pisnep mind timey yimb
giniŋgamb. Kun ak rek mey, biynimb ñin namb
biy mindiy, alemb alemb ñi mindpay gok.”

*Jiysis Nonim Numam Sikop
(Mak 3:31-35; Luk 8:19-21)*

⁴⁶ Jiysis biynimb gok kuyip minim angakniŋ,
nonim numam nuk yimb gok mis biyan apiy
angyak, “Chin Jiysis nup minim angning aswun.”
⁴⁷ Angeyak bi bap korip miŋgan amiy, nup angak,
“Nanim namam nak gok, nip minim angning ap
mindpay mis biyan angak.”

⁴⁸⁻⁴⁹ Angek biynimb nuk yip korip miŋgan
biyan mindeyak gok kuyip niŋkus giy angak,
“Niŋind apan ak pen, biynimb korip miŋgan
mindpay guniy kunep amiy yand, mam yand gok
nep mindpay. ⁵⁰ Biynimb Bapiy yomb semb biyon
angip rek niŋbay gok, amiy, mam, ay yand gok
nep mindpay angak.”

13

Jiysis, Gor Minim Niñrep Giyan Anjy Paydon Ayak

(Mak 4:1-9; Luk 8:4-8)

¹ Ñin kun ak, Jiysis korip kun ak kirgiy am Galiyliy chemb gol ak bisgiy minim anğñining gek, ²⁻³ biynimb kuñay yimb nep ap nup piñiy kus kus geyak, nuk am bot ar ak bisgiy, am ñiñg namb siñbindoñ mindyñg; kuyip minim paydoñ ayiñg anğñak.

Anğñiyiñg anğak, “Bi bap wiyt jakan anjy, wiyt mañgiy ak dam woñgday okok yokek, ⁴ gunap kinjeñ kosemb ar ak yapek, yakir gok apiy ñiñningambay. ⁵ Gunap kamb ar man siskoy ayningamb okok yapiy kasek gup giningamb ak pen, kindiy am wos ma giningamb rek, ⁶ pumb niñiy milip giyowningamb. ⁷ Pen gunap kikasik dindbilij namb okok yapiy jakningamb ak pen, miñ kun ak saw giy pikñimbek, milip giningamb. ⁸ Pen gunap lum teprep ar okok yapiy, jak tep yimb giy, mañgiy kuñay yimb nep piyningamb. Gunap ñin jiwiy rek piyningamb; gunap ñin jiwiy omiñal rek piyningamb; gunap ñin jiwiy kaw bap rek piyningamb anğak.” ⁹ Jiysis kun anjy anğak, “Nimb biynimb gos timund sek mindenimimb gok, minim aspiyn biy niñnimimb anğak.”

Yenen Minim Paydon Ay Anjyñigip

(Mak 4:10-12; Luk 8:9-10)

¹⁰ Jiysis kun anğek, binuk gok apiy, nup anğniñiy anğyak, “Biynimb gok kuyip, yenen minim paydoñ ay nep apan?”

¹¹ Anǵeyak anǵak, “Gor biynimb nuk diy kond mindeningamb minim weygiy mindyǵip ak, nimbip gos ñek niǵningambim; pen biynimb yikop gok ma niǵningambay. ¹² Biynimb minim yip niǵiy dipay gok minim gunap sek niǵiy, junj ak niǵrep giniǵambay; pen biynimb minim yip niǵiy ma dipay gok, minim sikoy niǵbay ak pisnep kurginiǵamb. ¹³ Kuyip minim paydon ay apiyn ak; kiyk windin sek, gos timund sek ak pen, anǵip mey ak anǵiy, ma niǵbay.

¹⁴ “Gipay kun ak, bi Gor minim anǵep Asaya nind giniǵamb anǵiy tikak rek nep gipay. Minim kun ak tikiy anǵak:

‘Minim niǵningambay ak pen, minim anǵip kun anǵiy ma niǵningambay. Windin niǵningambay ak pen, tap bap ma niǵningambay. ¹⁵ Biynimb guniy minim yand apiyn ak kuyip yiruk gek ma yimb niǵbay. Gor minim niǵon chinup gek biynimb nuk mindenjun rek ayip anǵiy, timund pilgiy, windin jukiya nep mindpay anǵak.’

¹⁶⁻¹⁷ “Kun ak kiyk ma niǵbay; Gor nimbip gos tep ñek niǵbim ak, miñmiñ ginimimb. Biynimb Gor nup chinǵyak gok sek, minim nup anǵep gok sek kunaynep Kiyǵ yomb key yimb ak nup niǵun anǵyǵipay ak pen, yip ma niǵiy, minim yip ma niǵiy giyak. Miñiy nimb minim yip niǵiy, yip niǵiy gispim ak, miñmiñ ginimimb.

Jiysis Tap Yiǵ Paydon Ay Anǵak Ak Misen Anǵñak

¹⁸ “Pen minim paydon ay anğambiyn junj ak nimbip angen niñim. ¹⁹ Wiyt mañgiy gunap kinjeñ kosemb ar ak yapeniñgamb, yakir gok ñimbdiniñgambay apiyn ak; biynimb gok, Gor biynimb diy kond mindeniñgamb minim tep ak niñniñg gey, Seytan gek sakiy giniñgambay anñiy apiyn.

²⁰⁻²¹ “Pen mañgiy gunap kamb ar man siskoy ayniñgamb okok yapiy, kasek gup giniñgamb ak pen kindiy am wos ma gek, pumb niñiy milip giniñgamb apiyn ak; biynimb gok minim yip ak kisen niñniñgambay won ak niñiy miñmiñ giniñgambay ak pen; won ak sakiy giy gos ar gunap niñniñgambay anñiy apiyn. ²² Mañgiy gunap yowniñgamb kikasik dindbiliñ namb okok apiyn ak; minim yip ak niñniñgambay ak pen; wonñ wariy, korip kanj, tiw minan, maniy tap gok nep gos niñiy; Gor minim tep ak kir-giniñgambay anñiy apiyn. ²³ Pen mañgiy gunap man tep ar ak yapiy, jak tep giy, mañgiy kuñay piyiniñgamb apiyn ak; biynimb gok minim yip ak niñiy, yip chingrep yimb giniñgambay. Gunap mindrep giniñgambay, gunap mindrep yimb giniñgambay, gunap mindrep giy ar kun ak key yimb giniñgambay anñiy apiyn anğak.”

Biynimb Yikop Gok, Gor Biynimb Nuk Gok Yip Wilikiy Mindpay

²⁴ Jiysis kuyip minim bap sek paydon ay anğak, “Gor biynimb diy kond mindeniñgamb ak kesim dispiyn biy rek giniñgamb. Biyomb bap wiyt mañgiy gok jakan anñiy, dam wonğday nuk okok yokniñgamb. ²⁵ Pen kisyim biyan kin

amningambay won ak, bi timey bap tap yin timey gunap dand apiy, namb kun okok yokiy amningamb. ²⁶ Pen wiyt yin tep gok jakakniñ, tap yin timey gok sesek jakningamb. ²⁷ Kun gek, bi wonñ giñemb gok apiy anñningambay, ‘Biyomb! Tap yin tep gok nep dam wonñday ak yokpan; tap yin timey gok yergiy namb kun okok sesek jaksap?’ ²⁸ Angey kuyip anñningamb, ‘Bi yip miluk niñimb bap dap yokip.’ Angek anñningambay, ‘Chin am tap yin timey jakip kun gok tunñjiw yokjun akan?’ Angey bi wonñday nop nimb ak anñningamb, ²⁹⁻³⁰ ‘Mer! Ñin biy, tap yin timey kun gok tunñjiwim angen, am tap yin tep gunap sek tunñjiwnimimb rek ayip ak, kirgem omiñal giy jaknimun. Pen jakiy manñiy piy, dep ñin ak apek ker, bi yand gok angen, tap timey gok tunñjiwiy, dam mon dangiyey yin simbok amek; wiyt manñiy gok nep di nan-giy, dam korip miñgan yip ak yokniñgambay anñningamb.’ ”

*Jiysis Mon Mastet Yin Ak Paydon Ay Angak
(Mak 4:30-34; Luk 13:18-21)*

³¹⁻³² Jiysis kuyip minim bap pen paydon ay angak, “Bi bap mon mastet yin ak dam wonñday nuk ak yokniñgamb. Mon yin kun ak manñiy sikoy ak pen; jak yomb giy, alik tep ak pikek, yakir gok ap alik keykey korip giniñgambay. Kun ak rek mey, Gor biynimb diy kond mindeniñgamb minim tep ak angak.”

Jiysis Yiis Minim Ak Paydon Ay Angak

³³ Minim bap pen paydon ay angak, “Biyn gok tap yiis ak di pilaw sek tunñgandik mandik giy

daŋgiyey yin yomb yimb tanimb. Kun ak rek mey, Gor biynimb diy kond mindeningamb minim tep ak aŋgak.”

Jiysis Biynimb Gok Kuyip Minim Paydoŋ Ay Nep Aŋgñak

³⁴ Jiysis biynimb gok kuyip minim guniy aŋgñining misen ma aŋgyiŋgip; paydoŋ ay nep kuyip aŋgñiyiŋgip. ³⁵ Gak kun ak, bi Gor minim aŋgep bap nind giniŋgamb aŋgiy tikak rek nep gak. Nuk minim kun ak tikiy aŋgak:

“Miñmon alwol gayak ñin ak tikiy mind dand apiy miñiy mindpun ñin biy, minim ma niŋyak ak; kuyip paydoŋ ay aŋgñiningayn aŋgak.”

Jiysis Kuyip Tap Yiŋ Rek Paydoŋ Ayak Minim Kiñiŋ Ak Aŋgñak

³⁶ Jiysis biynimb gok kuyip kun aŋgiy, korip miŋgan amnakniŋ, binuk onep wimiŋgan gok apiy nup aŋgyak, “Tap yiŋ timey woŋgday namb okok jakip aŋgiy paydoŋ ay apan ak, chinup aŋgey niŋun aŋgyak.”

³⁷ Aŋgeyak aŋgak, “Bi tap yiŋ tep woŋgday okok yokip apiyn ak, Bi bap Ñinuk. ³⁸⁻³⁹ Woŋgday apiyn ak, mankumb biy maŋgiysek. Tap yiŋ tep apiyn gok, Gor biynimb diy kond mindeningamb gok. Bi tap yiŋ timey dap yokek jakak apiyn ak, bi yip miluk niŋimb Seytan nup apiyn. Tap yiŋ timey jakip gok, Seytan biynimb nuk gok kuyip apiyn. Pen wiyt maŋgiy pik giniŋgamb ñin apiyn ak, ñin kisen ak apiyn. Bi tik dand owep apiyn ak enjol gok kuyip apiyn. ⁴⁰ Tap monmon jakip gok tunŋjiw di mon yinjap yokniŋgambay apiyn

ak: ⁴¹ Bi bap Ñinuk enjol gok kuyip angek, am biynimb Gor biynimb nuk gok yip yingonng giy mindyinq, key timey gipay rek, biynimb gunap kuyip gey timey gipay ak, ⁴² anng mon sinjrimey yinimb ak yokey, yiwur gakniq, menng siwbirikiy siy angninqambay anngiy apiyn. ⁴³ Ñin kun ak Gor biynimb suq-tep nuk gok nuk yip mindiy, mindrep giy, sup melik pik mindeningambay. Nimb biynimb gos timund sek gok, minim kun ak niqnimimb.

Gos Nokom Niñiy Gem Amnimuq

⁴⁴ “Pen Gor biynimb diy kond mindeningamb gok, kesim ar biy rek mindip. Bi bap amiy niqningamb, maniy kes wosrey weygiyak bap mindeningamb. Nuk niñiy tap gunap di aybirik tep giy korip amiy, tap nuk gok mañgiysek mon-mon yokiy maniy diy, maniy kun ak dand amiy tip wikan kun ak tawiy, am maniy kes kun ak dinqamb.

⁴⁵⁻⁴⁶ “Bi sikyim gep gok kunep kumbap piyow niqranngiy kumbap milip yimb bap niñiy korip amiy, tap kiyk gok mañgiysek yokiy maniy diy, am kumbap kun ak tawningambay.

Jiysis Wimben Minim Ak Paydon Ay Angak

⁴⁷ “Gor biynimb diy kond mindeningamb ak; bap mey kesim ar angninq gispiyn biy rek. Biynimb gunap wimben dand amiy, ñinq mañgiy chemb ak yokey, piys kunaynep apiy miñgan kun ak ambay. ⁴⁸ Kun gey wimben ak lipinq dand gol okok amiy, piys tep gok yiprunng piys ayep baket miñgan ak ay, piys timey gok diyokpay. ⁴⁹ Ñin

kisen ak kun ak rek giningamb. Gor enjol nuk gok angyokek apiy, biynimb sun-tep gok key ay, biynimb tap siy tap timey gipay gok key ay,⁵⁰ dam mon yinjap ak yokeningambay; menj siwbirikiy, siy ang mindeningambay angak.”

⁵¹ Kun angyiy angak, “Minim aspiyn gok ninbim?”

Angek, binuk gok, “Yaw. Ninbun angyak.”

⁵² Angeyak angak, “Basind sikop Gor minim angyingipay ak ninjiy, Gor biynimb diy kond mindeningamb minim yand apiyn ak ninjiy gipim ak mey, biynimb gunap angñining; minim tep nind-nimb ak sek, kisenimb ak sek angñiningambim angak.”

*Nasaret Biynimb Jiysis Nup Ma Diyak
(Mak 6:1-6; Luk 4:16-30)*

⁵³ Pen Jiysis paydon ay minim angak kun gok angyiwiy, miñmon nuk amiy,⁵⁴ Jiwda nan-gep korip ak amiy biynimb gok kuyip minim angñek ninjiy, wal yimb angyak. Kisen pen angyak,⁵⁵⁻⁵⁶ “Bi kun biy nop nonim, numam nunay nuk gok, chin yip mindpay ak, nuk yergiy biyomb rek mindiy, minim key angyiy, tap mageprek gok gisap. Nop nuk ak bi kapenda; nonim Mariya; numam nuk gok; Jemis ak, Josep ak, Saymon ak, Jiwdas ak. Kun ak nuk yergiy ap kun asap?”

⁵⁷ Kun angyiy, nup miluk ninyak.

Pen Jiysis kuyip angak, “Bi Gor minim anjep gok biynimb miñmon par okok amiy anjep, ninjind apay angyiy ninbay ak pen korip miñmon kiyk key ak anjep, yesek apay angyiy kirpay rek ak nimb gispim angak.”⁵⁸ Minim angak ak ma

ninĕyak, miñmon kun ak tap mageprek tapin ginimuñ rek ma ayak.

14

*Jon Bi Ñiñg Pikñemb Ak Kumak
(Mak 6:14-29; Luk 3:19-20; 9:7-9)*

¹ Pen gapman biyomb miñmon Galiyliy kond mindep Herot, Jiysis nuk yerer gak minim ak niñiy, ² am binuk gok kuyip angak, “Jiysis tap mageprek gip ak, nuk bi bap key mer; nuk Jon bi ñiñg pikñemb anep. Nup pikaynik ak pen; tip ak tikjakiy ap mindip rek, niñind tap mageprek kun gok gisap angak.”

³⁻⁵ Pen Jon nup kalambis ay, pikyak minim kiñiñ ak kun giy mindip: Herot nuk tikjakiy numam Piyliyp biyn nup ak di gek, Jon angak, “Ak girep ma gip.” Kun angek nup sen tiwningiy, dam kalambis ay, pisnep pikayen kumañ angyi gos niñak ak pen; biynimb gok Jon nup bi Gor minim angep chin angyak rek, pirikiy kirgak.

⁶ Pen kisen Herot nup nonim tikak ñin ak apek, biynimb kuñaynep ap nan-giy patiy geyak, Herodiyas panuk ak, ap namb kun ak deniys gek, Herot niñek tep yimb gak. ⁷ Kun gek, nuk pañ kun anup minim angay angak, “Yand niñind aspiyn. Nak tap bap angnineningamban; monmon ñiningayn angak.” ⁸ Angek, pañ kun ak, nonim angak rek niñiy angak, “Jon bi ñiñg pikñemb jun won ak piler ar ay, dap ñinimin angak.”

⁹⁻¹⁰ Kun angek Herot niñek simb gak ak pen; biynimb gok niñmindyakniñ, pañ kun anup misen minim angay, “Tap bap angnineningamban

monmon ñiniᅇgayn aᅇgak” rek niᅇiy, bi gunap aᅇgyokek, Jon kalambis mindek ak amiy, jun won nup ak timbrikiy, ¹¹ di piler ar ak ay dapiy pañ kun ak nup ñeyak, nuk pen dand amiy, nonim nup yomek niᅇiy, ak niᅇind apay aᅇgiy niᅇak.

¹² Pen Jon nup kun giy kuᅇam timbrikeyak, binuk gok apiy, nup dam komiy, am Jiysis nup aᅇᅇniyak.

*Jiysis Payp Tawsin Biynimb Ak Tap Ñek Ñiᅇyak
(Mak 6:31-34; Luk 9:10-17; Jon 6:1-13)*

¹³ Jiysis minim kun ak niᅇiy, am miñmon wikan bap key minden aᅇgiy bot diy, miñmon kun ak kirgiy saᅇdak. Pen biynimb gok, Jiysis amnakniᅇ kisen amnun aᅇgiy, miñmon kiyk gok kirgiy, lum ar amiy, Jiysis amniᅇᅇ gek okok amniyak.

¹⁴ Jiysis amjakiy bot ak kirgiy gol okok apiy niᅇak: biynimb kuᅇaynep mindeyak. Kuyip niᅇek simb gek, biynimb tap gak gok gek, suᅇ ayak.

¹⁵ Pen duᅇᅇek wakniᅇ, binuk gok mindek ak apiy nup aᅇgyak, “Kisyim asaw. Akniy miñmon nep namb ak; biynimb kuᅇaynep guniy aᅇᅇy, korip namb akniy amiy, keñmaᅇgiy kiyk gunap tawiy ñiᅇyaᅇ aᅇgyak.” ¹⁶ Kun aᅇᅇyak kuyip aᅇgak, “Nimb kuyip tap keñmaᅇgiy ñinimimb aᅇgak.” ¹⁷ Aᅇᅇek aᅇgyak, “Chin tap keñmaᅇgiy kuᅇay ma mindip; yikop biret onep mamind ak, piys omiᅇal sek mindip aᅇgyak.”

¹⁸ Aᅇᅇyak Jiysis aᅇgak, “Tap kun gok dand wim.” ¹⁹ Kun aᅇgiy, biynimb gok kuyip aᅇᅇek, tap kaskas ar okok bis giyakniᅇ, biret kamb ak diy, piys omiᅇal ak diy, kuyonᅇiy niᅇiy, Gor nup tep aᅇgiy, biret ak tipaᅇgiy binuk gok kuyip ñakniᅇ,

kiyk diyıng biynimb gok kuyip bilok ñiyak. Piys ak kunep giyak. ²⁰ Kun giy bilok ñeyak, ñimb gey gey tapin ayek day day kirgiyak gok, binuk gok wand onep wimıngan ak di yıngey pisnep arachakak. ²¹ Biynimb tap ñınyak kun ak, biyn gok sek, ñapan sikoy gok sek mer; bi gok nep mey, payp tawsin rek amnak.

*Jiysis Ñıng Kas Ar Ak Tawind Wak
(Mak 6:45-52; Jon 6:15-21)*

²² Jiysis binuk gok kuyip pis bindon amniyan angyi, angek bot diy sanıdyakniı, biynimb gok kuyip angyokiy, ²³ nuk key Gor nup angnıngı, miñmon dum bap amnak. Dungek wakniı, nuk dum kun ak asiı mindek. ²⁴ Pen binuk gok bot dand ñıng namb yomb sıgak amniıyakiı, yıngen yomb sikerek ak apiı, bot ak tungandikiıng rek gak. ²⁵ Won kun ak miñmon yownıng gek ak mey, Jiysis ñıng kas ar ak tawind apiı, mindeyak maı sıgak apek niııy, ²⁶ ak chip kawnan bap asaw angyi, jel pirikiı wal angyak.

²⁷ Jiysis pen kuyip angak, “Ma piriknimimb! Yand nep aswiın angak.”

²⁸ Angek Piyta angak, “Biyomb! Nand nep apiı ker; yip angeı, ñıng kas ar ak tawind kayan ak niın angak.”

²⁹⁻³⁰ Angek Jiysis angak, “Kun ak owan angak.”

Angek, Piyta bot ar ak kirgiı, ñıng kas ar ak tawind Jiysis mindek sıgak amiı niıak: yıngen yomb sikerek ak apiı, nup ñıng namb akıyan pongek yownıng rek gek pirikiı, “Biyomb! Ak-ey angak.”

³¹ Kun angek, Jiysis kasek nup chichiy diy angak, “Yip gosimb niñban ak pen, yenen gos ominjal niñamban angak.”

³² Kun angyi, bot miñgan ak amnirikniñ, yingen yomb dek ak kirgak. ³³ Kun gek niñiy, binuk bot miñgan biyañ bising mindeyak gok, Jiysis nup lotiw giying angyak, “Nand Gor Ñinuk yimb angyak!”

Genesaret Biynimb Tap Gak Gok Jiysis Gek Sun Ayak

(Mak 6:53-56)

³⁴ Pen kiyk ñiñg tikiy miñmon Genesaret pis bindoñ amjakeyak, ³⁵ biynimb kun gok Jiysis nep wip angyi, biynimb mañ kun okok mañgiysek suk angey, biynimb tap gak gok dand wiyak. ³⁶ Dand apiy, Jiysis nup nembnemb giying angyak, “Chinup yaw angey ker, biynimb tap gip guniy, chech nip gol okok nep diniñey suñ ayañ angyak.” Angeyak yaw angek, biynimb nup diniñyak gok kuyip mañgiysek suñ ayak.

15

Peresiy Kay Nupis Nusind Sikop Angyiñgipay Rek Kindik Giyiñgipay

(Mak 7:1-13)

¹ Pen ñin kun ak, bi Peresiy gunap, bi low tiysa gunap Jerusalem nimb apiy, Jiysis nup angyak, ² “Bi nand guniy, yenen apis basind sikop minim per ak kirgiy, ñin kiyk ñiñg ayokiy mer, yikop nep tap ñimbay?” ³ Angeyak Jiysis angak, “Nimb yenen Gor minim nup ak kirgiy, nimb key gipim rek giniñgiy aspim? ⁴ Gor angak, ‘Nap nanim

anġnimiyr rek niġdinimimb! Pen ma niġdey, kuyip pikayniġgiy anġgak.’⁵⁻⁷ Pen nimb minim kun ak yipund giy ma anġñimbim. Biynimb gunap nop nonim kuyip kirginiġ, ‘Bapiy amiy kuyip tap ñimbinup ak pen, maniy biy Gor nup ñiniġgambun rek kirsipun anġey,’ nimb niġjiy, ‘Tep apay’ apim. Kun ak, yesek yimb apim. Biynimb nep minim anġaypay gok anġñiyyiġ, Gor minim aspun apim. Nimb biynimb minim anep anġrapim gok, Gor niġind yimb bi minim nup anġep Asaya nup gos ñek, minim tikiy anġgak:

8-9 ‘Biynimb guniy yip yesek nep Gor biyomb chin; chinup tep gip apay. Ak minim nep apay; yip gosimb ma niġbay. Gor minim tep ak anġñispun anġgiy, minim kiyk key gok nep anġñimbay anġgak.’ ”

Tap Biynimb Gek Gach Gip Gok
(Mak 7:14-23)

¹⁰ Jiysis kun anġgiy, biynimb mindeyak gok anġgek maġ siġak apeyak anġgak, “Minim anġniġ gispiyn ak niġrep ginimimb! ¹¹ Biynimb gok tap monmon okok ñimbey, simbwur namb kuyip biyaġ amiy gach ma gip; namb kiyk biyaġ gos timey niġbay ak mey gach sek mindpay anġgak.”

¹² Pen Jiysis binuk gok apiy nup anġyak, “Bi Peresiy gok, minim apan ak niġey kuyip miluk yowip ak niġban?” ¹³ Anġeyak anġgak, “Ak minim ma mindip. Bapiy semb biyoġ tap yiġ nuk ma yimimb gok junj sek piġiyjiw diyokniġgamb. ¹⁴ Bi kun gok windin koy! Bi windin koy bap, bi windin koy bap nup poġind dand amiy, omiġal giy kaw miġgan ak apyap pikniġgayr anġgak.”

¹⁵ Jiysis kun angek, Piyta angak, “Minim kun giy paydon ay apan kiñin ak, chinup angney ninun angak.”

¹⁶⁻¹⁷ Angek angak, “Kiyk ma ninbay rek, nimb kunep ma ninbim? Ninim! Tap yerip yerip monmon ñimbay gok, Gor ninjek, minim ma mindip. Ak yikop ñimbiy, simb kiy yokpay. ¹⁸ Namb kiyk biyan gos timey ninbay ak gek mey, gach sek mindpay. ¹⁹ Gos kiyk key ninij: biynimb pikay, biyn siy bi siy giy, tap okok siy diy, tom giy, biynimb anjjiwiy gipay. ²⁰ Gipay kun ak mey, Gor ninjek timey yimb gip; pen tap ñinjinig, ñin ñinig ma ayokiy monmon ñimbay ak; Gor ninjek minim ma mindip angak.”

Biyn Keynan Nimb Bap Jiysis Nup Pisnep Chingak

(Mak 7:24-30)

²¹ Jiysis miñmon Genesaret kun ak kirgiy, miñmon yomb Taya sek, Saydon sek amnak. ²² Am kun okok mindek, biyn Keynan nimb bap miñmon kun ak mindek ak apiy, Jiysis nup angak, “Biyomb. Depiyt Ñinuk! Yip simb ninjimin. Pañ yip ak kichekiy amban ayek, mindrep ma yimb gip angak.”

²³ Angek, Jiysis pen ma yimb angak. Pen binuk gok apiy nup angyak, “Biyn biy chinup kisen giyinj, kilpul nep anjip. Nup angyokan angyak.”

²⁴ Angeyak angak, “Gor yip yokek Jiwda biynimb Gor nup kirpay gok kuyip diyn anjij winik angak.” ²⁵ Kun angek, biyn Jiwda mer kun ak, ap Jiysis mindek kiñin siñak kongim yimiy angak, “Biyomb! Yip simb ninjimin angak.”

²⁶ Angek angak, “Keñmangiy ñapan chin ñinjun ak, yenen di kayn gok mokjun?”

²⁷ Angek biyn kun ak angak, “Biyomb. Niñind apan ak pen; kayn gok nop kiyk apyong tap ñinyakniñ, day day bonj molik okok yowip gok nep ñimbay angak.”

²⁸ Angek Jiysis angak, “Gor nup gosimb ninjy apan ak, apan rek giningamb angak.” Kun angakniñ, kichekiy ak won kun anep panuk nup kirgiy mis amnak.

Jiysis Biynimb Kunaynep Gek Suñ Ayak

²⁹ Jiysis andkind Galiyliy chemb gol taw akdon ken amiy, mak ak kuyongiy am dum biyon bisgak.

³⁰ Bising mindakniñ, biynimb tiwin yomb gok keykey biynimb tomb timey gak gok, windin koy gak gok, minim ma angyingipay gok, ñin tomb tind mand gak gok, tap yerip yerip gak gok mangiysek dand apiy Jiysis mindek tomb anjin siñak ayakniñ, kuyip gek suñ ayak. ³¹ Kun gek, biynimb kun gok niñiy wal angying angyak, “Chin Yisrel biynimb Gor chin ak tep yimb. Biynimb windin koy gok gek niñsipay; biynimb minim ma apay gok gek minim aspay; biynimb ñin tomb timey gak gok gek tanjrep gispay anjiy,” yimb nup dand aranyak.

Jiysis Bi Pow Tawsin Rek Tap Ñek Ñinyak (Mak 8:1-10)

³² Jiysis binuk onep wimingan ak kuyip angek apeyak angak, “Biynimb guniy kuyip simb niñsiyiyn. Ñin omiñal nokom yand yip nep mindpay ak pen, kuyip tap ñen ñinñingiy ak ma

mindip. Kuyip yikop angen amey, kinjenamb okok windin mayn apek, apyap pikningambay angak.”

³³ Angek binuk gok angyak, “Miñmon biynimb kuñay ma mindpay namb kun akniy, keñmangiy akay nimb piyow niñiy dapiy, biynimb kuñaynep kun guniy ñon ñiningambay?” ³⁴ Angeyak Jiysis angak, “Biret nimb yerip yerip mindip?” ³⁵ Angek angyak, “Biret onep ar ak mindiy, pis sikoy gunap sek mindip angyak.” Angeyak, Jiysis biynimb gok kuyip angek, man ar kun sinak bisgiyak. ³⁶ Bisgiyakniñ, biret onep ar ak diy, piys sikoy gok diy, Gor nup tep angiy, tipanjiy binuk gok kuyip ñek, kiyk diy biynimb gok kuyip bilok ñiyak. ³⁷ Ñeyak, ñimb gey gey tapin ayek, day day kirgiyak gok, binuk gok wand onep ar ak diy, yingey, pisnep arachakak.

³⁸ Biynimb tap ñinyak kun gok, biyn gok sek ñapan sikoy gok sek mer; bi gok nep mey, pow tawsin rek annak.

³⁹ Pen kun giy tap ñimbiy, Jiysis kuyip angyokek amniyakniñ, nuk bot diy, miñmon Makadan pis biym amiy, miñmon namb kun okok annak.

16

Tap Mageprek Bap Gey, Chin Niñun Angyak (Mak 8:11-13; Luk 12:54-56)

¹ Bi Peresiy gunap, bi Sanjiwsiy gunap Jiysis yergonimun nup anjjiwjun angiy, ap nup angyak, “Nand kiyñ yomb key yimb mindpiyn apan ak, tap mageprek bap semb biyon genimin, niñind apan angiy niñjun angyak.”

² Anğeyak kuyip anğak, “Pumb sanjind amiy, likañ likañ pikakniñ, ‘Miñmon tikrep giniñgamb apim.’ ³ Miñmon yowakniñ, semb biyoñ gach giy, likañ likañ gakniñ, ‘Ak miñmon pikniñg gisap apim.’ Kun giy niñrep gipim ak pen; Gor kun giy rek gip, kun giy rek giniñg gisap anğiy, gos ak ma niñbim. ⁴ Nimb biynimb miñiy mindpim gok, mindrep ma giy, Gor nup gosimb ak ma nep niñbim. Tap mageprek bap gey niñun apim ak, yand gen ma niñniñgambim. Bi Jona nup gak rek yip gek niñniñg niñniñgambim anğak.” Jiysis kun anğiy, kuyip kirgiy wikan bap amnak.

Minim Kiyk Anğñimbay Ak Ma Dinimimb Anğiy Paydoñ Ay Anğak
(Mak 8:14-21)

⁵ Jiysis binuk gok bot diy, pis bindoñ amiy niñyak: biret gok sakiy giy dand ma amniyak. ⁶ Kun ak mey, kisen Jiysis kuyip bi Peresiy gok sek, bi Sanjiwsiy gok sek yiys kuyip ak asikrep ginimimb angek, ⁷ kiyk key anğniñ anğniñ giy anğyak, “Chin biret ak dand ma opun ak mey, kun asap akañ anğyak.”

⁸⁻⁹ Pen Jiysis anğyak kun ak key niñiy anğak, “Nimb yenen biret ma dand opun anğiy anğ amiy apiy gispim? Yand Gor Ñinuk. Yerer giniñg giniñgayn gos ak ma niñbim? Pen bi payp tawsin rek mindeyak ñin ak, biret onep mamind ak diy, tipañg ñenik, ñimb dand doñwiw geyak; wand yerip yerip yingem arachakak? ¹⁰ “Pen kisen bi pow tawsin rek mindyakniñ, biret onep ar ak ñenik, ñimb dand doñwiw geyak, wand yerip yerip yingem arachakak? ¹¹ Ñin kun ak nimb

key mindiy biret wand yipik ak pen, paydon ay anğambiy ak ma niñiy, yip biret nen asap apim. Biret nen ma aspiyn. Bi Peresiy gok sek, bi Sanjiwsiy gok sek yiys kiyk ak nimbip dinimuj rek ayip anğiy aspiyn.” ¹² Kun anğek niñyak, tap yiys biret sek aypay ak ma anğak: bi Peresiy gok sek, bi Sanjiwsiy gok sek minim anğñimbay gok ma niñnimimb anğiy anğak.

*Piyta Anğak, Nand Kiyñ Yomb Gor Ñinuk Yimb
(Mak 8:27-30; Luk 9:18-21)*

¹³ Kisen Jiysis binuk gok yip miñmon Siysariya-Piyliypay namb ak tanğyinj, kuyip anğak, “Biynimb okok yip bi an apay?”

¹⁴ Anğek binuk gok anğyak, “Gunap Jon bi ñinj pikñemb ak apay; gunap Yilayja apay; gunap Jeriymaya apay. Gunap pen, bi Gor minim anğep gunap apay anğyak.”

¹⁵ Anğeyak Jiysis kuyip anğak, “Nimb key pen, yip an anğiy niñbim?”

¹⁶ Anğek binuk Saymon Piyta anğak, “Nand bi kiyñ yomb key yimb Gor biynimb gek kim mindpay ak Ñinuk anğak.”

¹⁷ Anğek Jiysis anğak, “Saymon Jona ñinuk. Nand gos niñban kun ak, key okok nimb ma wip; Bapiy semb biyon anep nip gos tep ñek niñban.

¹⁸ “Piyta. Nand bi kamb rek kilis timey giy apan kun ak, tep apan. Biynimb yand diniñgayn gok mey kun ak rek. Seytan ap kuyip yergeninjamb; yip ma kirginiñgambay.

¹⁹ “Biynimb Gor miñmon amniñgambay kiywur ak nip ñiniñgayn. Ñen nand lum ar biy mindiy, miñ ar akay niñey yipund

ma gek mer angningamban ak, Gor kunep angningamb. Pen miñ ar akay niñey yipund gek, yaw angningamban ak, Gor kunep angningamb angak.”

²⁰ Jiysis kun angyi binuk gok kuyip angak, “Biynimb gok kuyip, yip bi kiyn yomb key yimb mey kun ak angyi, ma angnimimb angak.”

Jiysis Kumiy Tikjakningayn Angak
(Mak 8:31–9:1; Luk 9:22-27)

²¹ Ñin namb kun siñak Jiysis binuk gok kuyip, biynimb gunap nup timey giningambay rek misen angyi angak, “Kisen Jerusalem amen, bi minim tungasikep gok diy, bi low tiysa gok diy, bi Gor nup tap simbongep yomb gok diy, yip yiwur ñiy pikayningambay ak pen; ñin ominjal nokom mindiy tip ak tikjakningayn angak.”

²² Kun angek Piyta, Jiysis nup dand gol siñak amiy, minim yiñ rek angyi angak, “Minim kun ak tep ma apan. Gor nip kond mindek, kun ma ginimuñ angak.”

²³ Angek, Jiysis pen Piyta nup angak, “Seytan. Yip kirgiy amnon! Yip yenen mer angyi aspan? Gor gos niñimb rek ma niñban; biynimb gos niñbay rek nep niñiy aspan angak.”

²⁴ Kun angyi binuk gok kuyip angak, “Biynimb an yip ker mindning ginimuñ ak; tap man ar biy gos yomb niñbay ak kirgiy, pumbnamb kisyimken yip kisen giy; miker yomb dep akan kumemb gos ak sakiy giy, yip chingiy nep tanjeningiy. ²⁵ Biynimb Jiysis nup diy mindon tep ma giningamb angyi niñningambay gok, pisnep apyap pikningambay; pen biynimb nup

diy mindon chinup yerginingamb ak, minim ma mindip angningambay gok kuyip den perper mindeningambay.

²⁶ “Biynimb tap man ar biy dun angyi gey amningamb gok, gos yomb kiyk ak ar kun anep ameningamb mey; perper ma mindeningambay. Akan Gor nup tap kun gok tawiy, kilis diningambay? Mer yimb! ²⁷ “Kisen Bapiy minim ak diy, enjol gok yip, andkind winingayn ñin ak, biynimb mindrep giningambay gok key ay, biynimb mindrep ma giningambay gok key ay giningayn. ²⁸ “Nimbip ninind yimb aspiyn: biynimb mindpim guniy gunap kim mindpikniñ, Bi bap Ñinuk biynimb diy kond mindeningamb ñin ak apek niñningambim angak.”

17

Jiysis Wak Nuk Ak Key Yimb Ayak (Mak 9:2-13; Luk 9:28-36)

¹ Jiysis minim kun ak angyi, ñin onep kangol ak mindiy; Piyta, Jemis, Jemis numam Jon ak, kuyip yakam poñind, dum yiy akyon bap amiy, key mindeyak. ² Mindyakniñ, Jiysis wak nup ak key yimb ay, jomluk ak pumb rek niñiy, chech nuk ak ñiñakol yimb gak. ³ Kun gakniñ niñyak: bi Gor minim angep nind kumrik Mosis yip Yilayja yip, ap Jiysis yip minim anğ minderik. ⁴ Kiyk niñiy, Piyta Jiysis nup angak, “Biyomb! Chin biy mindpun ak, tep yimb mindpun. Nand yaw angey ker, korip bandak band omiñal nokom ginjun. Nip bap, Mosis nup bap, Yilayja nup bap angak.”

⁵ Kun angakniņ, semb tund yimb ak apiy, kuyip maņgiysek yiwgak. Yiwiņg dakniņ, minim bap semb namb kun ak nimb angak, “Ñi mapin yand biy, yip tep yimb gip. Minim yerip yerip aņgnimur ak, niņdinimimb angak.”

⁶ Minim kun ak kun giy angek niņiy, Jiysis binuk gok gos kuņay niņiy pirikiy, apyap koņgim yimiy, jomluk kiyk ak man akyan ken ay mindeyak.

⁷ Jiysis ap kuyip diniņiy angak, “Ma piriknimimb. Tikjakim!” ⁸ Angek tikjakiy niņyak, nuk nep mindek.

⁹ Pen mak ak kuyangiying, Jiysis kuyip angak, “Miņiy yerer gamb niņbim kun ak biynimb gok kuyip ma aņgñinimimb. Kisen kumiy tikjaken mey, biynimb okok kuyip aņgñinimimb angak.”

¹⁰ Angek nup angyak, “Bi low tiysa gok yenen, Yilayja nind apeniņgamb; kisen Kiyņ yomb key yimb ak mankumb biy winiņgamb apay?”

¹¹ Angeyak angak, “Niņind apay. Minim kun ak mindip. ‘Yilayja nind apiy kuyip aņgrop gek, kisen Kiyņ yomb key yimb ak winiņgamb angyak.’

¹² Pen niņim: Yilayja owak ak pen, apek nup ma niņyak. Gos kiyk key niņyak rek nup timey giyak. Bi bap Ñinuk ak nup kunep giniņgambay angak.”

¹³ Kun angek, binuk gok niņyak; Yilayja angak kun ak, Jon bi ñiņg pikñemb ak nup nep angak.

Jiysis Ñi Kichekiy Ambaņ Ayak Bap Gek Suņ Ayak

(Mak 9:14-29; Luk 9:37-42)

¹⁴ Pen kiyk giw biyaņ amjakiy niņyak biynimb kuņaynep mindeyak. Bi bap biynimb mindeyak namb kun animb ap Jiysis mindek siņak koņgim

yimiy angak, ¹⁵ “Biyomb! Ñi yip ak simb niñninin. Nup sakiy ayek mindrep ma gip. Per am mon yinimb namb okok sek, ñiñg namb okok sek gi dam pikip. ¹⁶ Nup dand binak gok mindambay ak amen, nup gi mer niñiy kirpay angak.”

¹⁷ Angek Jiysis angak, “Nimb biynimb miñiy ñin biy mindpim gok, Gor nup gosimb ma niñiy mindrep ma gipim. Minek akay niñiy key giniñgambim. Minim per angen niñbim ak, yergiy minim kil sek angnim?” ¹⁸ Kun angiy angek dand apeyak, kichekiy nup amban ayak ak angyokek; won anep suñ ayak.

¹⁹ Kun gek, binuk gok Jiysis mindek ak apiy, kiyk nep mindyñg nup angniñiy angyak, “Yergek kichekiy amban ayak kun ak, angyok mer niñiy kirpun?”

²⁰ Angeyak angak, “Gor gek mis amniñgamb angiy, gos kilis giy ma niñbim ak mey kun gip. Pen niñim! Gos nimb ak mon mastet yin mañgiy sikoy mindip rek ak niñiy, niñwos giniñgambim ak; tap yerip okok angem, angniñgambim rek giniñgamb. Miñmon yirik biy liñg siñbindoñ amnoñ angeniñgambim, Gor gek amniñgamb. ²¹ [Pen kichekiy amban ayip kun ak, yikop angyokep rek ma ayip. Tap keñmañgiy kirgiy Gor nup angniñ mindiy mey, angyokpay angak.”]

*Jiysis Kumiy Tikjakniñgayn Angiy Tip Ak Angak
(Mak 9:30-32; Luk 9:43-45)*

²² Jiysis binuk gok, miñmon Galiyliy ap nan-geyak, kuyip angak, “Mañ mindip: Bi bap Ñinuk nup dand amiy, biynimb gunap kuyip ñeniñgambay, ²³ nup pisnep pikayey

kumningamb ak pen; ñin omiñal nokom mindiy, tip ak tikjakningamb angak.”

Kun angek, binuk gok nup simb ninjy, gos kunjay yimb ninjak.

Jiysis Gor Anjninjep Korip Ak Takes Pikak

²⁴ Pen kisen Jiysis binuk gok yip miñmon Kapaniyam ameyak, bi Gor anjninjep korip takes dep gok apiy, Piyta nup angyak, “Tiysa nimbik ak takes pikip sek?” ²⁵ Angeyak angak, “Yaw! Nuk takes pikip sek angak.” Piyta pen kun angyi korip mingan amek, Jiysis nup anjninjiy angak, “Gos nand yerip niñban? Gapman biyomb gok, takes maniy akay nimb dipay? Biynimb miñmon kiyk key gok nimb dipay akan, biynimb par okok nimb dipay angak?”

²⁶ Kun angek Piyta angak, “Biynimb par okok nimb dipay angak.” Angek Jiysis angak, “Bi kiyk key gok takes ma pikpay ak pen; ²⁷ chin ma pikoningambun; kuyip miluk yowningamb rek ayip. Nand wik ak dam ñiñg biyan yokiy piys nind diningamban ak, meñg minim ak tunglakiy niñningamban; maniy mangiy won bap mindeningamb. Diy dam takes chirminjy ak ñinimin angak.” Angek mey, am angak rek gak.

18

Biyomb Mindon Angiy Penpen Angyak (Mak 9:33-37; Luk 9:46-48)

¹ Jiysis binuk gok apiy nup angyak, “Biynimb Gor diy kond mindip gok, an yomb yimb rek mindip?” ² Angeyak Jiysis ñapan sikoy bap suk angek apek, di windin yirik ar kuyip siñak jakñek

mindakniņ angak, ³ “Nimbip niņind yimb aspiyn! Yimb yomb dun anġiy niņbim ak kirgiy ñapan sikoy siskoy diy mindpay rek mindem mey; Gor nimbip dinimuņ rek ayniņgamb. ⁴ Kun ak biynimb yimb yomb diniņg ñapan sikoy biy rek mindiy mey, biynimb nuk diy kond mindeniņgamb namb ak biynimb yomb rek mindeniņgambay. ⁵ Pen biynimb yip gosimb niņiy, ñapan sikoy biy rek direp giniņgambay gok; kuyip nep mer, yip sek direp giniņgambay.

Biynimb Nup Kisen Nep Gos Niņbay Gok Kuyip Tap Timey Gi Yombay
(Mak 9:42-48; Luk 17:1-2)

⁶ “Pen biynimb gunap biynimb yip gos kilis giy ma niņbay bap gey apyap pikniņgamb ak, timey yimb giniņgambay. Kuyip tiwniņg dam ñiņg yomb ak yokey ñiņg ñimbiy kumbiyap ak girep gipyap. Yenen: kim mindiy timey giniņgambay kun rek yiwur yomb yimb diniņgambay.

⁷ “Biynimb mankumb biy mindpay gok miker yimb giniņgamb. Miñ timey ar ak giy, biynimb gunap kuyip gos ñey, ar kun ak giy apyap pikpay ak, timey yimb gip. Miñ ar kun ak; nind giyiņgipay, miñiy gipay, kisen kunep giniņgambay. Pen biynimb miñ ar kun ak gi yombay gok yiwur yomb yimb diniņgambay.

⁸ “Ñin akaņ, tomb kind nimb bap tap siy tap timey gep rek ayonimuņ; kind kun ak timbrikyoknimimb. Kun giy mey, tap siy tap timey gep ar ak kirgiy, permindep ak diniņgambim. Pen mindrep ma giy, tap siy tap timey gep ar

ak gi dand amiy, mon per yin mindip ak amningambim.

⁹ “Pen windin ninjy tap siy tap timey gep rek ayonimun, windin piskind kun ak tungjiwyoknimimb. Kun giy perper mindenimimb rek ayningamb. Pen mer ak; tap siy tap timey gi mindiy miñmon Hel, mon key yinjap ak amningambim.

*Kanj Siyysiyp Kurgak Angiy Paydon Ay Angak
(Luk 15:3-7)*

¹⁰ “Ninrep ginimimb. ‘Ñapan sikoy gok tap yikop angiy gos ak ma ninnimimb. Gor kuyip ninmindiy, enjol kuyip gok angek, am windin yirik ar nup ak mindyng opay. ¹¹ [Bi bap Ñinuk lum biy wak ak biynimb Nop ker ma mindpay gok kuyip dinyng owak.]

¹² “Bi bap kanj siyysiyp nuk ñin jiwiy onep mamind ak rek mindeningamb. Pen nokom bap kurgeningamb nuk yerer giningamb? Gunap kuyip kirgek tap kaskas ñinyakniñ, nokom kurginingamb anup piyowek amningamb. ¹³ Nimbip niñind aspiyn. Am piyow giranrang diy, miñmiñ yimb giningamb. Kanj nuk niñek tep gip rek ma giningamb; kanj nuk kurgak piyow ninningamb anup niñek tep kun ak key yimb giningamb. ¹⁴ Kun ak rek, Bapiy chin semb biyon mindip ak, ñapan sikoy nuk bap ma kurginimun angiy ninimb.

Mam Ay Gok Kuyip Angrep Ginimimb Angak

¹⁵ “Biynimb Gor nup chingey mam ay angingambim gok, bap nimbip timey gonimun;

am nund yip key mindiy, tap ginimuj kun ak misenj angnimimb. Kun giy angem nindek mey, namam nanay nimbik yimb mindeningamb. ¹⁶ Pen ma nindek; am biynimb nokom akan ominal rek ponind amiy ninmindyakniñ, minim angnimiy. ¹⁷ Pen kun gem ma yimb ninndonimuj; biynimb lotiw opay rek mangiyseñ ninmindyakniñ angnimin. Pen ma ninndonimuj, biynimb tap siy tap timey gipay gok kuyip gipim rek ak ginimimb.

¹⁸ “Kun ak nimbip ninind aspiyn. Minim kun ak rek man ar biy tungasik ay, mer angeningambim, Gor nuk semb biyon mindiy, kunep mer angeningamb; pen yaw angeningambim, nuk kunep yaw angeningamb.

¹⁹ “Ninind yimb aspiyn. Biynimb ominal mankumb biy mindiy, minim anj ar nokom ay, Gor nup angnineningayr; Bapiy semb biyon mindip ak angningayr rek giningamb. ²⁰ Pen biynimb ominal akan, ominal nokom rek, gos yip ninjiy, ap nan-geningambay, yand namb kuyip okok wopsakiy mindeningayn angak.”

Bi Wonj Giñemb Tep Mer

²¹ Piyta Jiysis mindek man sñak apiy angak, “Biyomb! Mam gunap yip ñin yerip yerip rek timey gey kuyip ninjiy kirginim? Ñin onep ar ak rek akan?” ²² Anjek Jiysis angak, “Yand nip, ñin onep ar rek ma angningayn; ñin jiwiy ñin jiwiy onep ar ak rek angningayn.” ²³ Mam gunap nimbip timey gey, ninjiy ma kirginingambim ak, minim mindeningamb. Pen Gor nuk giningamb ak; kesim angning gispiyn biy rek. ²⁴⁻²⁵ Biyomb ak, bi nup wonj giyak gok, tap day yip gok

pen ñim angek, bi tap day nuk maniy yir ñin jiwiy kuñay yimb nep mindek bap nup dand wiyak. Pen bi kun ak tap day yomb yimb mindek, pen ñinimuj rek ma ayak. Kun gek biyomb ak ninjy, binuk gunap kuyip angak, ‘Gip kun ak nup diy; biyn ñapan, tap nuk yerip yerip mindip gok mañgiysek diy, dam maker ayem taweningiy, maniy kun ak dap yip ñinimimb angak.’ ²⁶ Kun angek bi kun ak pen; kongim yimiy, jiy kuyangiy, biyomb anup angak, ‘Nand yip simb ninjy kond mindenimin; tap day nak kun ak mañgiysek day pañgningayn angak.’ ²⁷ Angek, biyomb ak nup simb ninjy, tap day nuk kun ak kirgak.

²⁸ “Kun giy kirgakniñ, nuk pen amiy ninjak; binuk yip wonj giyngipiyr ak ap mindek. Ninjy nup kuñam chichiy diy angak, ‘Nip maniy yir nokom bap ñinik ak, yip pen ñan angak.’ ²⁹ Angek binuk yip wonj giyngipiyr kun ak kongim yimiy, jiy kuyangiy angak, ‘Yip simb ninjy kond mindenimin; tap day nak kun ak, mañgiysek day pañgningayn angak.’ ³⁰ Angek bi kun ak minim nup ak ma ninjy angak, ‘Nip dam kalambis ayeningayn, tap day kun ak day pañgiy nep mey, mis amningamban angiy,’ nup dam kalambis ayak. ³¹ Kun gek binuk yip wonj giyngipay gok kuyip simbwur timey gek, am biyomb kiyk anup minim kun ak angniyak. ³² Angneyak, biyomb ak, binuk kun anup suk angek apek angak, ‘Nand bi timey yimb. Yip siy angambar, nip simb ninjy tap day yand nip mindip ak kirpiyn. ³³ Pen yenen, bi yip wonj gipiyr anup simb ninjy, ma kirpan? ³⁴ Nup pen yenen dam kalambis ay, bi kalambis

kond mindip anup apan, “Nup kalambis ayey, yiwur gakniņ mindiy, tap day yip ak day panġiy nep mis amniņgamb apan” aņgak.’

“Bi kun ak, binuk yip wong giyiņġipiy anup, simb ma niņak ak mey; biyomb ak, bi kun anup dam kalambis ayak. ³⁵ Nimb mam gunap kuyip kunep geniņgambim, Bapiy semb biyoņ mindip ak, nimbip pen kunep giniņgamb. Kun ak kuyip simb yimb niņiy, nimbip timey gipay ak niņiy kirginimimb aņgak.”

19

Biyn Diniņ Pisnep Diniņiy (Mak 10:1-12; Luk 16:18)

¹ Jiysis minim kun ak aņġjiwiyy, miņmon Galiyliy kirġiy; miņmon Jiwdiya Joden niņing kind akdon ken amnak. ² Amek biynimb kuņay yimb nep nup kisen geyak, biynimb tap gak gok kuyip gek suņ ayak.

³ Pen bi Peresiy gok, nup aņgniņon yerip rek aņgnimuņ aņġiy, apiy aņgyak, “Low chin ak, biyn ak tap sikoy bap girep ma gek, nup aņgyokniņg aņgyokniņgambun akan; nand yerip gos niņban?”

⁴ Aņgey Jiysis aņgak, “Baybol buk tikiyak ak nimb ma niņbim? Miņmon alwol gayak niņ ak, bi bap biyn bap gayak. ⁵ Gor aņgak ‘Ar kun ak mey bi gok, nop nonim yip mindiy, biyn diyiņg kuyip kirġiy kiykber jimniy kiner mumbwak nokom yimb ayip aņgak.’ ⁶ Kun ak Gor aņgek mumbwak kiyk nokom ayiņgamb kun ak, bi gunap tikġakiy kuyip aņg tuņgasik keykey ma ayiņġiy aņgak.”

⁷ Jiysis kun angek, bi Peresiy gok nup angyak, “Pen yenen Mosis minim bap tikiy angak, ‘Biyn angyokning; biyn biy pisnep kirsipiyn angyi, minj band bap tikñiy angyoknimimb angak?’”

⁸ Angeyak Jiysis angak, “Nimb biynimb mangyisek, minim kun ak ma niñdiyngipim ak mey, Mosis kun angak. Pen Gor biynimb gayak ñin ak kun ma giyngipay. ⁹ Nimbip aspiyn; bi an biynuk bi bap yip di ger mer; yikop nep angyokiy, biyn kisen diniñgamb ak; Gor niñek timey yimb giniñgamb angak.”

¹⁰ Angek binuk gok angyak, “Bi gok biyn diy yikop kirginiñgiy rek ma ayip ak, biyn ma diniñgiy ak tep rek ayip angyak.”

¹¹ Angeyak Jiysis angak, “Bi mangyisek yikop mindeniñgiy rek ma ayip. Gor biynimb yikop mindeniñgiy angyi angyak gok nep, yikop mindeniñgiy rek ayip. ¹² Bi gunap walak dey mey, biyn ma dipay. Gunap ma ayek mey ma dipay. Gunap Gor biynimb diy kond mindeniñgamb wonj ak gun angyi, ma dipay. Pen minim apim kun ak, biynimb diniñg giniñgiy gok, diniñgiy angak.”

*Jiysis Ñapan Ñañ Gok Kuyip Jun Diniñak
(Mak 10:13-16; Luk 18:15-17)*

¹³ Biynimb gok Jiysis ñapan chinup gok ñin jun ar biyon diniñan angyi, dand apeyak, binuk gok kuyip niñchikiy angyak. ¹⁴ Kun angeyak Jiysis pen ñapan kun gok suk angek wiyakniñ, binuk gok kuyip angak, “Kuyip yenen anj gipim! Ñapan sikoy gok kirgem yip ker wiyan. Gor biynimb diy kond mindeniñgamb gok mey, ñapan sikoy kun

gok rek angak.” ¹⁵ Kun angyiy, ñin nuk ak ñapan sikoy kun gok jun ar ak ay, kuyip bilesiym giy, miñmon wikan bap amnak.

*Bi Tap Kunaynep Mindek Bap
(Mak 10:17-31; Luk 18:18-20)*

¹⁶ Bi bap Jiysis mindek ak apiy angak, “Tiysa. Yand tap yerip tep ak giy, Gor yip dek perper mindeningayn?”

¹⁷ Angek Jiysis angak, “Yenen yip tap yerip tep, tap yerip timey angyiy angninban? Gor nokom mey bi tep. Pen perper mindenim angyiy, low minim angyiy tikyak gok ma timbriknimin angak.”

¹⁸ Angek angak, “Low ar akay rek aspan?” Angek Jiysis angak, “Chip ma ñanngnimimb. Biyn siy bi siy ma ginimimb. Tap siy ma dinimimb. Yesek ma angnimimb. ¹⁹ Nap nanim minim angningiy rek ninjiy kindik ginimimb. Biynimb gunap kuyip, nimb key wasemb aypim rek ginimimb angak.”

²⁰ Kun angek, bi paranj kun ak angak, “Low minim gok mangyisek ninjipiyn. Pen tap yerip ak giy, Gor yip dek perper mindeningayn angak.”

²¹ Angek Jiysis angak, “Mindrep yimb giyn angyiy, tap nak gok mangyisek yokiy maniy diy, biynimb yimgeprek gok kuyip ñiy mey, mind tep gep nand ak mindeningamb Gor miñmon biyon. Pen apiyn rek giy apiy, yand yip tanjonjur angak.”

²² Angek, tap nuk kunay mindek rek, minim kun ak ninjiy, gos kunay ninjing amnak.

²³ Pen nuk kun giy amnakniñ, Jiysis binuk gok kuyip angak, “Yand nimbip ninjind yimb aspiyn.

Biynimb maniy tap kiyk kuḡay mindeningamb gok, Gor nup kosyam gosimb niḡey, kuyip diy kond mindeningamb. ²⁴ Kanj kamel gok, ñiw lekpay miḡan ak amning amningambay; pen biynimb tap kuḡay mindip gok, Gor nup kosyam gos niḡey, kuyip diy kond mindeningamb angak.”

²⁵ Jiysis binuk gok minim kun ak niḡiy, gos yomb niḡiy anḡyak, “Aspan kun ak, biynimb yerip rek gok Gor diy kond mindeningamb?”

²⁶ Anḡeyak Jiysis kuyip niḡyḡ angak, “Biynimb gok key giḡiḡiy rek ma aynḡgamb; Gor nep mey yerer giḡiḡ giniḡgamb angak.”

²⁷ Jiysis kun anḡek, Piyta angak, “Niḡan! Tap chin gok maḡiysek kirḡiy, nand yip nep chinḡiy tapun ak; chin pen tap yerip diniḡgambun?”

²⁸ Anḡek Jiysis angak, “Yand nimbip aspiyn; Bi bap Ñinuk ñin kisen ak mokyaḡ ñiluk giy apiy, biynimb maḡiysek kond mindeningamb. Ñin kun ak mey, nimb bi yip kisen giḡiḡgambim gok kunep anḡen Yisrel biynimb kiḡiḡ onep wiḡiḡan ak kuyip kond mindeningambim.

²⁹ Biynimb yip gosimb niḡiy; numam nunay, nop nonim, korip woḡday, tap yerip yerip okok kirḡiḡgambay gok, Bapiy kuyip sakiy ma giḡiḡgamb. Tap kun gok rek kuyip pen kuḡay yimb ñiy, gek perper mindeningambay.

³⁰ Biynimb kuḡaynep miḡiy yomb mindpay gok, sikoy tam okok mindeningambay; biynimb sikoy tam okok mindpay gok, biynimb yomb mindeningambay angak.”

20

Biynimb Miñ Wayn Woŋg Gipay Anġiy Paydon Ay Anġak

¹ Jiysis kun anġiy anġak, “Gor biynimb diy kond mindeniġamb ak, kesim ar biy rek mindip. Bi wayn woŋg nop bap, bi gunap am dand apen woŋg yip ak giyaŋ anġiy, kisyim tikjakiy, ² am bi gunap piyow niŋiy, nimbip maniy kun kun giy tawniġgayn anġiy, kiy yip minim anġ ar nokom ay, anġyokek am wayn woŋg nup ak gi mindeniġambay. ³ Pen pumb ak yep namb siġak araniġamb won ak, maker namb ak amiy niŋniġamb; bi gunap yikop mindeniġambay. ⁴ Kuyip niŋiy anġniġamb, ‘Nimb kunep am woŋg yip ak geniġambim; nimbip maniy ñimbay rek namb ak ñiniġgayn anġniġamb.’ ⁵ Anġek, am woŋg nup ak geniġambay. Pen pumb-namb yomb biyoŋ won ak sek, pumb kuyim giniġamb won ak sek minim kun ak nep anġiy, bi gunap sek dek, woŋg nup ak geniġambay. ⁶ Pumb saŋind amniġ giniġamb won ak, tip ak maker namb amiy niŋniġamb: bi gunap sek ap mindeniġambay mey; kuyip anġniġamb, ‘Nimb yenen ñin biy woŋg ma giy, yikop yimb mindpim?’ ⁷ Anġek, nup anġniġambay, ‘Bi bap chinup woŋg bap ma ñimb anġniġambay.’ Anġeniġambay anġniġamb, ‘Nimb kunep am wayn woŋg yip ak gem anġek;’ ⁸ am woŋg geniġambay. Duŋgep won ak, biyomb kuskus nuk anup anġniġamb, ‘Am bi woŋg yip gispay gok kuyip anġey apey; bi kisen opay gok maniy

kuyip ak nind ñiy, bi nind opay gok kuyip, kisen ñinimin angningamb.’

⁹ “Angek bi kuskus ak, bi kun gok kuyip suk angek apey, bi pumb pañind amnakniñ ap wong geningambay gok, ap maniy kiyk ak nind diniñgambay. ¹⁰ Pen kiyk kun giy diyakniñ, bi nind angek ap wong geningambay gok maniy yomb ak diniñgambun angningambay ak pen, kisen diying niñningambay maniy namb kun anep diniñgambay. ¹¹ Diy, day bi wayn wong nop nimb ak yip penpen angyi angningambay, ¹² ‘Chin yenen bi kisen opay gok maniy dipay rek nep dipun? Kisyim tikjakiy pumb sinjrimey niñakniñ, wong gon gon yiruk gip ak pen; bi ap sikoy won bap gambay gok, kuyip maniy ñimban rek nep chinup ñimban angningambay.’ ¹³ Angeningambay bi wongday nop nimb ak niñiy, bi kiyk bap nup angningamb, ‘Mam niñan! Nim-bip timey ma gipiyn; maniy ñiningayn apiyn rek ñimbiyn. ¹⁴⁻¹⁵ Bi kisen opay gok, bi nind opay gok yip andip andip ñining ñiningayn; ak tap yand. Kun ak bi gunap yergiy mer angningambay. Kuyip monmon ñimbiyn ak nimbip yenen miluk yowip. Maniy ñimbiyn ak dand korip nimbik amnim angningamb!’

¹⁶ Jiysis kesim kun ak anğ day jiwiy anğak, “Biynimb nind mindpay gok, kisen mindeningambay; biynimb kisen mindpay gok, nind mindeningambay anğak.”

*Jiysis Kumiy Tikjakningayn Angyi Tip Anğak
(Mak 10:32-34; Luk 18:31-34)*

¹⁷ Jiysis Jerusalem amyıng, kinjenamb okok binuk onep wimıngan ak kuyip dand gol okok amiy key mindyakniı angak, ¹⁸ “Niıjim! Chin Jerusalem amon, Bi bap Niınuk nup mimuıng giy, di biyomb Gor nup simbonıgep gok sek, bi low tiysa gok sek niın ar kuyip ak ayeniıngambay, kiyk minim aıngiy aıngniıngambay ‘Bi biy nup pikayep aıngniıngambay.’ ¹⁹ Kun aıngiy, Jiwda kay kuyip niıeniıngambay, nup aıngjiwiı, tapin pikiy, dam mon kiros bak biyoı niıaıgbirikayey kumniıngamb ak pen; niın omiıal nokom mindiy, tip ak tik-jakniıngamb angak.”

*Jemis Yip Jon Yip Biyomb Mindniıng Gos Niırik
(Mak 10:35-45)*

²⁰ Sebediy niınuk omiıal ak kuyip, nonim poıınd Jiysis mindek ak apiy, jun paıngiy angak, “Yand minim bap mindamb aswiın angak.”

Anıek Jiysis angak, “Minim kun ak yerip?”

²¹ Anıek angak, “Yip tep giniıngamb ak; kisen nand kiıyı yomb mindiy, biynimb kond min-denııngamban niın ak, niı yand omiıal ak bak nip siıak pis pis bisginiıngayr angak.”

²² Kun anıek Jiysis pen, yiwur diniıngamb rek paydoı ay angak, “Minim yip aıngniınbim ak, niıırep ma gipim. Nirmiııay niııng silik yand niııniııg gispiın ak kunep niııniııngayr?” Anıek, “Yaw! Niııniııngambur aıngrik.”

²³ Anıerik angak, “Niııınd apiyr. Niııng silik niııniııg gispiın ak niııniııngayr ak pen, an aııınd pis, an yipund pis mindeniıngayr ak ma aııgayniıngayn; minim kun ak Bapiy minim nuk.

Binuk anğayip gok biyomb kun ak rek mindeniğambay anğak.”

²⁴ Binuk omıñal minim kun ak anğerik, binuk onep wanjrem ak niñiy, kuyip mamiymıñay minim yomb anğyak. ²⁵ Jiysis pen kuyip mañgiysek anğek apey anğak, “Biyomb miñmon okok, biynimb gok kuyip kond mindiy minim kilis giy anğey ñawil dipay ak niñbim. ²⁶ Pen kiyk gipay rek ma ginimimb. Bi nimb bap biyomb mindniğ ginimuñ ak, bi tam okok rek mindiy, nimbip gunap woñg giñnimuñ. ²⁷ Pen bi nimb bap, biyomb yimb mindniğ ginimuñ ak, bi sikoy tam okok rek mindiy, biynimb gok woñg giñnimuñ. ²⁸ Bi bap Ñinuk ak, woñg yip giyañ anğiy ma wak; biynimb gunap kuyip woñg giñi dand amiy, kisen tap siy tap timey gipay rek tip kuyip ak diy kumen kiyk kim amniğiy anğiy awak anğak.”

Jiysis Gek Bi Windin Koy Gak Omıñal Ak Tip Niñrik

(Mak 10:46-52; Luk 18:35-43)

²⁹ Pen Jiysis dawin yomb Jeriykow kiring amnakniñ, biynimb kuñaynep kisen giyak. ³⁰ Bi windin koy omıñal ak lor gol siñak bisiğ mindrikniñ, Jiysis asaw anğey niñiy, meñg miñgan dand araniy anğrik, “Depiyt Ñinuk. Chirup simb niñnimin anğrik.”

³¹ Anğerik biynimb gok, kuyipmiñay niñchikiy anğiy, “Kilpul ma anğiy anğyak.” Kun anğeyak, minim kuyip ak ma diy, meñg miñgan dand araniy anğrik, “Depiyt Ñinuk! Chirup simb niñnimin anğrik.” ³² Kun anğer Jiysis ap minderik

siŋak aland giy, kuyipmiŋay angak, “Chirup yer-
gaŋ angyi, suk aspiyr?” ³³ Angek angrik, “Biyomb!
Chirup windin koy gip ak, gey niŋur angrik.”
³⁴ Angerik Jiysis kuyipmiŋay simb niŋiy, windin
kuyip ak diniek, won kun anep suŋ ayek, nuk
amnakniŋ, kisen girik.

21

*Jiysis Nup Kiyŋ Chin Angyi Dand Jerusalem
Amniyak*

(Mak 11:1-11; Luk 19:28-40; Jon 12:12-19)

¹ Jiysis binuk gok yip Jerusalem maŋ maŋ giy,
miŋmon sikoy Betpasiy, Oliyp dum maŋ siŋak am-
jakiy, binuk omiŋal angyokiy angak, ² “Nirmiŋay
miŋmon wikan bindoŋ amiy niŋningayr: dongyi
marip biynimb ma dand tapay bap nonim yip
tiwning ayey mindeningamb. Miŋ ak wisikiy
poŋind winimiyr. ³ Pen biynimb gunap apiy
yenen kanj dongyi chinup ak wisik dand amji-
piyr angeningiy angnimiyr, ‘Biyomb ak wong mindek
anğamb dinging opur anger, yaw anğey dand
winingayr anğak.’” ⁴ Pen kuyipmiŋay yokek
dining amnirik kun ak, bi Gor minim anğep bap
giningamb angyi tikak rek nep gak. Nuk anğak:

⁵ “Jerusalem biynimb kuyip angnimimb, ‘Biyomb
nimb ak dongyi ar bisgiy nimbip ker asaw.
Nuk bi yikop rek bap dongyi ñiluk ar ak
bisgiy asaw angnimimb’ anğak.”

⁶ Pen Jiysis binuk angyokek amnirik omiŋal kun
ak, anğak anğak rek, ⁷ dongyi marip ak sek poŋind
aperik, binuk gok chech tungasikiy, dongyi marip
ar ak ayeyak, ar kun ak bisgak. ⁸ Biynimb

kunaynep Biyomb asaw angyi, chech paryomb kiyk aryon ay mindeyak gok tungasik kinjenram ak ayak. Gunap am minj kas mon kas okok timbrik dapiy ayak. ⁹ Pen nup pinij kus kus giy amying angyak:

“Depiyt tikek, tik dand amiy tikip ak owip biy. Ninim! Gor nup yokek owip. Gor nup tep aspun angyak!”

¹⁰ Jiysis Jerusalem amjakakni, biynimb gok ang amiy apiy giy angyak, “Bi kun ak an angyak.”

¹¹ Angeyak, biynimb Jiysis yip wiyak gok angyak, “Bi biy mey Jiysis; bi Gor minim anjep Nasaret Galiyliy propens nimb ak angyak.”

Jiysis Biynimb Gor Angnjep Korip Biysniys Geyak Gok, Yuk Mis Yokak

(Mak 11:15-19; Luk 19:45-48; Jon 2:13-22)

¹² Jiysis Gor angnjep korip miŋgan biyan amiy: biynimb tap maker ay geyak gok, kuyip mangiysek yukyokiy, bonj band maniy ay yimjik geyak gok tungandikiy, bi yakir yokying cheya bising mindeyak gok tungandikiy gak. ¹³ Kun giying, kuyip ang giy angak, “Baybol buk tikyak ak, Gor angak, ‘Korip yand ak yip angnjep.’ Pen nimb gispim ak, bi tap siydep kapkap weying mindpay korip bap rek ayip angak.”

¹⁴ Pen Jiysis Gor angnjep korip miŋgan kun ak mindakni, biynimb windin koy giy, tomb timey giy gak gunap apeyak, kuyip gek sun ayak. ¹⁵ Nuk tap mageprek gek, ñapan sikoy gok suk angying angyak, “Depiyt Ninuk. Tap mageprek gipan! Wis-ey! angyak.” Pen kiyk kun angeyak, bi Gor nup tap simbonjep yomb gok sek, bi low tiysa

gok sek, kuyip miluk yimb yapek angyak, ¹⁶ “Nip aspay ak niņsipan? Angey kirgiyan angyak.” Angeyak Jiysis angak, “Aspay ak niņsipiyn ak pen; ñapan ñan gok kuyip gos tep ñen, yimb yip dand araniņgambay angyi tikyak ak ma niņbim?”

¹⁷ Kun angyi, kuyip kirgiy, am miñmon sikoy Beteniy kinak.

*Jiysis Mon Kiyaw Bind Ak Angek Milip Gak
(Mak 11:12-14, 20-24)*

¹⁸ Minek Jiysis andkind Jerusalem winiņg, kinjeņnamb okok apek yiwan gek, ¹⁹ kinjeņram gol siņak mon kiyaw bind bap niņiy kiñiņ siņak amiy niņak: maņgiy ma piyak; kas gok nep mindek. Kun gek angak, “Mon bind biy kisen maņgiy ma yimb piyningamb angak.” Kun angakniņ, day kiyaw bind kun ak milip gak. ²⁰ Binuk gok niņiy, wal angyi angyak, “Yergiy mon kun biy kasek milip gisap?” ²¹ Angeyak Jiysis kuyip angak, “Pen niņim! Chin angon kunep ginimuņ angyi, gos okok ma niņnimimb; Bapiy yomb nuk giniņgamb angyi, gos nokom niņem, giniņgamb. Pen kun anep mer; miñmon dum biy liņg ñiņg yomb namb siņak amnaņ angem, gek amniņgamb. ²² Gor chinup direp giniņgamb angyi angnieņem, angnieņgambim rek giniņgamb angak.”

*Nip An Angek Kun Girapan
(Mak 11:27-33; Luk 20:1-8)*

²³ Jiysis Gor angnieņep korip ak amiy, biynimb gok kuyip minim angnakniņ, bi Gor nup simboņgep yomb gok sek, bi minim tungasikep gok

sek apiy, nup angyak, “Nip an kun ginimin, kun ginimin angek, girapan?”

²⁴ Angeyak Jiysis pen angak, “Nimbip minim bap angnjen, yip angñem, pen an angek girapiyn ak, nimbip angñiningayn. ²⁵ Jon biynimb gok kuyip ap ñing pikñak ak, gos nuk key niñiy gak akan, Gor angek ap kun gak?” Jiysis kun angek, kiyk key angnij angnij giy angyak, “Chin Gor yokek ap gak angoningambun; chinup angningamb, ‘Kun ak Jon anjip ak yenen ma niñdipim angningamb.’ ²⁶ Pen Jon gos nuk key niñiy ap gak angoningambun; biynimb gok Jon bi Gor minim angñemb apay rek chinup kuñay angningambay angyak.” ²⁷ Kun angyi Jiysis nup angyak, “Chin ma yimb niñbun angyak.” Angeyak kuyip angak, “Yip ma angñimbim rek yand pen, an angek ap gispiyn ak nimbip ma angñiningayn angak.”

Bi Mamiyminay Angyi Paydon Ay Angak.

²⁸ “Pen nimb yerip gos niñbim? Bi bap ñinuk omiñal mindeningamb. Ñinuk nind ak nup miñiy wayn wonj ak am gey angek, ²⁹ ma am giningayn angyi, kisen pen gos andikiy niñiy, am wayn wonj ak geningamb. ³⁰ Nop pen am ñi kisen anup kunep angek, yaw giningayn angningamb ak pen, ma am giningamb. ³¹ Pen ñi omiñal kun ak, an nop angningamb rek niñdiningamb?” Angek Ji-wda biyomb kun gok angyak, “Ñinuk nind ak nop angningamb rek giningamb angyak.” Angeyak Jiysis angak, “Nimbip niñind aspiyn: nimb yikop mindpikniñ bi takes diy maniy yesek gunap dipay

gok sek, kinjenram biyn gok sek Gor biynimb diy kond mindeningamb kiñiñ ak mindonjun angyi, nimbip tawsak aysipay. ³² Jon bi ñiñg pikñiemb ak apiy nimbip, suñ mindeningambim minim ar ak angyiñyngip ak pen; kindik ma gipik. Bi takes diy maniy yesek gunap dipay gok sek, biyn way siy dipay gok sek minim kun ak niñiy kindik giyak. Kiyk giyak kun ak niñiy, nimb yenen gos kisenimb bap niñiy, Jon nup minim ak ma dipik.

Jiwda Biynimb Sisker Giyak Ar Ak Paydon Ay Angak

(Mak 12:1-12; Luk 20:9-19)

³³ Jiysis angak “Miñiy minim paydon ay bap sek angyning gispiyn. Bi mankumb nop nimb bap miñ wayn wonğ ak gi yimiy wariy giy, miñ mangyi piksimbjakep kiwok bap gayningamb. Gay, miñ mangyi ak ap siy ñiñningiy rek ayip ak niñmindenjun angyi, korip paryomb yiy akyon bap giy; bi gunap kuyip miñ wonğ yip ak kond mindenimimb; kisen piy pik gek, yip gunap nimb gunap dinimimb angyi, miñmon paryomb okok amningamb. ³⁴ Miñ mangyi ak pik gakniñ, binuk gok kuyip, yip gunap am dand wim angek, ³⁵ kiyk amjakey, bi wayn wonğ gi mindeningambay gok tikjakiy, bi bap nup gamb pikningambay; bap nup kamb jiw pikningambay, bap nup pisnep pikayey kumningamb. ³⁶ Kun gey bi miñ wayn wonğ nop nimb kun ak, bi tapin kaw bap pen angyokningamb. Angyokek ameningambay, bi miñ wayn wonğ geningambay gok, kuyip kunep giningambay. ³⁷ Kun gey, bi wayn wonğ nop nimb ak, Niyand ak yoken mey, minim nup

ak niñningambay angyiy, angyokek amningamb.
³⁸ Amjakek, bi wayn wong gi mindeningambay gok nup niñiy, kiyk key angingambay, 'Bi wong nop nimb ñinuk ak asaw biy. Nop tip ak dining gisap rek nup pikayon kumek, kisen tap wong guniy mangyisek diningambun angingambay.'
³⁹ Kun angyiy, nup dand wongday gol okok amiy, pisnep pikayningambay.

⁴⁰ "Kun geningambay, kisen bi wongday nop nimb ak apiy, kuyip yerer giningamb angak."

⁴¹ Angek Jiwda kay angyak, "Bi timey giningambay kun gok kuyip geningamb, yiwur yomb yimb diy kumningambay. Kisen pen biynimb tep gunap diy, kuyip miñ wayn wong nup dayeningamb, wong kun ak giningambay. Miñ mangyiy pik giningamb ñin ak, nup rek ak jiw dam ñiningambay angyak."

⁴² Angeyak Jiysis angak "Ak niñind apim. Baybol buk minim tikyak ak niñbim rek ayip. Tikiy angyak;

'Bi korip gep gok kamb ma dinjun angyiy kirgiyak ak; miñiy korip sap namb biyan rek ak mindip. Gor kun gek niñon, tep yimb gip angyak.'

⁴³ "Korip sap namb biyan nup ma dipim kun ak, Gor nimbip Jiwda kirgiy, biynimb key okok nimb tap nup ñemb rek mindeningambay gok kuyip diy kond mindeningamb. ⁴⁴ Biynimb kamb ar kun ak apyap pikningambay gok kuyip tapin nep pikningamb; biynimb kamb kun ak punjiw apyapiy aybirikningamb gok, pisnep piksimb-jakningamb angak."

⁴⁵ Bi Gor nup simbonḡep yomb gok sek bi Peresiy gok sek, Jiysis minim paydoḡ ayak kun ak kuyip nep aḡgek, ⁴⁶ nup miñ ayun aḡgiy gos niḡyak ak pen; biynimb gok Jiysis nup bi Gor minim aḡgep aḡgyak ak niḡiy, chinup kuḡay aḡḡniḡḡambay aḡgiy, nup tap bap ma giyak.

22

Gor Biynimb Diy Kond Mindeniḡamb Ak, Kesim Ar Biy Rek Mindip

¹ Jiysis tip ak paydoḡ ay aḡgak, ² “Gor biynimb diy kond mindeniḡamb minim ak aspiyn biy rek:

“Bi kiḡḡ bap ñinuk ak biḡn diniḡ gek, tap yomb ñiḡniḡ, keñmaḡgiy dap nan-giy, ³ binuk gunap aḡgyokiy, biynimb aḡḡaynik gok am aḡgem aḡey, tap yomb ak ñiḡun. Aḡgek am biynimb kun gok kuyip aḡḡniḡambay ak pen; kiḡk kir-giniḡambay. ⁴ Kun gey binuk gunap pen tip ak aḡgyokiy aḡḡniḡamb, ‘Nimb am biynimb kun gok kuyip aḡḡnimimb, “Biyomb ak, makaw yomb gunap, marip gunap pikay, tap okok maḡgiysek moka giy, wiḡniḡiy aḡḡip aḡḡnimimb!” ’ ⁵ Kun aḡgek kiḡk am aḡḡeniḡambay, minim kuyip ak diyokniḡambay. Gunap tap woḡḡ kiḡk okok amniḡambay. Gunap maniy woḡḡ kiḡk ak geniḡambay. ⁶ Pen gunap, kiḡḡ bi nup gok gi timey giy, pikayey kumniḡambay.

⁷ “Kun gey, kiḡḡ niḡek simbwur nup ak timey gek, amiybi nuk gok aḡgyokek, am biynimb timey giniḡambay kun gok kuyip pikaydiy, korip kuyip gok daḡḡiyjiw pikey amniḡamb. ⁸ Pen bi nup woḡḡ giñemb gok kuyip aḡḡniḡamb,

‘Keñmanġiy tap gok danġiy nan-gipun ak pen; biynimb nind suk anġnik gok ma opay. ⁹ Kun ak nimb am kinjeŋ tam okok mindiy, biynimb niŋnimimb okok kuyip monmon poŋind apem tap yomb ñinjun anġniŋgamb.’ ¹⁰ Kun anġek binuk gok am kinjeŋ tam okok mindiy, biynimb timey giniŋgambay gok, biynimb tep giniŋgambay gok monmon poŋind apey; biyn diy tap yomb ñiŋniŋgambay korip miŋgan kun ak timbik giy yimb anġiy mindeniŋgamb.

¹¹ “Bi kiyŋ ak pen; biynimb opay kun gok niŋiyn anġiy, korip miŋgan biyaŋ amiy niŋniŋgamb: bi bap chech ay korip miŋgan kun biyaŋ owep ak ay ma mindeniŋgamb. ¹² Kun gek nup anġniŋgamb ‘Buŋġiy! Yenen, biyn diy tap ñiŋniŋg chech aypay ak ay mer; yikop nep ap mindpan?’ Anġek bi kun ak pen minim bap ma anġeniŋgamb, ¹³ bi kiyŋ ak binuk gok kuyip anġniŋgamb, ‘Bi biy ñin tomb nup gok tiwniŋgrimbikiy, dam kisyim owip namb akyaŋ diyokem, biynimb mindpay kun gok yip meŋg kamb siwbirikiy, siy anġ mindeniŋgiy anġniŋgamb.’ ”

¹⁴ Jiysis paydoŋ ayak minim kun ak anġdiy, kuyip anġak, “Gor biynimb kuŋaynep suk anġip ak pen; maŋġiysek ma diniŋgamb. Biynimb gunap nep diniŋgamb anġak.”

Gapman Biyomb Siysa Nup Takes Ñemb Akan Anġyak

(Mak 12:13-17; Luk 20:20-26)

¹⁵ Pen bi Peresiy gok, Jiysis nup minim yerip ak anġon, pen anġek niŋiy, nup dam miñ ayjun anġiy, minim anġniŋ anġniŋ giy, ¹⁶ bi kiyk key

gunap, Herot binuk gunap yokey, Jiysis mindek ak amiy angyak, “Nand bi minim niñind yimb nep apan. Bi gunap niñiy ma pirikpan, Gor angyip rek nep niñiy biynimb angnimban. ¹⁷ Kun ak nand gos yerip niñban? Chin Yisrel biynimb gok, Siysa biyomb miñmon Rom nimb anup takes pikep akan ma pikep?” ¹⁸ Angeyak Jiysis minim yesek angyak kun ak niñiy angak, “Yip yenen nembnemb giying ap kun giy angninbim? ¹⁹ Takes pikpay maniy bap ñem niñiyn angak.” Angek nup maniy won bap dap ñeyak niñiy, ²⁰ kuyip angak, “Maniy won kun biy an kawnan ak sek, yimb ak sek mindip?” ²¹ Angek angyak, “Ak biyomb Siysa mindip angyak.” Angeyak Jiysis kuyip angak, “Kun ak Siysa yip ginimimb angyip gok, nup ginimimb; Gor yip ginimimb angyiy niñimb gok, nup ginimimb angak.” ²² Kun angek kiyk gos kunay niñiy, nup kirgiy amniyak.

Kumiy Tip Tikjakpay Akan Angyiy, Jiysis Nup Angninyak

(Mak 12:18-27; Luk 20:27-40)

²³ Ñin kun anep, Sanjiwsiy bi gunap Jiysis mindek ak wiyak. Sanjiwsiy biynimb gok biynimb kumiy tip ma tikjakpay apay ak mey, ²⁴ Jiysis mindek ak apiy angyak, “Tiysa. Mosis angak, ‘Bi bap biyn diy, ñapan tikiy mer, yikop kumeningamb, numam bap biyn kun ak diy, ñapan nup gok angyiy tikningamb angak.’ ²⁵⁻²⁸ Kun ak, bi kiñiñ sek onep ar ak mindeningambay. Numam nind ak biyn diy, ñapan tikiy mer yikop kumningamb. Kun gek, numam namb ak pen, biyn kun anep diy, ñapan tikiy mer, yikop kumningamb. Kun

anep gi dam dam, numam onep ar ak, mangiysek ñapan tikiy mer; yikop nep kumningambay. Pen biyn ak kunep kumningamb. Kun ak biynimb kumbay gok tikjakningambay ñin ak, biyn kun ak an diningamb?”

²⁹ Angeyak Jiysis kuyip pen angak, “Nimb Baybol buk minim ak ma niñiy, Gor gip rek ma niñiy gipim ak mey, yesek angyi apim, ‘Biynimb gok kumiy ma tikjakningambay apim.’ ³⁰ Pen tikjakningambay ñin ak, biyn gok bi ma diningambay bi gok biyn ma diningambay; enjol semb biyon gok mindpay rek ak yikop mindeningambay.

³¹ “Nimb biynimb kumiy ma tikjakpay apim ak, Baybol buk minim tikyak gunap ma niñbim rek ayip. ³² Gor angak, ‘Yand Gor yikop bap mer: Ebrahim, Aysek, Jekop Gor kiyk mey, yand mindpiyn angak.’ Biynimb pisnep kumbiyap ak, Gor yergiy bi nind kumyak kun gok bi yand apkop. Bi kumey komyak kun gok, kim mindpay ak mey; kuyip angak, ‘Gor kiyk yand mindpiyn angak.’”

³³ Jiysis minim kun ak angek, biynimb mindeyak gok niñey kuyip tep yimb gak.

Low Yomb Yimb Ak
(*Mak 12:28-31; Luk 10:25-28*)

³⁴ Jiysis minim kun ak angrep gek, Sanjiwsiy bi gok minim bap pen angningiy rek ma ayak. Pen bi Peresiy gunap, Jiysis angak minim kun ak niñiy, mindek ak wiyak. ³⁵ Bi kiyk low niñrep gak bap Jiysis yerip rek angnimun angyi angak, ³⁶ “Tiysa. Gor low ayak minim ak, minim ar akay nup, minim yomb yimb mindip?”

³⁷ Angek Jiysis angak, “ ‘Gos timund nand ak mangiysek Gor ker amek, nup wasemb yimb aynimin.’ ³⁸ Minim yomb yimb mey kun ak. ³⁹ Minim yomb bap mey; ‘Nand key wasemb aypan rek biynimb gunap kuyip, wasemb aynimin.’ ⁴⁰ Gor low minim Mosis tikak gok sek, bi minim nup angep gunap tikyak gok sek mangiysek, minim junj yomb yimb mey ominal kun ak nep angak.”

Jiysis Angak Bi Kiyη Yomb Key Yimb Apim Ak An Angak

(Mak 12:35-37; Luk 20:41-44)

⁴¹ Peresiy kay ap nan-giy mindyakniη, Jiysis kuyip minim bap angniniη angak, ⁴² “Nimb Kiyη yomb key yimb ak nup yerip gos niηbim? Nup an ñinuk angiy niηbim?”

Angek, “Depiyt ñinuk angyak.”

⁴³ Angey Jiysis angak, “Niηind apim ak pen, Gor Kawnan ak Depiyt nup gos ñakniη, nuk Kiyη yomb chin anup ‘Biyomb yand’ angak. Minim angak kun ak, Baybol buk tikiy angyak ak niηbim. Depiyt angak:

⁴⁴ ‘Gor Biyomb yip anup minim angay angiη, “Nand kund bak yip ak mindiy mey; yand gen biynimb nip alemb alemb ñimbay gok kuyip, tomb beη okok tawbirikniηgamban angiη” angak.’

⁴⁵ Depiyt angak kun ak nimb yenen apim, ‘Depiyt tikek, tik dand amiy, bi kiyη yomb key yimb ak nup tikpay apim.’ Pen Depiyt Biyomb yimb nuk ak mey, kiyη yomb key yimb apkip ak tep angak.”

⁴⁶ Jiysis minim nuk ak angrep gek, kiyk nup pen

anğniñgiy rek ma ayek mey, kisen nup minim kun gok rek gunap sek ma anğniñyak.

23

*Bi Peresiy Gok Sek, Bi Low Tiysa Gok Sek
(Mak 12:38-39; Luk 11:43, 46; Luk 20:45-46)*

¹ Kisen ñin bap, Jiysis binuk gok sek, biynimb yikop gunap sek kuyip minim anğiy anğak, ²⁻³ “Bi low tiysa gok sek, bi Peresiy gok sek minim kilrimey anğñimbay ar ak ma ginimimb; Mosis wosrey anğak rek anğñimbay ak nep ginimimb. ⁴ Minim kilrimey apay ak wand miker yomb gok rek biynimb gok kuyip gom ñimbay ak pen; kuyip simb niñiy ma tuñgasik dipay. ⁵ Chinup niñyan anğiy, Baybol buk tikiyak minim gunap di jun-chenğ biyon akan, ñin kind okok aybirikiy tapay. Gor binuk mey gok anğyan anğiy, chech paryomb miñ daywur sek tep gok aypay. ⁶ Lotiw akan, tap yomb ñimbay namb ak amiy, biyomb bispay cheya ar ak nep bispay. ⁷ Biynimb kuñay mindpay namb okok amon, tiysa aswan-ey anğey, chinup tep gan anğiy niñbay.

⁸ “Pen nimb mam kiñiñ nokom mindpim rek, nimbip tiysa ma anğniñgiy. Tiysa nimb ak, nokom bap nep mindip. ⁹ Man ar biy, bi gunap kuyip ‘Bapiy’ ma anğnimimb. Nap nimbik nokom yimb ak mindip; semb biyon. ¹⁰ Nimbip biyomb chin ma anğniñgiy. Biyomb nimbik ak mey, Kiyñ yomb anep. ¹¹ Nimb biyomb yimb mindniñ ginimimb ak; bi woñğ giñemb rek ak mindenimimb. ¹² Biynimb yimb kiyk key dand araniñgambay gok, yimb kuyip yowniñgamb: pen

biynimb yimb ma dand araniᅅgambay gok, yimb yomb diniᅅgambay.

Biynimb Tep Mindpun Anᅅiy Pen Mindrep Ma Gipay Gok

¹³ “Nimb low tiysa gok sek, Peresiy gok sek nimbip minim yomb mindip rek, nimbip simb niᅅsipyin. Nimb key Gor biynimb diy kond mindeniᅅgamb miᅅᅅan ak ma amiy, biynimb amniᅅᅅ gipay gok kuyip kinjeᅅ tikpim.

¹⁴ “Nimb low tiysa gok sek, Peresiy gok sek minim yomb yimb mindip rek, nimbip simb niᅅsipyin. Nimb biyn palpal korip tap kuyip gok siy diy apiy, gipun kun ak niᅅniᅅgambay anᅅiy, Gor nup minim paryomb yesek gok nep anᅅniᅅbim. Gipim kun ak, yiwur yomb yimb ak nimbip giniᅅgamb.

¹⁵ “Nimb low tiysa gok sek, Peresiy gok sek minim yomb yimb mindip rek, nimbip simb niᅅsipyin. Nimb yesek yimb gipim! Biynimb gok minim chinup ak niᅅiy kisen giyaᅅ anᅅiy, miᅅmon okok piyow taᅅiy, gunap niᅅiy anᅅrep gem, nimb rek mer; Seytan biynimb nuk yipund giy yimb aypay.

¹⁶ “Biynimb gok kuyip Gor kinjeᅅ ar ak yomrep gipun apim ak pen; nimb bi windin koy ma niᅅbim. Gipim kun ak, minim yomb yimb mindip; nimbip simb niᅅsipyin. Biynimb gok kuyip minim anᅅᅅiy apim, ‘Gor anᅅniᅅep korip mindip rek, niᅅind apun anᅅiy minim anᅅay, kisen minim kun ak kirginiᅅᅅ kirginiᅅgambun. Pen tap gol diy giyak korip miᅅᅅan akyaᅅ mindip gok, yimb anᅅyiᅅᅅ minim anᅅay, giniᅅgambun

apim.’ ¹⁷ Nimb bi windin koy yimb. Yesek anġiy, ‘Gor anġniġep korip ak tap yimb mer, tap gol diy gipay gok mey tap yimb apim.’

¹⁸ “Minim bap kunep niġrep ma giy, biynimb gok kuyip anġniġiy anġiy, ‘Gor kamb bind nuk mindip rek niġind aspun anġiy, minim anġay giniġgambun ak, yikop minim anġayniġgambun; kisen gos bap niġiy, minim anġay anġnuk kun ak kirginiġ kirginiġgambun. Pen tap Gor nup simbongipay gok mindip rek niġind aspun anġiy, kisen gos bap key niġiy key ginjun rek ma ayniġgamb; apun rek nep giniġgambun apim.’

¹⁹ Nimb biynimb gos timund ma ayak gok. Tap yerip yomb? Tap pik Gor nup simbongipay gok yomb akan; kamb bind suġ-tep nup tap pik simbongipay ak yomb? Omiġal giy tap yomb yimb! ²⁰ Kamb bind mindip rek niġind apun anġniġgambun ak; tap danġiypay ar kun ak sek anġniġgambun. ²¹ Pen Gor anġniġep korip mindip rek niġind apun anġniġgambun ak; korip nuk ak nup sek anġniġgambun. ²² Semb biyoġ mindip rek niġind apun anġniġgambun ak; miġmon nuk ak, nup sek anġniġgambun. Minim kilis kun ak rek anġiy, kisen kirgep rek ma ayniġgamb.

²³ “Nimb low tiysa gok sek, Peresiy gok sek minim yomb mindip rek, nimbip simb niġsipyin. Minim biynimb gunap kuyip anġniġbim gok nimb key ma gipim. Sinimb silik, tap monmon woġgday jakip ak niġem tap yimb rek ayek, niġ panġem wanġrem ak amek, Gor nup nokom bap niġun anġiy per opriy niġbim. Tap sikoy sikoy gok per kun gipim ak pen; yenen minim junj yimb ak

kun ma gipim. Biynimb gok kuyip timey ginimun miñ ar ak ma ginimimb; kuyip simb niñiy yipund ginimun ar ak ginimimb. ²⁴ Biynimb gok kuyip kinjeñ yomun apim ak pen; nimb key biynimb windin koy. Tap achimb gok niñem tap yimb rek ayip ak pen; tap misen mindip gok ma niñbim.

²⁵ “Nimb low tiysa gok sek, Peresiy gok sek minim yomb mindip rek, nimbip simb niñsipyin. Piler kap nimb gok rek mis okok ken ñiñg ayokrep gipim ak pen; namb biyañ tap siy tap timey gach ak aranjakiy mindip. ²⁶ Nimb Peresiy biynimb gok gos timund ma ayak. Piler kap nimb gok miñgan akyañ nind wasyim gi tep gem mey; mis okok ken kunep mind tep giniñgamb.

²⁷ “Nimb bi low tiysa gok sek, Peresiy gok sek minim yomb mindip rek, nimbip simb niñsipyin. Chip kamb miñgan okok komiy, kinjeñ giñiy, pen tund ak pikey, biynimb niñey tep mindip ak pen; miñgan akyañ kuy timey apyñg mindip. ²⁸ Kun ak rek meñg miñgan nimb ak mindip.

²⁹ “Pen nimb bi low tiysa gok sek, Peresiy gok sek minim yomb mindip rek, nimbip simb niñsipyin. Nimb bi minim ñiñg nep pikpim ak, nimbip yiwur yomb yimb giniñgamb. Bi Gor minim anğep wosrey ñanğey komyak kaw ar ak, girep giyñg apim, ³⁰ ‘Apis basind sikop giyak rek, chin kuyip ma ñapnup apim.’ ³¹ Pen apim kun ak; bi Gor minim anğep gok kuyip pikayñgipay kind ak mindpun anğiy apim. ³² Nimb miñ key ar ak ma gipim; kiyk giyak rek gipim. ³³ Siyñ saraw rek giranğ giranğ, kisen Gor biynimb kor giy, mon key yinğap yokniñgamb ñin ak, yergiy pirik key

okok amningambim? Mer yimb! Kinjen nimb bap ma mindeningamb.

³⁴ “Kun ak nimbip aspiyn: Gor angak, ‘Yand bi Gor minim anjep gunap, bi niñrep gipay gunap, bi tiysa gunap yoken nimbip ker apeningambay, gunap pik ayningambim; gunap mon bak biyon ñangbirikningambim, gunap lotiw korip nimbik miñgan ak pikningambim, gunap pirik amniyakniñ, miñmon okok okok yuk yokningambim angak.’ ³⁵ Gor angak kun ak rek gipik ak mey; Gor biynimb suñ-tep nup gok wosrey ñangey wip rek minim yomb ak dinatingambim. Andam ñinuk Ebol nup nind kiñiñ gi ñangiy, ñang dand apiy ñang dand apiy, kisen Berekaya ñinuk Sekaraya nup, Gor nup angniñep korip ak bindoñ, kamb diy giyak bind ak bindoñ mindakniñ, namb siñak ñangpikayak. ³⁶ Gipim kun ak, miker yomb ak nimbip Jiwda kay miñiy mindpim gok ker and-kind winingamb angak.”

*Jiysis Jerusalem Niñek Simb Gek Siy Angak
(Luk 13:34-35)*

³⁷ “Jerusalem biynimb simb gip yand guniy. Bi Gor minim anjep gok kuyip yoken korip miñmon nimbip ak apey, kamb diy pernep pikaypim. Nimbip kakaruk nonim ñiluk gok kuyip gipay rek, dam pil miñgan yand okok ayniñ gipiyn ak pen; yip niñiy kirpim. ³⁸ Miñiy Gor yip ma mindeningambim; Gor angniñep korip nimbik mindip ak pen; keynep mindeningambim. ³⁹ Yip ma yimb niñningambim; Gor kiyn yomb chinup angiy yokip biy, tep yimb yokek wip angningambim ñin anep mey, yip tip ak niñningambim angak.”

24

Gor Anjñep Korip Tunj Waniñningambay Angak

(Mak 13:1-2; Luk 21:5-6)

¹ Jiysis Gor anjñep korip ak kirgiy mis anakniñ, binuk gok nup angyak, “Gor anjñep korip tep guniy niñan angyak.” ² Angeyak kuyip angak, “Nimb tap kun gok mañgiysek niñiy aspim ak pen; yand nimbip niñind yimb aspiyn; kisen ap korip kun ak tunj waniñningambay, kamb bap kamb bap ar ak ma mindeningamb angak.”

Mindrep Ma Giniñgambay

(Mak 13:3-13; Luk 21:7-19)

³ Jiysis am Oliyp dum bisinğ mindakniñ, binuk gok apiy, nup kapkap anjñiy angyak, “Gor anjñep korip tunj waniñningambay apan ak, minek akay rek kun giniñgambay? Chin tap yerip ak gek niñiy anjñingambun, Jiysis mañ asaw; miñmon biy mañgiysek kurginiñgamb angyi niñningambun angyak.”

⁴ Angeyak Jiysis angak, “Niñrep yimb ginimimb. Biynimb gunap nimbip tom giniñgambay.

⁵ Bi kunjaynep apiy, biynimb gok kuyip tom giy, yimb yip ak diy yand nep Krays anjñingambay.

⁶ Mañ okok penpen gey giw angek niñningambim; paryomb okok penpen gey minim anep apek niñningambim. Kun gek niñiy, ñin kisen ak winiñg gisap angyi ma piriknimimb. Ak yikop penpen ñanjñingambay. Ñin kun ak kisen winiñgamb. ⁷ Biynimb wikan gunap tikjakiy, biynimb wikan gunap yip penpen giniñgambay.

Miñmon okok mañgiysek monmon apiy, yiwan yomb sikerek apiy giniñgamb. ⁸ Kun geniñgamb nimbip biyn ñapan ñiñimb rek ak gek, mañ mindip añgiy niñningambim.

⁹ “Biynimb yand mindeniñgambim rek, biynimb miñmon okok mañgiysek nimbip yiruk niñiy, dam kalambis ay, gi timey giy, pisnep pik ayniñgambay. ¹⁰ Ñin kun ak, biynimb kuñaynep Gor nup gos ak kirgiy, numiy numam kiyk key gok yiruk niñiy, di bi ñañgep gok ñin ar ak ayniñgambay. ¹¹ Pen kuñaynep, chin biynimb Gor minim aņgep aņgiy, biynimb gok kuyip tom giniñgambay. ¹² Miñ timey ar ak gey gey, biynimb mañgiysek rek gos ar kun ak niñiy; wasemb ayep ar ak sakiy giniñgambay. ¹³ Pen biynimb Gor nup chingiy, wasemb ayiņ nep mindeniñgambay gok, dand amek perper mindeniñgambay. ¹⁴ Pen Gor biynimb diy kond mindeniñgamb minim tep ak, miñmon okok mañgiysek aņgñey amdeniñgamb nep, ñin kisen kun ak winiñgamb.

Bi Bap Gor Aņgniņep Korip Ak Timey Yimb Giniñgamb

(Mak 13:14-23; Luk 21:20-24)

¹⁵ “Pen bi Gor minim aņgep Daniyel wosrey aņgak rek ak giniñgamb. Nuk aņgak, ‘Gor aņgniņep korip, nup tap simboņgipay tip siņak, tap asik timey yimb bap dayeniñgambay niñningambim aņgak.’ Minim kun biy riyt giniñgambim gok niñnimimb. ¹⁶ Nimb Jiwda biynimb, tap timey kun ak niñiy, kasek pirik yirik okok amnimimb. ¹⁷ Biynimb korip aryoņ mindeniñgiy gok, tap chin gunap dun aņgiy, andkind

korip miŋgan ma amniŋgiy. ¹⁸ Biynimb wonŋday okok taŋgeniŋgiy gok, chech chin gok dun aŋgiy, andkind korip ma amniŋgiy. Kasek pirik amnimimb. ¹⁹ Biyn ñapan koŋgiy sek mindeniŋgambay gok, biyn ñapan ŋaŋ dand taŋgeniŋgambay gok kosyam yimb amniŋgambay.

²⁰ “Giniŋgamb kun ak, Gor nup aŋgniŋey, yombip ñin ak ma ginimuŋ. Lotiw ñin nimb ak ma ginimuŋ. ²¹ Yenen, wosrey miñmon alwol gayak ñin ak tikiy, mind dand apiy miñiy mindpun ñin biy, timey kun ak rek ma gak. Kisen kunep timey kun ak rek ma giniŋgamb. ²² Yikop ak per gek, biynimb maŋgiyse kumdipyap. Pen Biyomb ak biynimb nuk diniŋgamb gok kuyip simb niŋiy mer aŋgek mey, per ma giniŋgamb.

²³ “Ñin kun ak biynimb gunap nimbip Kiyŋ yomb key yimb ak mindip biy, mindip bindoŋ aŋgey, niŋind apay aŋgiy gos ak ma niŋnimimb. ²⁴ Bi gunap Gor biynimb aŋgayak nuk gok kuyip diniŋg yesek aŋgiy yand mey Krays; yand mey bi Gor minim aŋgep ak aŋgiy, tap mageprek gunap giniŋgambay. Kun ak niŋrep ginimimb. ²⁵ Tap yerip yerip kisen giniŋgamb ak, nimbip aŋgñispiyn ak mey; niŋyiŋg mindenimimb.

²⁶ “Biynimb gunap Kiyŋ yomb key yimb ak ap mindip miñmon nep namb okok aŋgey, niŋniŋg ma amnimimb. Pen ap weyiŋg mindip akniy aŋgey, niŋind apay aŋgiy ma niŋnimimb. ²⁷ Bi bap Ñinuk winiŋgamb ñin ak, añiñak diy, kasin maŋgiy bol ak, day biym nimb day binen amimb rek ak gakniŋ winiŋgamb. ²⁸ Miñ miŋgan mon miŋgan,

kamb miŋgan okok ma kun giniŋgamb; misen nep giniŋgamb.

*Bi Bap Ñinuk Winiŋgamb
(Mak 13:24-27; Luk 21:25-28)*

²⁹ “Pen miker yomb kun ak gi tikdakniŋ, pumb ak kisyim apiy takin ak melik ma giniŋgamb. Gap gok semb biyoŋ nimb puŋgiw yowniŋgamb. Kun gakniŋ tap semb ar biyoŋ gok, okok nimb okok nimb giniŋgamb. ³⁰ Ñin kun ak, Bi bap Ñinuk winiŋg gakniŋ, semb ar biyoŋ key ayek, biynimb miŋmon okok keykey mindpay rek niŋiy, siy aŋginiŋgambay. Nuk Nop kilis ak diy, melik yomb sek, semb sek awakniŋ niŋniŋgambay. ³¹ Biykul yomb aŋgakniŋ, enjol nuk gok aŋgek, biynimb nuk diniŋgayn aŋgiy niŋayak gok diniŋg, mankumb biy ayak rek kind kind amiy diy, dand nup ker winiŋgambay.

³² “Nimb niŋbim. Mon gok silup ay wos gakniŋ, pumb ayniŋ gisap aŋgiy niŋbim. ³³ Kun ak rek, kisen tap apiyn gok gakniŋ, “Jiysis winiŋgamb ñin ak miŋiy maŋ yimb asaw; won ñap mindiy, apchakniŋgamb aŋgiy niŋniŋgambim. ³⁴ Biynimb miŋiy mindpay gok ma kumniŋgambay, kim mindyakniŋ, tap kun gok maŋgiysek giniŋgamb. ³⁵ Semb ar biyoŋ sek, mankumb biy sek kurginiŋgamb; minim yand ak perper mindeniŋgamb.

*Ñin Akay Winiŋgayn Ak Ma Niŋbim Aŋgak
(Mak 13:32-37; Luk 17:26-30, 34-36)*

³⁶ Won akay rek, ñin akay rek winiᅇgayn ak, biynimb ma niᅇbay: enjol gok ma niᅇbay; yand kunep ma niᅇbiyn; Bapiy nuk nep niᅇimb.

³⁷ “Pen andkind winiᅇgayn ñin ak, Nowa mindek ñin ak, gi mindyiᅇgipay rek nep gi mindeniᅇgambay. ³⁸ Nowa mindek ñin kun ak, ñiᅇg ak biynimb gok kuyip ma yiw gak won ak; biyn bi diyiᅇg, tap ñimbyiᅇg gi mindyakniᅇ, Nowa siyip miᅇgan ak amek, ñiᅇg ap kuyip maᅇgiysek yiw gak. ³⁹ Pen kiyk tap bap giᅇniᅇgamb aᅇgiy am niᅇyak; ñiᅇg ak kuyip yiw gakniᅇ nep niᅇyak. Bi bap Ñinuk winiᅇgamb minek ak, kun ak rek nep gi mindyakniᅇ, winiᅇgamb. ⁴⁰ Ñin kun ak, bi omiᅇal woiᅇgday okok, woiᅇg gi mindeniᅇgayr ak; bap diy, bap kirginiᅇgamb. ⁴¹ Pen biyn omiᅇal palaw giᅇniᅇg, wiyt maᅇgiy piksimbjakyiᅇg gi mindeniᅇgayr; bap diy, bap kirginiᅇgamb.

⁴² “Kun ak Bi bap Ñinuk winiᅇgamb ñin ak ma niᅇbim rek, niᅇrep giyiᅇg mindenimimb. ⁴³ Bi korip nop nimb ak bi tap siydep gok asway aᅇgiy, niᅇmindek, tap nup gok ma siy dipay. ⁴⁴ Kun ak rek nimb minj moka giy mindenimimb. Mer ak: Bi bap Ñinuk ma asaw aᅇgiy, sakiy sakiy giy mindeniᅇgambim ñin ak winiᅇgamb.

*Woiᅇg Tep Gipay, Timey Gipay, Aᅇgak
(Luk 12:14-48)*

⁴⁵ “Biyomb bap kinjeᅇ amniᅇg giy, bi nup direp giᅇniᅇgamb ak nup aᅇgniᅇgamb, ‘Bi woiᅇg yip giᅇimbay gunap kuyip kond mindiy, tap keᅇmaᅇgiy kuyip gok bilok ñirep giyiᅇg mindenimin aᅇgiy,’ aᅇgay amniᅇgamb. ⁴⁶ Kisen andkind

apiy angningamb rek gek ninjiy, nup di tep yimb giningamb. ⁴⁷ Ninjind yimb aspiyn: nup angek tap nuk gok manjiysek kond mindeningamb.

⁴⁸ Pen binuk angayningamb ak mind dand amiy mindrep ma giy, biyomb ak miñiy ma winingamb anjiy, ⁴⁹ biynimb wong giñemb gunap kuyip tapin pikiy, am bi ñiñg ñimbiy sakiy aypay gok yip wop-sakiy, tap yomb ñimb gi mindeningamb. ⁵⁰ Pen biyomb kasek ma winingamb anjiy, monmon gi mindeningamb ñin ak apiy, ⁵¹ nup gi timey yimb giy, biynimb tap siy tap timey wey weygiy gi mindpay gok yip angayeningamb; am menng siwbirikiy, siy angmindingamb.

25

Pañ Piñ Onep Wanjrem Anjiy Paydon Ay Angak

¹ “Gor biynimb diy kond mindeningamb ñin kun ak; kesim diniñg gispiyn biy rek giningamb. Biyomb bap biyn diniñg gek, tap yomb ñiñning biyn piñ onep wanjrem ak lam keykey diy dand amningambay. ² Biyn piñ kun gok, onep mamind ak gos tep niñningambay; onep mamind ak gos niñrep ma giningambay. ³ Niñrep ma giningambay kun gok, lam dangiyep wel gunap sek dand ma amningambay. ⁴ Pen biyn piñ gos niñrep giningambay gok, lam diy, lam dangiyep wel gunap botol miñgan ak pangiy, dand amningambay. ⁵ Pen biyn piñ kun gok kiyk manjiysek amjakiy, kond mindey mindey, bi biyn diniñg giningamb ak kasek ma apeningamb mey, wisin apek kinamningambay.

6 “Pen kisyimnamb yomb biyan, biynimb gunap suk angyi angningambay, ‘Bi biyn dinary gisap ak asaw. Nup am kinjenamb ak niy, ponind owim angningambay.’”⁷ Kun angningambay, biyn tiwin onep wanjrem kun ak mangyisek tikjakiy, lam wiyk kiyk gok girep giningambay.⁸ Kun giy biyn gos niyrep ma giningambay tiwin ak, biyn gos niyrep giningambay tiwin ak kuyip angningambay, ‘Lam chin gok sungning gisap ak; wel nimb gok chinup gunap ñim angningambay.’⁹ Angey biyn gos niyrep giningambay tiwin ak angningambay, ‘Mer! Wel kun gok, nimbip gunap ñiy, chin gunap dinjun rek ma ayip. Nimb stowa amiy, nimbik gok key tawim angningambay.’¹⁰ Kun angningambay wel tawning stowa amningambay won ak, bi biyn dinary giningamb ak apchakeningamb. Biyn gos niyrep giningambay tiwin ak, bi kun ak yip korip mingan ameningambay; nuk kinjen giningamb.¹¹ Kisen pen biyn piñ gos niyrep ma giningambay tiwin ak apchakiy angningambay, ‘Biyomb! Biyomb! Chinup kinjen ak yikan angningambay.’¹² Angey, biyomb biyn nuk dinarygamb ñin kun ak angningamb, ‘Yand nimbip ma niybiyn angningamb.’¹³ Kun ak nimb Biyomb ak ñin akay akan, won akay winingamb ak ma niybim rek, minj moka giy mindenimimb.

*Biyomb Bap Binuk Gok Kuyip Maniy Ñak Angyi
Paydon Ay Angak
(Luk 19:11-27)*

14 “Pen kesim dining gispiyn biy rek giningamb. Biyomb bap miñmon paryomb okok amning, bi wonḡ nup giñiningambay gok kuyip suk anḡek apey, tap gok kond mindeyaḡ anḡiy, kuyip ñiningamb. ¹⁵⁻¹⁶ Binuk kun gok, wonḡ keykey giningambay rek niḡiy, maniy bilokiy, bi bap nup payp tawsin ñiningamb, bap nup tiw tawsin ñiningamb, bap nup wan tawsin ñiningamb. Ñiy, nuk am okok mindakniḡ, bi payp tawsin diningamb ak maniy kun ak diy, sikyim gi dand amiy apiy giy, maniy siyñiḡ payp tawsin diningamb. ¹⁷ Bi tiw tawsin diningamb ak kunep, sikyim gi dand amiy apiy giy, maniy siyñiḡ tiw tawsin diningamb. ¹⁸ Pen bi maniy wan tawsin diningamb ak, dand amiy, kaw tikiy lum ñiningamb.

19 “Kisen mind dand amiy, biyomb kiyk ak andkind apiy, maniy ñimbiyn kun ak yerer gipay anḡiy, kuyip anḡniḡningamb. ²⁰ Anḡniḡek, bi payp tawsin diningamb ak, maniy nuk ak ñiy anḡniḡningamb, ‘Biyomb niḡan! Yip maniy payp tawsin nep ñinak ak pen, yand maniy kun ak di, sikyim gi andik mandik giy, pen payp tawsin siyñiḡ dipiyn anḡniḡningamb.’ ²¹ Anḡek, biyomb ak pen anḡniḡningamb, ‘Tep. Nand bi wonḡ tep giñimban. Tap sikoy ak kun gipan ak, nip anḡen tap yomb gok kond mindeniḡngamban. Ap korip yip ak miñmiñ yimb giyiḡ mindenimin anḡniḡningamb.’

22 “Bi maniy tiw tawsin diningamb ak kunep maniy nuk ak dap ñiy anḡniḡningamb, ‘Biyomb. Yip tiw tawsin nep ñinak ak pen, yand maniy kun ak

diy, sikyim gi andik mandik giy, maniy siyniñ tiw tawsin dipiyn aņņningamb.’

²³ “Aņgek, biyomb ak aņņningamb, ‘Tep. Nand bi woņg tep giñimban ak mey; kun gipan. Tap sikoy ak kun gipan ak, nip aņgen tap yomb gok kond mindeniņgamban. Ap korip yip ak miñmiñ yimb giyiņg mindenimin aņņningamb.’

²⁴ “Pen bi maniy wan tawsin diniņgamb ak dap ñiy aņņningamb, ‘Biyomb. Yand nip niņbiyn; nand bi kalrimey yimb. Biynimb nak gunap woņg wariy kiyk gipay gok nand yikop pipañ dapiy ñimban. ²⁵ Nand kun gipan rek, yand pirikiy, maniy ñinak ak dand amiy, kaw tikiy lum ñen mindyiņgip ak, miñiy dand aswiyn aņņningamb.’

²⁶ “Aņgek biyomb ak aņņningamb, ‘Nand bi timey woņg magep bap. Yand biynimb gunap woņg gipay gok nep dapiy ñimben niņban kun ak; ²⁷ yenen maniy yip biy dam pasbuk ayey, miñiy apiy maniy siyniņ gunap sek ma dipiyn?’

²⁸ Kun aņgiy, binuk gunap kuyip aņņningamb, ‘Kun gip ak, maniy wan tawsin kun ak jiw diy, bi payp tawsin ñinik ak nup ñinimimb. ²⁹ Per apun rek: Biynimb gin yimb gok kuyip gunap sek ñey mindrep giniņgambay; pen biynimb gin mer gok, kuyip siskoy nind aņgayak ak piliņg dey, yikop yimb mindeniņgambay. ³⁰ Kun ak bi woņg ma gip kun anup kisyim yomb wip mis ar akyaņ yokem, biynimb meņg siwbirikiy, siy aņgmindpay gok yip siy aņg minden aņņningamb’ aņgak.”

Kor Yomb Kisen Ak

³¹ Bi bap Ñinuk kiyñ yomb mindiy winiņgamb ñin ak, enjol gok yip maņgiysek apiy, nuk siya

kiyŋ ar ak bisgek, ³² biynimb miñmon okok keykey mindpay rek, ap windin yirik ar nup siŋak nan-geniŋgambay, kuyip bilok pis ak key, pis ak key ayniŋgamb. Bi kanj siypsiyp meymey mokep gok, siypsiyp gok wikan bap tuŋgasik ay, meymey gok wikan bap key tuŋgasik ay gipay rek ak giniŋgamb. ³³ Biynimb siypsiyp rek mindpay gok niŋiy, ñin yipund kind ak ayniŋgamb; biynimb meymey rek mindpay gok niŋiy, ñin aŋind kind ak ayniŋgamb. ³⁴ Nuk kiyŋ yomb ak mey, biynimb tep gok kuyip aŋgniŋgamb, ‘Bapiy nimbip niŋimb. Wosrey nuk miñmon alwol gayak ñin ak, tip nimbip gayak ak mey, apiy tip tep kun ak dim. ³⁵ Yenen: yip yiwan gek, tap keñmaŋgiy ñimbim. Niŋg nen gek, niŋg ñimbim. Miñmon par okok nimb apen, yip aŋgdiy di korip nimbik ak aypim. ³⁶ Chech ma mindek, yip chech ak ñimbim. Yip tap gek, niŋmindrep gipim. Kalambis minden, yip ap niŋbim aŋgniŋgamb.’

³⁷ “Kun aŋgeniŋgamb, biynimb tep gok nup pen aŋgniŋgambay, ‘Biyomb. ñin akay nip yiwan gek keñmaŋgiy ñimbun? Ñin akay niŋg nen gek, nip niŋg ñimbun? ³⁸ Ñin akay par okok nimb apey, nip aŋgdiy dam korip chin ak aypun. Ñin akay chech ak ma mindek, nip chech ñimbun? ³⁹ Ñin akay tap gek akaŋ, kalambis mindey, nip am niŋbun?’

⁴⁰ “Aŋgeniŋgambay, kiyŋ yomb ak aŋgniŋgamb, ‘Mam yip yikop gunap kuyip girep gipim ak mey, yip girep gipim aŋgniŋgamb.’ ⁴¹ Kuyip kun aŋgiy, biynimb aŋind kind okok ken mindeniŋgambay gok kuyip aŋgniŋgamb, ‘Bapiy Gor Seytan nup sek, Seytan enjol nuk gok sek kuyip yiwur gakniŋ

mindeyañ angyiy, tip mon key yinjap bap gayak. Nimb biynimb timey yiwur yomb diniņgambim gok, yip kirgiy, mon key yinjap kun ak amnimimb.

⁴² “Yenen: yip yiwan gek, tap keñmangyiy ma ñimbik. Ñiņg nen gek, ñiņg ma ñimbik. ⁴³ Par okok nimb apen, yip ma angdipik. Chech ma mindek; yip ma ñimbik. Yip tap gak ñin ak akan, kalambis mindenik ñin ak, yip ma ap niņbik anğniņgamb.’

⁴⁴ “Anğeniņgamb, nup anğniņgambay, ‘Biyomb. Ñin akay yiwan mindenak nip keñmangyiy ma ñinuk? Ñin akay ñiņg nen gek nip ñiņg ma ñinuk? Ñin akay okok nimb apey nip ma angdinuk? Ñin akay chech nip ma mindek, nip ma ñinuk? Ñin akay tap gek akan, kalambis mindenak, nip ma am niņnuk?’

⁴⁵ “Kun anğeniņgambay, kiyñ ak anğniņgamb, ‘Nimb mam yip yikop gok kuyip direp ma gipik rek mey, yip sek gipik anğniņgamb.’ ⁴⁶ Kun angyiy, kuyip anğyokek am tip pernep yiwur gakniņ mindeniņgambay ak amniņgambay. Pen biynimb tep nuk gok angek, perper mindeniņgambay tip ak amniņgambay anğak.”

26

Jiysis Nup Ñanğjun Angyiy, Minim Kapkap Anğayak

(Mak 14:1-2; Luk 22:1-2; Jon 11:45-53)

¹ Jiysis minim kun ak angyiy, binuk onep wimiņgan ak kuyip anğak, ² “Nimb niņbim: ñin omiņal mindiy, Pasopa ñin yomb ak miñiy angyiy, ap nan-giy mindeniņgambay. Pen kiyk kun giy

ap nan-giy, yip di gapman biyomb gok kuyip ñiy angningambay, ‘Nup mon kiros bak biyan ñangbiriknimimb angningambay’ angak.”

³ Pen bi Gor nup tap simbonjep yomb gok sek, bi minim tungasikep gok sek ap Gor nup simbonjep biyomb yimb Kayapas korip ak nan-giy, ⁴ Jiysis nup yerer giy, ñangayjun angyi, minim angay geyak. ⁵ Pen, “Pasopa ñin biy kun gon, biynimb kuñaynep ap mindpay gok penpen giningiy rek ayip. Kun ak miñiy kirgiy, ñin bap nup pikayjun angyak.”

*Biyñ Bap Jiysis Nup Jun Wel Ayñak
(Mak 14:3-9; Jon 12:1-8)*

⁶⁻⁷ Jiysis miñmon Beteniy mindiy, Saymon bi soysek korip ak am tap ñimbeyak. Ñinyakniñ, biyn bap wel kuyrep, maniy yomb tawpay ak, botol sek dand apiy, Jiysis nup jun dum ak songak. ⁸⁻⁹ Songek, Jiysis binuk gok simbwur kuyip ak timey gek angyak, “Wel kun ak dand amiy maniy yomb diy, biynimb tap ma mindip gok kuyip ñemb rek ak pen, yenen yikop songip angyak.”

¹⁰ Minim kun ak angeyak Jiysis niñiy kuyip angak, “Nuk yip girep yimb gip; yenen kun as-pim? ¹¹ Biynimb tap ma mindip gok yip per mindeningambim yand yip per ma mindoningambun. ¹² Biynimb komniñ; wel ayñiy dam kombay rek ak yip ayñisap. ¹³ Pen niñind yimb as-piyn! Kisen miñmon okok mañgiyse, minim yip ak angniyiñ, biyn ak Jiysis nup wel ayñak angyi nup kesim diyiñ, gak kun ak niñnep mindeningambay angak.”

*Jiwdas Jiysis Nup Mimunġ Gak
(Mak 14:10-11; Luk 22:3-6)*

¹⁴ Ñin kun ak, Jiysis binuk Jiwdas Yiskariyot; Jiysis nup kayn gi dand amen pik ayniġiy aġiy, Gor nup tap simbong ñiyiġipay biyomb gok kuyip niġniġ amnak. ¹⁵ Amiy aġgak, “Jiysis nup kayn gi dand apiy nimbip ñeniġayn, yip tap yerip ñiniġambim?” Aġgek nup maniy siylpa ñin jiwiy andikiy anep ar ak ñiyak. ¹⁶ Ñeyak Jiwdas pen yerip giy kuyip aġgen, Jiysis nup ap dand amniġiy aġiy, gos ak niġak.

*Jiysis Binuk Gok Yip Pasopa Tap Ñiġak
(Mak 14:12-21; Luk 22:7-14, 21-23; Jon 13:21-30)*

¹⁷ Kisen Pasopa wiyk ak kiġiġ gi gakniġ, binuk gok Jiysis mindek ak apiy aġyak, “Ñin Pasopa siypsiyp ñiluk pikniġniġambun ak maġ mindip. Kun ak chin korip akay amiy tap niġniġambun gok gayrep ginjun aġyak.” ¹⁸ Aġgeyak kuyip aġgak, “Nimb dawin yomb ak amiy bi bap nup aġniġiy aġnimimb, ‘Tiysa aġgip ñin yand ak maġ mindip ak mey, bi yand gok yip siypsiyp ñiluk pik daġiy niġniġambun korip nund ak aġgip’ aġnimimb.”

¹⁹ Jiysis kun aġgek binuk gok aġgak rek niġiy, am siypsiyp kun ak korip miġgan kun ak pik daġiy gayrep geyak. ²⁰ Dunġep won ak binuk onep wimiġgan ak yip bisġiy, ²¹ tap ñimbyiġ aġgak, “Yand nimbip niġind yimb aspiyn. Bi chin yip tap ñimbsipun biy, bap yip kayn gi dand amniġgamb aġgak.”

²² Angek binuk gok gos yomb ninjy, nokom nokom nup angninying angyak, “Biyomb! Yip ma apan rek?”

²³ Angeyak angak, “Bi yand yip piler nokom ñimbsipur ak yip kayn gi dand amningamb.

²⁴ Baybol buk ak wosrey angyi tikyak rek, yip kayn gi dand amiy, pikayey kumningayn ak pen; bi yip kayn gi dand amningamb anup simb ninsipiyn. Nonim nup ma tikpikop ak tep. Pen tikek, mindyng kun giningamb ak, kisen yiwur yomb yimb ak diningamb angak.”

²⁵ Angek binuk Jiwdas nup kayn ginyng gak ak angak, “Tiysa. Yip ma apan rek?” Angek angak, “Mey nip aspiyn angak.”

Jiysis Binuk Gok Kuyip Biret Wayn Ñak

(Mak 14:22-26; Luk 22:15-20; 1 Kor 11:23-25)

²⁶ Tap ñimb mindyng Jiysis biret ak diy, Gor nup tep angyi, tipang kuyip ñiyng angak, “Diy ñinim. Ak mumbwak yand rek angak.”

²⁷ Kun angyi, ñing wayn kap ak kunep diy, Gor nup tep angyi, kuyip ñiyng angak, “Nimb mangiysek ñinimimb. ²⁸ Ñing biy mey, likañ yand biynimb kunaynep kuyip nen yowningamb rek nimbip ñispiyn. Likañ yand yowningamb kun ak mey; Gor tap siy tap timey gipay gok ninjy kirginyngayn angak minim ak wos amningamb angak.”

²⁹ Kun angyi angak, “Yand nimbip ninjind aspiyn. Wayn ñing biy miñiy gunap sek ma ñinnyngayn. Kisen Gor biynimb diy kond mindenyngamb ñin ak, nimb yip wayn ñing kisenimb ak ñinnyngayn angak.” ³⁰ Kun angyi binuk gok

yip lotiw kamep bap angying, miñmon Oliyp dum amniyak.

Jiysis Piyta Nup, Bi Kun Ak Ma Niñbiyn Anğningamban Anğak

(Mak 14:27-31; Luk 22:31-34; Jon 13:36-38)

³¹ Jiysis kuyip anğak, “Gor anğak rek Baybol buk ak tikiy anğyak:

‘Yand bi kanj siypsiyp mokep ak nup pik ayen, kanj siypsiyp gok mañgiysek pirik amningambay anğyak.’

Anğyak kun ak mey, mindak maynamb biyan nimb mañgiysek yip kirgiy, pirik amningambim.

³² Pen yand kumiy tikjakiy, miñmon Galiyliy nind ameningayn; nimb kisen ninimimb anğak.”

³³ Anğek Piyta anğak, “Bi mañgiysek nip kirgiy kund ñningambay rek ayip; yand kun ma giningayn anğak.”

³⁴ Anğek Jiysis anğak, “Niñind apiyn: kisyimnamb biyan kakaruk suk ma anğningamb won ak, Bi kun anup ma niñbiyn anğiy, won ominal nokom anğningamban anğak.”

³⁵ Anğek Piyta kilis timey giy anğak, “Yip pikayning pikayningambay ak pen; Jiysis bi yand mer anğiy ma anğningayn anğak.” Jiysis binuk gunap kunep Piyta anğak rek nep anğyak.

Jiysis Nop Nup Anğniñ Mindek

(Mak 14:32-42; Luk 22:39-46)

³⁶ Jiysis binuk gok yip miñmon Getsemeniy amiy, binuk gunap kuyip anğak, “Nimb biy bising mindenimimb. Yand siñbindoñ amiy, Bapiy nup anğniñ mindeningayn anğak.” ³⁷ Kun anğiy Piyta

nup poñind, Sebediy ñinuk Jemis yip Jon kuyip poñind sandak. Amyiņg, Jiysis nuk gos yomb niņiy, ³⁸ kuyip yakam aņgak, “Mindmaņgiy yip piņiyñiy nep aysap ak kumnim rek ayip. Biy mindiy, yip kond mindenimimb aņgak.”

³⁹ Kun aņgiy, kuyip kun siņak aņgay, nuk yep kondon siņak amiy, jiy kuyangiy, jomluk ak di man biyaņ ay, Gor nup aņgniņiy aņgak, “Bapiy. Tap yip giniņg gisap kun ak mer aņgiy ker, mer aņgnimin; pen yand gos niņbiyn ar ak ma ginimin; gos nand key niņban rek ginimin aņgak.”

⁴⁰ Kun aņgiy andkind apiy niņak: binuk gok kineyak; Piyta nup aņgak, “Won bap yenen yand yip niņmindiy ma kinjipim? ⁴¹ Timey ginjun rek ayip aņgiy, Gor nup aņgniņy iņg mindenimimb. Gos nimbik ak ginimimb rek ayip ak pen; mumbwak anep mawses gip aņgak.”

⁴² Jiysis kun aņgiy, tip am Nop nup aņgniņiy aņgak, “Tap yip giniņg gisap ak, kirgep rek ma mindip monmon gaņ; gos nak aņgak.” ⁴³ Kun aņgiy, tip ak andkind apiy niņak: binuk gok ma niņmindeyak, wisin kineyak.

⁴⁴ Pen nuk andkind amiy, Nop nup nind aņgniņak rek nep tip ak aņgniņiy, ⁴⁵⁻⁴⁶ andkind apiy, binuk gok kuyip aņgak, “Nimbip mawses gek kin mindpim? Tikjakem amnun. Niņim! Bi yip mimuņg niņimb ak, bi tap siy tap timey gipay gok kuyip ñiyn aņgiy poñind asaw biy aņgak.”

*Jiwdas Jiysis Nup Kayn Gi Dand Amnak
(Mak 14:43-50; Luk 22:47-53; Jon 18:3-12)*

⁴⁷ Minim aņgakniņ, Jiwdas nuk, bi Gor nup simbongep yomb gok sek, Jiwda kanjsol gok sek

nup angyak rek, bi kiyk kuṇaynep dand owak. Kiyk baynat gunap, kur gunap diy dand sesek wiyak. ⁴⁸ Jiwdas kuyip anḡay anḡak, “Yand bi bap nup am diy, kaykol ginikniṅ anḡnimimb; Jiysis mey ak anḡiy, nup dinimimb anḡak.” ⁴⁹ Anḡak rek Jiysis mindek ak apchakiy, mindpan anḡiy, nup kaykol gak.

⁵⁰ Kun gek Jiysis anḡak, “Bunḡiy. Giniṅ gispan kun ak kasek gan anḡak.”

Angek, bi Jiwdas yip wiyak gok Jiysis nup chichiy diyak. ⁵¹ Pen nup kun giy diyakniṅ, Jiysis binuk bap baynat ak lipiṅ diy, bi Gor nup simbongep yomb yimb wong giñiyiṅip anup timund piskind ak pisnep timbrik yokak. ⁵² Kun gek Jiysis nup anḡak, “Ñayip baynat ak dipan okok tip ak liṅgey amnan. Biynimb ñayip baynat diy penpen gipay gok, ar kun ak nep kumbay. ⁵³ Yand ‘Bapiy ak-ey!’ anḡembinip, nuk enjol tiwin keykey onep wimiṅan ak rek yokek, ap yip kond mindembiyap. ⁵⁴ Pen wosrey Baybol buk ak tikiy; yip kun kun giy kumiṅgamb anḡyak ak mey, kun ginimuṅ. Yand ar bap key geniṅgayn yipund ma giniṅgamb anḡak.”

⁵⁵ Pen bi nup diniṅ wiyak kun gok kuyip anḡak, “Yand per am Gor anḡniṅep korip ak bisgiy, biynimb gok kuyip minim anḡñimbiyn ak pen, yip ma dipim. Miñiy pen baynat sek, kur sek dand apiy, bi tap siydep rek ak yip dipim. ⁵⁶ Pen gipim kun ak, bi Gor minim anḡep gok giniṅgamb anḡyak rek nep gipim anḡak.”

Won kun ak Jiysis binuk gok maṅgiysek nup kirgiy, pirik amniyak.

Jiysis Nup Kor Giyak
(Mak 14:53-65; Luk 22:54-55, 63-71; Jon 18:13-14, 19-24)

⁵⁷ Pen bi low tiysa gok sek, bi Jiwda kanjsol gok sek ap nan-gi mindeyak Kayapas bi Gor nup simbongep yomb yimb korip ak mey; Jiysis nup chichiy diy, dand korip kun ak amniyak.

⁵⁸ Pen Piyta kindik kindik amiy, korip mis ar ak mindiy, Gor angninep korip poliys gok yip bisgiy, yerip rek giningambay angyi ninmindek.

⁵⁹⁻⁶⁰ Bi Gor nup simbongep yomb gok sek, bi kanjsol yikop gok sek angyak, “Chin bi minim yesek angningiy gunap kuyip angninon, kiyk minim bap angey, yipund giy mindek, minim kiñij mey ak angyi, Jiysis nup pikayjun angyak.” Kun angyak ak pen, minim kun ak keykey amek kiñij ninij nup pikayningiy rek bap ma mindek.

⁶¹ Pen bi omiñal apiy angrik, “Bi kun biy, ‘Gor angninep korip ak timbrikyokem, ñin omiñal nokom mindiy, tip ak giningayn angak’ angrik.”

⁶² Kun angerik, bi Gor nup simbongep yomb yimb ak, Jiysis nup angak, “Minim nip apay ak; pen ma angningamban?” ⁶³ Angek, Jiysis pen minim bap ma yimb angak. Kun gek, bi Gor nup simbongep biyomb yimb ak angak, “Miñiy kor mindpun biy, yesek ma angnimin. Gor Biyomb gek perper mindpay ak kunep ninmindip. Kun ak chinup yipund giy angnimin. Nand Gor Ñinuk Kiyñ yomb key yimb ak akan?” ⁶⁴ Angek Jiysis angak, “Mey apan ak. Nimb mangiysek ninim! Yand nimbip aspiyn: yand Gor ñin yipund kind okok

mindiy, semb ar biyon nimb lum biy apeningayn niñningambim angak.”

⁶⁵ Jiysis kun angak, bi Gor nup simbongep yomb ak, yenen kun angip angiy, chech nuk gok key tungralikiyng angak, “Nuk Gor nup yimb ak dand apyapyng asap! Kun ak biynimb gunap ma angniñjun. Nuk timey gip rek misen angip. ⁶⁶ Akan nimb gos yerip niñbim?” Angak angyak, “Mey angip ak nen; kumnimun angyak.”

⁶⁷ Kun angiy, nup jomluk okok kiñuk giñiy, pikyng giyak. Gunap weygiy, mikem nup okok piksil giyng angyak, ⁶⁸ “Nand Kiyng yomb key yimb tap okok mangiyseki niñban ak; an nip piksap ak, chinup angey niñun angyak.”

⁶⁹ Pen Piyta korgep korip mis ar biyan bising mindek ak mey, bi Gor nup simbongep yomb yimb anup wonng giñiyngip pañ ak apiy, nup angak, “Nand Jiysis bi Galiyliy nimb ak yip mindambiy angak.”

⁷⁰ Angak, Piyta biynimb gok mangiyseki niñmindyakniñ angak, “Minim nand aspan ak yand ma niñbiyn angak.” ⁷¹ Kun angiy, tikjakiy, am kinjenrumb siñak mindakniñ, biyn korip kun ak wonng giyngip bap ap nup niñiy, bi mindeyak gok kuyip angak, “Nuk bi Jiysis Nasaret nimb ak yip minder niñbiyn angak.” ⁷² Angak, Piyta ang silokiy angak, “Yand niñind yimb apiyn! Bi apim kun ak yand ma yimb niñbiyn angak.”

⁷³ Sikoy won bap mindiy, bi Piyta yip jak mindeyak gok nup angyak, “Niñind nep apun. Nand bi kiyk bap. Meng miñgan kiyk apay rek apan angyak.”

⁷⁴ Anǵeyak, Piyta minim kasek anǵiy anǵak, “Yand nimbip niñind yimb apiyn! Bi nimb apim kun ak yand ma yimb niñbiyn anǵak.” Kun anǵakniñ day kakaruk ak suk anǵek, ⁷⁵ Piyta Jiysis minim nup anǵak ak niñyiñg gospar ayak. Yenen: Jiysis anǵak, “Kakaruk ma anǵniñgamb won ak yand nup ma niñbiyn anǵiy, won omiñal nokom anǵniñgamban anǵak.” Gos kun ak niñiy mey gospar ay, mis amiy siy yomb anǵak.

27

Jiysis Nup Dam Gapman Biyomb Anup Ñiyak (Mak 15:1; Luk 23:1-2; Jon 18:28-32)

¹ Miñmon yowakniñ, bi Gor nup simbonǵep yomb gok sek, bi minim tunǵasikep yikop gok sek minim anǵniñ anǵniñ giy Jiysis nup pikayun anǵiy, ² nup miñ ay dand amiy, gapman biyomb Paylat nup ñiyak.

Jiwdas Kumak (Ap 1:18-19)

³ Pen Jiysis nup kor giy, pikayniñg geyak niñiy, Jiwdas, yenen Jiysis nup mimunǵ niñbiyn anǵiy, maniy dak ak, bi Gor nup simbonǵep yomb gok sek, biyomb yikop gok sek kuyip jiw dam ñiniñg, Gor anǵniñep korip ak amnak. ⁴ Amiy, maniy kun ak kuyip ñiyiñg anǵak, “Jiysis timey ma gip ak pen, nup mimunǵ niñbiyn rek mindak kumniñgamb anǵak.” Anǵek kiyk anǵyak, “Ak tap chin mer. Nak keynep kun gipan anǵyak.” ⁵ Anǵeyak, maniy ñiyak ak Gor anǵniñep korip miñgan ak diyokiy, am miñ ñiñak.

⁶ Bi Gor nup simbonjep yomb gok maniy kun ak diy angyak, “Maniy kun biy, bi pikayun angyiy mimung ginuk ak mey, opriyn ñinjun rek ma ayip angyak.” ⁷ Kun angyiy, minim angnin angnin giy, bi par okok nimb ap biy kumey dam komjun miñmon wikan bap tawun angyiy, am man yingiy sinjey tiyn giyingipay miñmon wikan ak tawyak. ⁸ Tawiy, miñmon wikan kun biy, mimung pinij ñimbun maniy ak diy tawnuk ak mey; yimb ‘Likañsek’ angnun angyak. Miñiy kunep miñmon wikan kun ak, yimb ‘Likañsek’ apay.

⁹ Pen kiyk mankumb tawyak kun ak, bi Gor minim anjep Jeriy may nind angyiy tikak rek nep giyak. Nuk tikiy angak:

“Kiyk maniy ñin jiwiy andikiy onep ar ak, Jiwda biynimb mimung pinijñinuk maniy ak angyiy, ¹⁰ dand amiy, miñmon man yingiy sinjey tiyn giyingipay wikan ak tawningambay. Biyomb ak yip giningambay angyiy angak rek nep giyak.”

Biyomb Paylat Jiysis Nup Angninjak
(Mak 15:2-5; Luk 23:3-5; Jon 18:33-38)

¹¹ Jiysis nup dand gapman biyomb Paylat mindak ak amniyaknin, Paylat, Jiysis nup angak, “Nand Jiwda kay kiyn yomb kiyk ak mindpan?” Anjek Jiysis angak, “Mey apan ak angak.” ¹² Pen bi Gor nup simbonjep yomb gok sek, bi kanjsol yikop gok sek nup minim gunap anjeyak, nuk pen minim bap ma nep angak. ¹³ Kun gek, gapman biyomb Paylat angak, “Minim keykey angyiy nip kor gispay ak ma ninban?” ¹⁴ Anjek,

Jiysis nup minim bap ma angek, Paylat gos kuṅay yimb niṅak.

¹⁵⁻¹⁹ Pen Paylat kiṅ bispay siya ar ak biṅing mindakniṅ, biynuk minim bap angek apek angak, “Yand maynamb wisin niṅbiyn: Bi kor gispim ak bi tep. Nup minim yiñ ma angnimin. Yand wisin niṅbiyn kun ak, gos kuṅay niṅsipiyn angak.” Minim kun ak Paylat nuk nep niṅiy angak, Jiysis tap bap ma gak, biyomb guniy nup yikop milik niṅiy dand opay. Kun ak kinjeṅ yerip ak piyow niṅiy nup angyoken amnaṅ angyi, gos ak niṅak.

Pen Rom gapman biyomb gok per simiy ak simiy ak Jiwda kay biret yiys sek ma ñimbay ñin yomb ak, kuyip kalambis bi bap key angninyingipay ak, yikop wisik yokyingip. Ñin kun ak, Jiwda kay bi kiyk niṅrep giyingipay bap ap kalambis mindek. Yimb nuk ak Barabas. Kun ak biynimb kuṅaynep ap nan-geyak Paylat angak, “Bi nimbip akay yikop angyoknim? Jiysis, Kiṅ yomb key yimb apay ak akan, Barabas nup angak.” ²⁰ Angek bi Gor nup tap simbongep yomb gok sek, bi kanjsol yikop gok sek biynimb gok kuyip angyak, “Gapman biyomb Paylat nup angenimimb, Barabas nup wisik yokiy, Jiysis nup mon kiros bak biyoṅ ñanṅbirik ayniṅiy angyak.”

²¹ Kun ak kisen gapman biyomb ak kuyip angak, “Bi ominal biy, an nup rek nimbip wisik yoknim?” Angek angyak, “Barabas nup wisik yokninin angyak.”

²² Angeyak Paylat angak, “Kun apim ak, Jiysis Kiṅ yomb key yimb apay ak nup yerginim?”

Angek, kiyk maŋgiysek angyak, “Nup mon bak biyoŋ ñaŋgbiriknimimb angyak.”

²³ Angeyak gapman biyomb Paylat angak, “Yenen? Nuk tap yerip ak timey gak?” Pen minim angak ak ma niŋiy, minim dand araniy angyak, “Nup mon kiros bak biyoŋ ñaŋgrimbik aynimimb! Nup mon kiros bak biyoŋ ñaŋgrimbik aynimimb angyak.”

²⁴ Angeyak minim gunap sek angen penpen giniŋgiy rek ayip angyi, Paylat ñiŋ diy ñin ayokyiŋg kuyip angak, “Jiysis nup pikayniŋg gispim ak, minim kun ak yip ma winiŋgamb; nimbi key andkind winiŋgamb angak.”

²⁵ Angek angyak, “Ak chip nambinj chin key. Minim kun ak, chin sek, ñapan chin gok sek niŋniŋgambun angyak.”

²⁶ Kun angeyak, Paylat kuyip Barabas nup wisik yokiy, Jiysis nup miñ diy pikiy, mon kiros bak biyoŋ ñaŋgbirik ayaŋ angyi, amiybi gok kuyip yomak.

²⁷ Amiybi yomb gok nup diy, dand korip yomb kiyk ak amiy, amiybi yikop gok kuyip maŋgiysek suk angey, ²⁸ ap nan-giy, chech nup ak tunjjiwiŋg chech likañ biyomb yimbay rek bap dand apiy nup yimñiyak. ²⁹ Yimñiy miñ ñiwñiw sek gok dand apiy, kiŋ kay aypay arband rek bap giy, nup ayñiyiŋg, biyomb gok kur kunep dipay angyi, gamil par bap di Jiysis nup ñin yipund kind ak ñiy, ap nup koŋgim yimiy, angyiwiŋg angyak, “Jiwda kiŋ kiyk biy per mindonimuŋ angyak.” ³⁰ Kun angyi, nup kiñuk giy, gamil kur kun ak jiw diy, nup jun dum biyoŋ pikyak. ³¹ Nup kun giy gi

timey giy, chech likañ ayñiyak ak tunḡasikyokiy, chech nuk gok key ayñiy, nup mon kiros bak biyoñ ñaḡbirik ayoñ, poñind amniyak.

*Jiysis Nup Mon Kiros Bak Biyoñ Ñaḡbirik Ayak
(Mak 15:21-32; Luk 23:26-43; Jon 19:17-27)*

³² Kinjeḡnamb okok dand amyoñ niḡyak, bi bap Sayriy niy nimb apek. Yimb nuk ak Saymon. Nup namb pikiy, kilis giy aḡyak, “Jiysis nup ñaḡbirik ayoñḡambun mon kiros biy dand amnoñ aḡyak.” ³³ Aḡey dakniñ, miñmon Golgota dum amniyak. Golgota kun ak, chip jun dum apay.

³⁴ Pen dum kun ak amjakiy, amiybi gok malasin silik bap diy, wayn ñiḡ ak diy, sesek tunḡandik mandik giy, Jiysis nup ñeyak, nuk ñimb niḡiy kirkak. ³⁵ Nup mon kiros bak biyoñ ñaḡbirik ay, chech nup gok bilok keykey diñiḡ, sandiw rek giy diyak. ³⁶ Diy mey, nup mon ñaḡbirikyak kiñiñ siḡak bisḡiy niḡmindeyak.

³⁷ Nup ñaḡbirikiy, kiros bak biyoñ yimb tikay aḡyak, “Jiwda kay Kiyñ yomb kiyk ak aḡyak.”

³⁸ Pen Jiysis nup ñaḡbirik ay, bi tap siydep omiḡal ak, bap ñin yipund pis ak, bap aḡind pis ak, ñaḡbirik ayak. ³⁹⁻⁴⁰ Biy nimb kinjeḡram aran apyan geyak gok, jun gormar giy, nup aḡjiwiy aḡyak, “Nand Gor Ñinuk rek! Gor aḡñiḡep korip ak timbrikyokiy, ñin omiḡal nokom mindiy tip ak gi diñiḡamban ak mey; mon kiros bak biyoñ kirkiy apey chin niḡun aḡyak.”

⁴¹ Bi Gor nup simboḡep yomb gok, bi low tiysa gok, bi kanjsol yikop gok sek kunep; nup aḡjiwiy aḡyak, ⁴² “Biy nimb gunap kuyip gamb

kim ambay ak pen, nuk key kun ginimun rek ma ayip. Yisrel, Kiyŋ yomb chin ak, mon kiros bak biyoŋ kirgiy man ar biy apey, niŋind aŋgip aŋgiy niŋjun. ⁴³ Nuk Gor nup gosimb niŋiy, yand Gor Ñinuk aŋgip ak, miñiy ap Ñinuk nup diyokek chin niŋun aŋgyak.” ⁴⁴ Bi tap siydep Jiysis yip ñaŋgrimbikyak omiŋal ak kunep, nup minim timey kun ak rek nep aŋgrik.

Jiysis Pisnep Kumak

(Mak 15:33-41; Luk 23:44-49; Jon 19:28-30)

⁴⁵ Ñin kun ak pumbnamb yomb yoŋ won ak, kisyim apiy mind dand amiy pumb kuyim gak won ak tip ak melik gak. ⁴⁶ Won kun ak Jiysis suk yomb aŋgiy aŋgak, “Yilay. Yilay, lema sambaktaniy aŋgak.” Aŋgak kun ak, “Gor Bapiy yomb. Gor Bapiy yomb. Yip yenen kirpan aŋgiy aŋgak.” ⁴⁷ Nuk kun giy suk yomb aŋgek, biynimb gunap maŋ kun siŋak mindeyak gok niŋiy aŋgyak, “Bi kun biy bi Gor minim aŋgep Yilayja nup suk asap aŋgyak.” ⁴⁸ Kun aŋgiy, bi bap am tap machres rek ayak band bap dand apiy, ñiŋg wayn silik ak tawiy, gamil kur par ak diy, kambis ñaŋgiy, ñen ñiŋaŋ aŋgiy ñak.

⁴⁹ Kun giy ñek, bi gunap aŋgyak, “Kapkap niŋmindon. Bi Yilayja apiy, nup diyokningamb akaŋ aŋgyak.” ⁵⁰ Aŋgiy, niŋmindyakniŋ, Jiysis suk yomb aŋgiy, aŋiŋ band mindek ak kurgak.

⁵¹ Won kun anep, chech paryomb Gor aŋgniŋep korip ñiluk miŋgan biyaŋ kinjeŋrumb pilgiyak ak, namb ak puŋgrik biyoŋ biyaŋ ay mindek. Kun gakniŋ, monmon diy, kamb gok puŋglakiy, ⁵² chip komyak kamb miŋgan pilgiyak

gok miŋgan yikiy, Gor biynimb nuk nind kumey komyak gok kuŋaynep gek, tip ak tikjakyak ak mey; ⁵³ Jiysis tikjakak ñin ak Jerusalem ameyak, biynimb kuŋaynep niŋyak.

⁵⁴ Pen monmon diy, yerer gak ak niŋiy amiybi yomb ak sek, binuk gok sek niŋiy angyak, “Yaw-ey! Nuk Gor Ñinuk yimb angyak.” ⁵⁵ Pen biyn kuŋaynep ap keykey siŋak mindiy niŋmindeyak. Biyn kun gok Jiysis nup kondiy, Galiyliy nimb wiyak. ⁵⁶ Biyn mindeyak kun gok bap Mariya Makdala; bap Jemis yip Josep yip nonim Mariya; bap Sebediy ñinuk omiŋal nonim ak.

*Jiysis Nup Kamb Miŋgan Ak Komyak
(Mak 15:42-47; Luk 23:50-55; Jon 19:38-42)*

⁵⁷⁻⁵⁸ Bi tap kuŋay mindek miñmon Armatiya nimb bap Jiysis kumek niŋiy, duŋgep won ak ap gapman biyomb Paylat nup Jiysis mumbwak ak dinim akan angek, Paylat yaw angyi, binuk gok kuyip angek, nup ñiyak. Bi kun ak yimb nuk Josep. Nuk Jiysis binuk bap. ⁵⁹ Josep nup Jiysis mumbwak ak ñiyakniŋ, nuk chech tund tep ak diy, nup maŋgiysek pipkomiy, ⁶⁰ dam kamb miŋgan kisen nep, yip komniŋgambay angyi angek kiluk ayak miŋgan ak komiy, kamb yomb bap tuŋg milokek amek, kamb miŋgan ak pilgiy amnak.

⁶¹ Biyn yimb along Mariya omiŋal ak ap niŋmindrikniŋ, kun giy komak.

*Amiybi Gok Jiysis Nup Komyak Kamb Miŋgan
Ak Kond Mindeyak*

⁶² Jiysis kumek komyak ñin kun ak, bi Gor nup simbonjep yomb gok sek, Peresiy gok sek lotiw ñin ak toy angyi, tap dap nan-giyak. Minek, gapman biyomb Paylat mindek ak amiy angyak, ⁶³ “Biyomb. Bi yesek anjep kun ak angak, ‘Yand kumiy, ñin omiñal nokom mindiy tikjakningayn angak.’” ⁶⁴ Kun ak bi gunap anjep, ñin omiñal nokom kawrumb ak kond mindeningiy. Mer ak binuk gok ap mumbwak nup ak siy dand amiy, biynimb okok kuyip yesek angyi angningambay, ‘Nuk tip ak tikjaki angningambay.’ Kun gey, minim yesek angyingipay ak sikoy rek ayningamb, kisen angningambay ak yomb yimb giningamb angyak.”

⁶⁵ Anjepyak Paylat kuyip angak, “Kun ak nimb amiybi kaw bap anjep gem, am kun siyak niñmindeningiy angak.” ⁶⁶ Anjek am kinjeñ pilgiyak kamb yomb ak wiren rek giy, amiybi kaw bap anjepyak am kun siyak niñmindeyak.

28

¹ Minek miñmon tikdam yokakniñ, biyn yimb along Mariya omiñal ak, Jiysis nup komyak ak niñning amnirik. ² Won kun ak enjol bap semb biyon nimb apiy, Jiysis nup komiy kamb pilgiyak ak, tungmilok gol okok yokiy, ar kun ak bisgakniñ, monmon yomb yimb ak owak. ³ Enjol kamb ar bisñg mindek kun ak, jomluk nuk ak ñiñakol giyñg mindek. Chech nuk ak, tund tep yimb ak ayak. ⁴ Pen amiybi niñmindeyak gok, nup niñiy jel pirikiy, kin ambun tikiy mindeyak.

⁵ Pen enjol ak biyn omiḡal ak kuyip aḡgak, “Ma piriknimiyr! Yand niḡbiyn: nirmiḡay Jiysis bi mon kiros bak biyoḡ ḡaḡbirik ayak anup niḡraspiyr. ⁶ Nuk biy ma mindip. Nind aḡgak rek mindarik tip tikjakiy amimb. Apiy nup dayak ar ak niḡiy, ⁷ am binuk gok kuyip aḡgnimiyr, ‘Tip tikjakiy Galiyliy amimb aḡgnimiyr.’ Nimb biynimb nuk gok, nup niḡniḡgambim kun okok. Minim kun ak nep nimbip aḡḡniḡ aswiyn aḡgak.”

⁸ Kun aḡgek niḡiy, biyn omiḡal ak pirikrik ak pen; miḡmiḡ giyiḡ, binuk gok kuyip minim kun ak aḡniḡ kasek amnirik. ⁹ Kinjeḡnamb okok amnirikniḡ, Jiysis kuyipmiḡay namb pikiy, “Nir mindpiyr aḡgak.” Aḡgek, kiymiḡay ap koḡim yimiy, nup diniḡiy lotiw gerik, ¹⁰ kuyipmiḡay aḡgak, “Ma piriknimiyr! Yand Galiyliy amjiḡiyn ak; nir am mam yand gok kuyip aḡgnimiyr, ‘Nup am niḡnimimb miḡmon Galiyliy aḡgnimiyr’ aḡgak.”

Amiybi Gok Am Jiysis Tikjakak Rek Minim Ak Aḡgyak

¹¹ Biyn omiḡal ak, kinjeḡnamb okok amnirikniḡ, amiybi niḡmindeyak gok, dawin yomb Jerusalem amiy, bi Gor nup simboḡep yomb gok kuyip, Jiysis tikjakak minim ak aḡḡiyak.

¹² Aḡḡeyak, bi Gor nup simboḡep yomb gok, am bi kanjsol gunap yip, minim aḡḡ ar nokom ay apiy, amiybi kun gok kuyip maniy yomb ḡiy aḡgyak, ¹³ “Jiysis kun kun giy tikjakap aḡḡiy ma aḡgnimimb. Pen aḡgnimimb, ‘Chin kinambun won ak binuk gok apiy, mumbwak nup ak siy

dand ambay angnimimb angak.’ ¹⁴ Kun gey, gapman biyomb ak minim kun ak ninjy angek, chin yip angoningambun; nimbip miker gunap ma ñiningamb angyak.”

¹⁵ Kun angey, amiybi gok maniy kun ak diy, am biyomb kun gok angyak rek nep angyak. Kiyk tom giy, Jiysis mumbwak nup ak, binuk gok siy dand ambay angeyak, miñiy Jiwda biynimb gok minim kun ak angying mindpay.

Jiysis Binuk Gok Nup Ninjyak

(Mak 16:14-18; Luk 24:36-49; Jon 20:19-23)

¹⁶ Jiysis binuk onep anqip ak Galiyliy amiy, kuyip nind angak dum ak amniyak. ¹⁷ Amiy Jiysis nup ninjy, lotiw giyak. Pen gunap ninšindol giy angyak, “Ak Jiysis akan bi ak key angyak.”

¹⁸ Jiysis mañ sinak apiy, kuyip angak, “Bapiy yip angek mey, man ar biy kond mindiy, semb biyon kond mindiy gipiyn. ¹⁹ Kun ak nimb miñmon okok kind kind amiy, biynimb gok yip ker dinimimb. Diy, Bapiy Gor ker mindpay, Ñinuk ker mindpay, Kawnan nuk ak ker mindpay angiy, kuyip ñing pikñinimimb. ²⁰ Pikñiy, yand nimbip ginimimb angiy minim yerip yerip angnimbiyn ak mañgiysek, kuyip angnirep gem ninjy kindik giningiy. Pen yand nimb yip nep mindiy, mind dand amiy, ñin kisen ak winingamb angak.”

CXXX

**Kalam Baybol Buk Gor minim nuk kisin
angayak
The New Testament in the Kalam Language of Papua
New Guinea
Nupela Testamen long tokples Kalam long Niugini**

copyright © 1992 Wycliffe Bible Translators, Inc.

Language: Kalam

Dialect: central

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-06

PDF generated using Haiola and XeLaTeX on 21 Feb 2024 from source files dated 31 Aug 2023

1491c109-3ee2-5565-9b83-06c480168547